

152  
5  
34


大越史記全書  
卷八

152  
10  
34

東 京 圖 書 館

一 〇 冊	三 〇 號	四 二 架	一 〇 函	雜 史 類	漢 書 門
-------------	-------------	-------------	-------------	-------------	-------------

大越史記全書 第七冊



記本紀實錄卷之三

三

宗淳皇帝上

諱思誠。又諱灑。太宗第四子也。在位三十八年。壽

能土開疆。版章孔厚。具英雄才畧之主。雖漢之武帝。唐之太宗。莫

也。帝母光淑皇太后吳氏。清化安定洞滂人也。初太后為婕妤。祈

嗣。夢天帝錫以僊童。遂有娠。世傳太后臨誕時。因悶假寐。夢至

帝。額上童遲久不肯行。上帝怒。以玉笏擊其額。不出血。後夢覺。遂生

以大寶三年壬戌。七月二十日誕生。帝之生也。天姿日表。神彩

英異。岐岐然。嶷嶷然。煌煌然。穆穆然。真作后之聰明。保邦之智

勇也。大和三年。封平原王。奉藩入京師。日與諸王。同經筵肄學。

時經筵官陳封等。見帝容止端重。聰睿過人。心中異之。帝愈自  
韜晦。不露英氣。惟以古今經籍。聖賢義理爲娛。天性生知。而夙  
夜未嘗釋卷。天才高邁。而制作尤所留情。樂善好賢。亶亶不倦  
宣慈太后視若己生。仁宗推爲難弟。及延寧年間。宜民僭位。改  
封帝爲嘉王。仍建邸右內殿以居之。未幾。大臣阮熾。丁列等。共  
以禁兵。討屯。般等。遂廢宜民。迎帝卽位。時帝年十八。入承大統。  
稱天南洞主。廟號聖宗。

庚辰。光順元年。六月以前。宜民僭稱天。興二年。○明天順四年。春二月。宜民議置府縣。○有孛  
星。見于翼分野。○宜民分設六部。六科。府縣州官。○夏五月。蚩尤白旗  
自東至西。橫天散彩。○六月初六日。諸大臣阮熾。丁列等。倡義誅屯。般  
逆黨。降宜民爲侯。迎嘉王卽帝位。時宜民篡位纔八月。崇信姦回。屠戮

舊臣。祖宗法制。一切紛更。人怨天怒。於是勳舊大臣。開府儀同三司。入  
內檢校。太傅。平章軍國重事。亞那侯阮熾。丁列。入內檢校。平章軍國重  
事。亞上侯黎凌。司馬參預朝政。亭上侯黎念。總知御前後軍。亞侯黎仁  
順。總知御前中軍。關內侯黎仁。總知御前善棹名軍。冠服侯鄭文灑。  
僉知北道軍民簿籍。鄭鐸。殿前司都指揮阮德忠。鐵突左軍大隊長阮  
煙。入內大行遣黎永長。殿前司指揮黎燕。黎解等。相與議曰。今諒山王  
宜民甚於不德。率彼無賴之人。范屯。潘般等。乘夜間梯城。入宮禁中。弑  
君及國母皇太后。惡莫大焉。我等忝以勳舊之臣。面見此事。宜死於社  
稷。而居於悖逆之下。立於篡弑之朝。爲萬世之罪人。何面目見先王於  
地下乎。朝退俱坐於議事堂崇武門外。阮熾等倡義。殺首逆屯。般於議  
事堂前。因閉諸城門。各以禁兵。平其內難。并誅逆黨陳陵等一百餘人。

大臣既誅逆黨。相與謀曰。天位惟難。神器至重。倘非大德。何以克堪。今嘉王天資明睿。器畧沉雄。卓冠群倫。非諸王比。人心咸屬。天意可知。卽日以乘輿。迎帝于嘉邸。西邸。一云。定議降宜民爲厲德侯。按一云。既誅逆黨。授宜民。命自盜。既誅宜民。往迎恭王名克昌。恭王固辭。乃迎帝于西邸。卽位。後帝聽議。恭王死。初八日。帝卽位于祥光殿。改元光順元年。大赦天下。贈內官陶表爵一資。并賜官田五畝。祭祀還妻子田產。以旌死節。正黎得寧罪。以得寧典兵不能衛社稷。乃擁兵助逆。戒不忠也。○帝既卽位。爲仁宗及太后發喪。辛未。告廟。升祔仁宗。癸酉。奉金冊。上仁宗尊號。曰欽文仁孝宣明皇帝。廟號仁宗。阮太后尊諡。曰宣慈仁懿昭肅皇太后。○是夜。天大雨。自春至此不雨。仁宗既升祔。乃雨。○秋七月。以生日爲崇天聖節。○旨揮內密官內密女內人官婢等。今後見有詔旨及宮內諸事。不得先私與外人及妻子親戚漏泄。

○旨揮五道諸衛軍各府鎮各軍總管總知等。凡有國家。必有武備。今聽依官頒陣圖於本衛土分。整飭隊伍。教以坐作擊刺之法。明其號令。金鼓之聲。使士卒諳習弓箭。不怠武備。○八月。旨揮出榜原陳氏。避着程姓字。○旨揮諸府路鎮州縣峒冊庄軍民諸色。係有貯粟數多。情願上進者。聽就該管官司呈報。修簿奏呈。從其多少。授之官爵。自二百石。許散職正七品官。一百五十石。許散職從七品官。一百石。許散職從八品官。其子並免選。若七十石。賞一資。止復其身。○九月二十一日。遣倍臣丁蘭、阮復、阮德翰。如明奉事。○冬十月初一日。遣倍臣阮日昇、潘維禎、阮似等。如明求封。○呈六月功。總督阮熾。同督丁列等。奏爲列番各官御營各軍。并先後倡義。斬叛逆臣屯、般等項姓名。一。先倡義。并先下手以下。黎仁順、斬逆陵。一。倡義以下。鄭鐸、阮德忠、黎煙、黎永長、黎逋、黎

解。一。預知以下。黎寶、黎厥中、黎仁貴至黎栗。凡四十九人。又呈阮助、阮言、黎師路凡六人。封功臣阮熾爲葵郡公。丁列爲麟郡公。太保禮山侯黎念爲太傅。祈郡公。黎壽域爲左都督。參議朝政。掌殿前司。阮耒爲大都督。掌刑部。覽來子汝黎康爲文振侯。○旨揮內外官。應得蔭充。而無所生男者。許養同姓親戚之子。止一人承蔭。○十一日。玉宰字與應天縣姆舍社孝悌人阮廉復其身。令本縣官。湊作門樓。掛張黃榜。○旨揮諸府路鎮州縣官。係在邊境。宜謹守關隘。不得通同化外。○給功臣三十員世業田。畝數各有差。黎凌田三百畝。黎念田二百畝。黎仁順田一百三十畝。黎壽域、黎師回、黎仁繪田一百五十畝。鄭文灑以下。田各有差。○勅宰臣黎幟等。奏升功臣各官見任。及薨歿有無賜國姓。及男子未陞除數。有賜國姓。則自太傅黎列男黎貫之、黎秘男黎文老等以下。至黎

練男黎紀。無賜國姓。則自阮熾男阮師回。至黎多美男黎弄。薨歿有賜國姓。則自黎悶男黎悶。黎孟男黎興。至黎汝撰男黎文良。無賜國姓。則自黎准男黎文鐵。至黎鐵男黎文麟。及熾等上奏。帝諭曰。覽奏具悉。有云。望乞許黎醴、黎受、杜祕、黎昂等。如功臣薨歿例。此言猶可辨。延寧年間。杜祕、黎醴位居絕席。任重乘鈞。黎昂、黎受身提禁旅。寄以安危。固宜肅清亂賦。變危爲安。可也。反駢首鷄於甕中。漏長鯨於網外。至後謀事不密。肆屍路傍。此秘、昂等罪之中。又別加一罪也。趙盾弑君。何異哉。安得並於中功臣薨歿乎。○二十四日。招魂。葬仁宗于永陵之右。曰穆陵。仍命中書省守中書令。知三館事。仍知學生御前二局。輕車尉阮直。中書省中書令。侍郎入侍。經筵兼管近侍。祗候各局。上騎都尉阮伯驥。同撰穆陵碑。○二十七日。旨揮刑官。今後對訟。每月二次呈決。永爲定制。

○十二月。命太傅黎列、太傅黎榴、太保黎凌領諸兵。分道擊琴。○選簿補軍伍。○攢造戶籍。○以阮如堵爲吏部尙書。○勅中書省令侍郎入侍經筵。兼管近侍祇候各局。上騎都尉阮伯驥。黃門侍郎兼國史院同修國史黃莘夫。校定廟諱并御名。

辛巳。二年。明年。順天。春正月。頒廟諱御名。廟諱凡九。顯祖諱汀。顯慈諱廓。宣祖諱曠。貞慈諱蒼。太祖諱利。恭慈諱陳。太宗諱龍。宣慈諱英。仁宗諱基。今上御名諱誠。光淑皇太后諱瑤。○二月。帝幸西京。拜謁山陵。○三月十一日。夜雷震承天門。十九日。帝及群臣。降服拜謝於承天殿。○旨揮府縣路鎮社官等。今後農務宜勸課。軍民各勤生業。以足衣食。不得棄本逐末。并托以販賣技術游足游手。其有田土者。不勤耕種。該管官司。捉呈論罪。○秋七月十一日。地震。○旨揮府路各處寺觀。係無原額。

不得擅造。○禁尊卑呼稱不得妄僭。○勅諭吏部官阮如堵、阮善等。去年汝受杜不沒屬托。爾奏乞爲北平衛總知。朝議誼騰。爾乃奏乞。不沒以總兵衛致事。其爲奸太甚。○八月初一日。皇長子鐸生。後爲憲宗。其母乃阮德忠第二女。初年選入宮。拜充儀。居永寧宮。後尊長樂皇太后。○冬十月二十一日。勅諭太保黎凌。先是。帝旣遣正掌阮耒。齎銀兩。賞賜黎凌。勅云。爾其謹終于始。惟清惟公。至是。又諭云。爾之氣岸大剛。色厲內荏。是以人有不足於已。卽推之於泉下。人有不逆於已。卽置之於膝上。物論未諧。非爲此歟。○帝諭都御史臺吳士連、沂仁壽曰。我新服厥政。惟新厥德。乃循我聖祖、神宗之舊典。而春首謁郊也。爾謂祖宗設郊。亦不足述。爾謂我國是古諸藩。是爾從死之道。無君之心。且厲德侯篡時。士連不爲激揚風憲乎。寵遇隆矣。仁壽不爲贊畫帷幄乎。位任極

矣。今厲德侯爲我失國。爾不能以祿死。反去事吾。縱我不言。爾心不愧死乎。真賣國奸臣也。○十一月。大赦天下。以前八月太子誕生故也。○冬十二月。頒大誥各條。自府至州縣庄。各一本。禁屬吏不得私開封簿牒。及不得支分執把。將回家并與外人傳抄。○以黎弄都督平章事。黎執中都督。鄭文灑都督參預朝政。掌殿前司武覽翰林院直學士。翰林院學士阮廷美。權禮儀院尙書。

壬午。三年。明年。順天。春正月。校定進表并拜牌儀註。從權禮儀院尙書阮廷美之奏也。○改院兒爲應差。○二月。倍大酺錢數。○十一日。明遣正使行人司行人劉秩來諭。祭于仁宗。○旨揮文武百官中都府路縣軍民之家。某有吳人奴婢。不得放行通同客使。○嚴禁拒斥銅錢。○三月。饒阮師回死罪。帝諭在朝諸臣曰。師回爲有中興之功。并父熾有大勳。

勞於開國之時。宜饒死罪。若鄭裡等。爾朝臣共議之。○勅諭左都督黎壽域曰。夫此妖詩。未必師回所撰也。疑似之間。將可誣矣。黎念阮未。鄭文洒之句。疑其可也。壽域謂凶暴。誠未至叛逆之指。安可恠爲師回。如中絕命。自天天之爾。可萌復仇之心乎。是時師回欲傾害黎念輩。自作一詩。棄之于道。使人流傳于轂輦之下。詩曰。人有二心。尤可疑。似來終竟好爲非。土邊有或真凶暴。水在西傍社稷危。人有二心。乃念字。黎念土在邊。有或乃酒字。鄭文洒也。師回作此詩。未及流傳。而姦情敗露。殺咸乞罪師回。故帝有此諭。以戒壽域等。○夏四月。定保結鄉試例。旨揮天下應試士人。不拘軍民諸色。期以今年八月上旬。就本監本道報名通身候鄉試場。中者送名禮儀院。至明年正月中旬。會試。聽本管官及本社社長。保結其人。實有德行者。方許上數應試。其不孝、不睦、不義、亂倫。



及教唆之類。雖有學問詞章。不許入試。其法。一。舉人通身脚色。并供出府縣社。年齒及治經。祖父脚色。不許詐冒。一。倡優之家。并逆黨僞官。有惡名者。其本身及子孫。並不得應試。若懷挾及借人代作。罪依律。一。鄉試法。先暗寫汰冗一科。自第壹場。四書經義共五道。第貳場。制詔表用古體四六。第參場。詩用唐律。賦用古體。騷選同三百字以上。第肆場。策一道。經史時務。中出題限一千字。國朝諱二字相連。並不得用。若散一字。亦許以他字代。寫圈外以行。○以黃清爲門下省。右司郎中。參知海西道軍民簿籍。騎都尉。時因雨雹風雷之變。詔求直言。清乃上疏。陳七事。一曰。順陰陽。以召和氣。二曰。親經筵。以崇正學。三曰。求儲嗣。以固國本。四曰。節財用。以需經費。五曰。重守職。以寄民牧。六曰。時訓練。以嚴武備。七曰。置屯田。以實邊儲。上采納之。○五月。旨揮五道官。係朝退未時

在本道視事。若空闕衙門。以降罷論。○六月。勅諭太傅阮熾等。爾本武人爲鎮撫。鎮撫字義。武夫所能乎。夫臧文仲尙蒙孔子竊位之誅。矧卿塞賢才之路。浚僥倖之源哉。○秋八月。殺太尉黎凌。以凌潛謀不軌故也。○九月。明遣正使翰林院侍讀學士錢溥。副使禮科給事中王豫。齎勅冊來封帝爲安南國王。司禮監太監柴昇。指揮僉事張俊。奉御張榮來。收買香料。○冬十月初六日。明使錢溥等。寓于使館。及還。帝齎禮物送之。溥等固辭不受。○旨揮天下。繼今文武任職官員。生年六十五歲。願致仕者。及吏典監生儒生生徒。年六十以上。欲還民者。並許本人投告。吏部類奏施行。○令天下內外各衙門。奏題等本。卽本員書名。不得借吏代書名。○十一月。遣使如明。黎公路謝致祭。陳盤奏事。裴祐謝冊封。○十二月。遣陪臣黎文顯。黃文午。謝子顛等。如明歲貢。并求賜冠服。

○初四日。立皇長子鎰爲皇太子。大赦天下。○是年。加太傅阮熾入內右相國。

癸未。四年。明年。順春正月。免會期。以前年有赦故也。○初定三年大比。二月。會試天下舉人。時應舉者四千四百餘名。取四十四人。十六日。殿試進士。命入內檢校。司徒平章事阮耒。入內都督。同平章事。知東道諸衛軍。國子監祭酒黎念。提調政事院參議政事阮復。監試。門下省左司左諫議大夫。知北道軍民簿籍兼翰林院承旨學士阮如堵。翰林院承旨學士。知東道軍民阮永賜。國子監祭酒阮伯驥。讀卷。上臨軒制策。咨以帝王治道。賜梁世榮等以下及第出身。有差。○聖旨。祈雨。致祭。用稅錢。○玉卮字與清池縣大右例社節婦阮氏蒲。黃榜旌表門閭。許免子孫一人給養。○二十二日。臚傳進士梁世榮等名。頒恩命。命禮官捧黃

榜。揭於東華門外。以示多士。○三月初二日。黃清卒。年五十三。清字直卿。時洪州梁如鵠有遺像。贊云。少結知於太祖。長信任於聖宗。體具而用周。子孝而臣忠。四朝歷事。一節始終。○旨揮。紛爭諸訟。已經理斷。不得強爭。○夏四月。禁內宮人女與外人結好。交通言語。更相交狎。○五月。禁田土強爭。理曲將賣世家。○旨揮。有假用別色。劍笠。以入皇城內者。俱處死。○秋七月。旱。帝避正殿。減膳徹樂。○地震。○冬十月。勅諭在朝諸臣。昨者阮復見春大旱。三月謂必有事。勸朕靜以觀變。兵以防身。朕不之聽。後果無事。然聖人觀乎天文。以察時變。觀乎人文。以化成天下。將不可以儆戒之哉。亦安可蓄疑以敗謀哉。○十二月。諭太傅阮熾等。宗社安危在卿數人矣。卿當思之深。計之熟。奏聞政事。朕力疾內決。卿等外承之。○旨揮。天下卜筮道釋之人。今後不得與內宮後庭。交通

言語。○勅諭吏部尙書阮如堵。刑部尙書陳封。兵部尙書阮永錫。戶部尙書阮居法。兵部尙書阮廷美。聞司馬光曰。君子進治之本。小人進亂之階。予與爾誓于天地。用君子去小人。日夜孜孜。爾其毋忽。○又諭宰臣及經筵等官。今黎景微、阮如堵、范瑜等。或廟堂議論。或政事得失。阿諛苟悅。緘默不言。雖有小過。實諸法可也。阮茂、阮永錫、阮鶯、阮善等。能憂君愛國。隨事盡言。雖有過失。在所寬恕。亦可也。昨者。阮茂言事不實。而不繩以法。是朕報阮茂能言之德。○勅諭禮部左侍郎梁如鶴。昨阮永禎不學國語詩體。作詩不入法。吾意爾知。故試問爾。爾皆不知。且吾見爾洪州國語詩集。失律尙多。意爾不知。吾便言之。武覽曾不欲吾與爾言矣。○勅諭都督阮師回。楊國明謂吳西將銀三十兩。付阮胡賂爾等。爾使爾妾受領。及前賂爾父熾五十兩。今轉賂爾共八十兩。尙在爾

家。爾豈不知乎。特遣司禮監阮益。將勅諭爾。及索取前送賂銀八十兩。領回。爾有過勿憚改。後必無災矣。又諭阮師回云。予俯徇輿情。誕登大寶。尙賴勳賢同心輔弼。四年于茲。爾父子一門。重圭疊綬。可謂盛矣。朕方爾信。雖有此書。終無損也。得此之後。爾心有不安。爾其可不深爲防身之術乎。時露屋上。有匿名之書。云師回將反。故帝諭之。○諭太保黎念云。昔我太祖開創大業。爾父臨東馳西。屢爲國捐身。逮太宗繼志述事。念爾父功。爾在弱齡。未能從政。仁宗委之宥府。出鎮雄藩。遂至變生肘腋。卿切圖回。白刃一揮。而奸邪授首。乘輿反正。而宗社奠安。然卿既立莫大之事功。當永守莫大之事業。上則我祖宗之業。益以光大。下則乃父子之功。日愈顯明。豈不快哉。

甲申五年。明年順春正月十七日。明英宗崩。二十二日。太子見濡卽位。

改元成化。是爲憲宗。○定厲祭牲禮物。○二月。幸西京。拜謁山陵。○勅諭掌刑部黎景微。爾歷任樞機。事蹟可紀。極諫敢言。指陳朕過。雖得失相半。而救弊濟時之方。忠君愛國之發。累旬連行。自今而後。謹察冤濫。摘伏邪頑。議論廟堂。灼照黑白。義之與比。勿事滑稽。大任重寄。朕尙須於卿一身耳。○夏六月。頒內外文武官每衙門印各一顆。○旨揮諸府路鎮州縣社。今後不得妄行自闕。○秋七月。賜阮薦子鸚鵡縣職。○貶兵部左侍郎阮廷美。帝諭之曰。器尙惟新。人當求舊。耆老儒臣。若爾之輩。尙幾人哉。而爾之犯。亦後吳士連、阮善之犯矣。法司持平。律當降罷。我便恰才。更命貶之。夫法者。國家之公器。與卿等共之。汝其思之哉。○八月。聖旨犯偷余珠。及私鑄銅錢。罪首從有差。○勅諭刑部左侍郎阮茂。爾孜孜奉國。善歸人君。不企於如晦、玄齡。至於戴胄處煩治劇。彥博

敷奏詳明。二子之中。亦有少長矣。爲臣以此可厚褒稱。可賜銀兩。頒至之日。爾益砥礪前心。期予于治。朕之過失。指陳直言。宜強董宣之項。勿隱蘇威之性。○冬十月。明遣正使尙寶寺卿蘇陵信。副使行人司行人邵震等來。告憲宗卽位。并賜冠服綵幣及勅諭。○十一月。遣使如明。范伯珪進香。黎友直、楊宗海、范慶庸賀卽位。黎宗榮、范瑠、陳文真謝賜綵幣。○十二月。禁外任官無故赴京。遞本聖旨。疑罪減等。○勅諭大臣百官等。昔我太祖。櫛風沐雨。以定天下。時則佐命勳臣。同其勞苦。恩義兼至。以故特賜國姓。用示殊眷。然爾子孫。傳襲日久。恐失原祖之姓。有乖教人以孝之道。今後功臣特賜國姓。止及其身。若子孫並依原姓。○太尉阮熾病。帝諭曰。昔朕藩邸。朱鷗逍遙。非心黃屋。卿等同心推戴。殄滅逆徒。朕躬御乾元。至茲五載。歌兒舞女。卿未及於宋石、高勞。心焦思。卿

愈切於唐房、杜、厥功。朕未酬報。彌病卿何連綿。卿當以國爲念。則醴粥不可不調。願卿當以朕爲憂。則藥石不可不瞑眩。爾師回乎。非親父哉。當盡爾之誠。竭爾之敬。古人之祈天祭鬼。可以道其災。卿其思之。○諭僉都御史阮善云。大和、延寧之間。上則宰相。下則百執。交相征利。賂遺多行。爾謂阮廷美小人。不可信任。予登大寶。五年于茲。廷美奔走服勤。罄竭心力。前則檢小。後則良善。果何傷乎。厲德侯時好奇貴異。阮如堵。陳封之北行也。鬻買千計。開闔百端。假令阮如堵。陳封之忠。誰所知乎。爾思而師之。○又諭阮善曰。爾爲吾臣。盡誠憂國。恪勤厥任。屢進嘉言。朕或震之以威。未嘗頓挫。雖事務未建明。奸回不彈劾。拔其梗槩。亦足褒嘉。特遣司禮監。賚勅往諭。賞賜銀兩。尙其勉之。○勅諭兵部尙書阮永錫。今楊國明。昔年常賂爾母銀子三十四兩。畧無證據。寧有誣詐。諭

到我自掩匿。許爾自新。又諭云。覽爾疏條。甚爲切當。唐之王、魏何以加焉。可賜銀十兩。用答忠誠。且爾之論。深契先儒之旨。朕嘉納焉。

乙酉。六年。明憲宗見。成化元年。春正月。勅諭都督阮師回。大獄之興。多捕權貴

家之子弟。爾將不熟思之乎。他說及恭王、黎念。慎勿與言。○旨揮掌詞訟等官。速擬定五刑。院大夫某。理詞訟。無冤濫。寫爲一項。平常爲一項。劣爲一項。奏呈。無冤濫褒賞。平常留任。劣除轉運。○定各鎮路文廟。春秋二丁祭。止十哲。從阮廷美之奏也。○二月。勅左都督黎壽域。選丁。帝諭曰。爾以撥亂良臣。特命爾選丁之事。將不盡誠。窒欲。使不孤子。委寄乎。○三月十六日。月食。既。○置六院。以親隨。進爲左右羽林軍。○造敬天殿。○夏四月。帝幸昌江。扈從賞一資。○定勾訟。□任令。入內大行遣左僕射參知政事掌內。□□黎景徽。奏一對諸訟事理。于到外任官。

輕則移該衙門。供稱明白繳報。若干重事。聽具奏方許勾對。○欽差復命令例。繼今各衙門官。奉命差幹事。畢回京。卽於通政使司遞本。仍就東華門外。候伺召對得旨。方可回家。○五月。旨揮禮部。出榜敦風化。○秋七月。撰造戶籍。其法並以六年爲率。期府縣州官。拘集社官。各將本社戶口。赴京對寫。○起造輿人女丁。○八月。遣皇太子入學。帝作詩示之。曰。至親盍不盡誠愛。便嬖剛腸繞指柔。楚國樊姬光婦德。長孫皇后有嘉謀。投床重使秦王恨。佯醉時知衛瓘憂。衆口咻咻聰耳聒。音括。謹聲也。何曾一見薛居州。時皇太后仁惠有餘。義斷不足。訓戒子孫。未嘗變容。或有鞭撻。尋復悲痛。帝憂鎗態漸至驕。故作此詩。以示之。○改都省堂。爲欽刑尙書。知詞訟事。爲左右侍郎。中書科改爲吏科。海科改爲戶科。東科改爲禮科。南科改爲兵科。西科改爲刑科。北科改爲工科。編科

改爲尙寶寺。各道行遣改爲宣政使司。○造謹德殿。○九月。勅旨。故意殺官象。定罪有差。○陳封出爲西道宣政使。帝諭在朝諸臣曰。陳謹爲陳封弟。謹得罪。朕問謹平日行藏於封。封便從此媒蘖。謂釀成其罪也。其短。傾而覆之。兄弟之情。幾乎覆矣。人倫攸斃。莫甚於此。倘能思蓋前愆。惟忠惟孝。吾亦跂足。待其後效。○聖旨諭諸鎮縣官。選取本衙門掾吏。有廉能達練優才。許奏置常川各一人。以便應務。時翰林院大學士權御史大夫陳盤奏曰。朝廷設官分職。所以爲民也。民告煩瑣。簿牒倥偬。官不能燭理。又置之吏。以檢文案焉。故曰。官無吏不行。吏無官不立。所以共行政事也。今臣竊慮。各衙門倥偬簿牒。罪累難免。伏望定例。今降諸縣路。各置常川掾吏一人。諳曉簿牒。頗能書算。以守文牒。如是則簿牒無遲滯之愆。民事免頒留之苦。帝從之。故定此例。○冬十月。禁倡優。不得

戲謔父母并官長。○帝遣使如明。陶雋、陶正己、黎的歲貢。○阮士興奏保樂州被擄掠事。○十一月大赦。以敬天、乾德二殿方成故也。○國子監祭酒兼文明殿大學士阮伯驥卒。先是伯驥以帝爲文頗畧經史。上疏爭之。帝諭曰。朕纔覽疏。悉謂其畧經史。而尙浮華無用之學。極意煙霞之表。縱如我誠好文。不本乎經史云。誰書也。予反求諸己。究諸言浮華無用四字之中。實已忠矣。予反爲文而辨之。予誠有過。爾當時諍之。勿以爲是介意也。至是卒。帝遣司禮監官范虎齋勅諭之云。爾事上也忠。持身也正。旦夕左右于茲六年。氣幾絕時。忠尙未已。○頒閱習水步陣圖法。其水陣圖法。則有中虛、常山蛇、滿天星、雁行、聯珠、魚隊、三才、橫七門、偃月等圖法。其步陣圖法。則有張箕、相擊、奇兵等圖法。又頒水陣軍令三十一條。象陣軍令二十二條。馬陣軍令二十七條。京衛步陣四

十二條。○帝又諭五道諸衛軍及府鎮各軍總管知等。凡有國家。必有武備。當於農隙之時。且停不急之務。係每月望日。入番點目。量割軍人守門廊店草屋草象等役。餘於一二日以前聽依官。頒圖陣於本衛士分。整飾隊伍。教以坐作進退之法。聽其號令金鼓之聲。使士卒諳習弓箭。不怠武備。至四日以後。始造雜役。若某官不能用心教戒。練習士卒。敢有雜擾。以貶罷論。

丙戌。七年。明成化二年。春正月。追徵賦稅。○二月八日。勅旨內外各衙門官員。坐事聽該管追取前給勅命。收回本科收照。黎仁噲奏。凡所降之職。自罷至徒流死罪。宜盡追收前所給勅命。帝從之。○置宣政使司參政參議主事推官。以范文顯爲欽刑院尙書。阮時達爲順化宣政使司。宣政使阮文質爲乂安宣政使司。參政黎仁噲爲司兵院入內少保尙書。

○西道宣政使陳封奏。係典賣田等文字。自陳、胡時。至吳時年間。並不  
得贖。若自順天元年以來聽贖。從之。○會試天下舉人。取二十七名。三  
月十二日。上御散天門。親策問。以帝王治天下。命崇進入內左都督兼  
太子少保黎景微。權政事院尙書兼謹德殿大學士太子賓客阮如堵。  
提調。翰林院大學士權御史臺都御史大夫陳盤。監試。翰林院承旨阮  
直。翰林院承旨權戶部右侍郎兼謹德殿大學士入侍經筵兼左春坊  
太子左諭德阮居道。翰林院學士行海西道宣政使司參知兼秘書監  
學士武永禎。讀卷。擢楊如珠等八名爲進士。阮仁浹等十九名爲同進  
士。三年一科自此始。二十六日。唱進士楊如珠等名。頒恩命。禮部捧黃  
榜。揭於東華門外。○習水陣於膠水。○閏三月初三日。賜進士楊如珠  
等榮歸。按單文禮進士題名碑記云。人材之於國家。其所關者大矣。粵

自唐虞三代。至漢唐宋。庠序學校之制立。而人材有所成。賓興科目之  
法行。而人材有所用。雖其治效純駁不同。然未嘗不以得人爲先務也。  
黎太祖平定區宇。教育英才。其博訪。則遺逸有求。其延攬。則學生有試。  
雖進士之科名未設。而斯文之氣脈已完。太宗肇基。自壬戌開科。群才  
入彀。仁宗三科繼舉。人文益彰。至聖宗癸未中興。一科取人。視前爲盛。  
然自壬戌。至癸未。或六年一舉。或五年一科。而三年一科。以是年丙戌  
爲始。凡預登進。號稱得人。爾後制度益詳。彌文大備。會試登科有錄。既  
足以表當代之盛明。題名刻石有碑。又足以示後來之廣勸焉。○夏四  
月。禁轉任官。不得新取公廨器用等物件。○初置五府六部。改六院置  
六寺。改欽刑院爲刑部。並爲吏、戶、禮、兵、刑、工等部尙書。○五月。太僕寺  
少卿行尙寶寺少卿黎廷俊奏。於五月六月。當農務。其常班役軍人。聽



留宿直。并守門、廊店、草屋、草象等役。其省院局百作諸色。留半在役。餘皆放回農務。從之。○賜左都督黎壽域銀二十兩。諭云。爾爲吾臣。七年于茲矣。但能建明本職當爲之事。未嘗言及吾動靜不中之節。因得此奏。吾甚褒之。特賜銀二十兩。以爲他日之期。豈有此一小事而賞哉。時壽域奏。一。文武官員不時宜召。並如傳宣中宮引入。若尋常出入禁門。如六科學士等職。卽許入。一。四方進象馬等物。並引入端明門外。帝覽請旨奏本。令卽開此兩條。特賞之。○考試各府訓導。勅旨訓導缺員。責令該司。選各堂監生及各衙門吏。會試中。一二三場。有行檢學問。自三十五歲以上。依前年例。考試肆場。合格方許。○六月。定文武服色。自一品至三品。着紅衣。四五品着綠衣。餘着青衣。○設立承宣十三道。曰清化、又安、順化、天長、南策、國威、北江、安邦、興化、宣光、太原、諒山、中都府。改

路爲府。改鎮爲州。改路安撫使爲知府。鎮撫爲同知府。轉運爲知縣。巡察爲縣丞。社官爲社長。頒知府印。停路安撫印。○申明避諱令。○秋七月。改伍正。伍長爲總旗。副伍長爲小總旗。改隊史爲軍吏。改工部各匠人。爲副伍長。○定奏本、題本體式。各該衙門。該奉聖旨。繳題施行等本。則曰題本。各衙門官吏百姓一切公私事務。理應陳奏。則曰奏本。○以僉都御史阮善。爲清華宣撫副使。諭曰。爾曩爲諫官。議論切直。今撫綏百姓。保障一方。當奉法憂民。懲忿望欲。爾其諄諄勉勉。無辱所職。○中書令秘書監學生梁如鵠等。奉擬。係各衙門寫本。如遇正官缺或公出。則佐貳官承掌本衙門印信。署名於年月下。○八月。裴榴奏。一。各衙門遷任之官。其在勘詞訟簿牒。未及交代。待至他日。再回交領。煩人迎送。致訟事阻滯。伏望係官員遷任之時。聽開本任簿牒詞訟。及各項事務。

付該當處據吏收執見新任官交付施行從之○九月勅旨羽林軍犯罪還民不得還官男○冬十月頒各部印○改左刑為清刑司郎中大夫右刑為慎刑司郎中大夫司刑為明祥刑停審刑官並置郎中置醫司訓科等屬○諭僉都御史陶雋曰大和延寧年間御史之職不出於外戚則出於權臣是以公論混淆馬鹿不辨國政之弊莫斯為甚又諭云陶雋違棄國例率意妄行今司風憲反輕易言語誠猾吏也

丁亥八年明成化三年春正月幸西京回天派江習陣大赦以自秋徂冬天

久不雨故也按赦文云上諭公侯文武官員百姓等朕以否德君臨兆

于懷苟不推在宥有難食之憂朕為民父母第疾○禁織造涼巾以盜剪

公私馬尾故也○勅旨朝參官帶牌扈從宜署扈從禁碯碯不得為煙

火之戲從戶部尚書陳封之奏也○勅旨鎮朔衛繼今大集軍期將終

該都承應三司每司二員就本衛把令放告并博念永蓬等經畧使所列校旗軍同來本衛習陣○十日命五府都督鄭文泗黎希葛等同兵部尚書阮永錫閱選五府諸衛大小總旗充殿前五衛軍禮科給事中汝文蘭奏小總旗九年以上方許充從之○十二日初擬春祭葆神禮無齊戒用帛依國俗而已○十六日行慶壽儀於勤政殿初每春首行葆神禮於太廟禮畢行慶壽禮至是始行慶壽禮於勤政堂是後率以為常○十八日以官員子孫前充金吾衛軍者試中充國子監監生若會試中場充三舍生中鄉試及有美質許本監官再類奏留讀書○拿監察御史管公添以梁世榮劾其容縱送賂人漢宗業也○二十七日帝始至藍京拜謁藍京陵二十九日駕駐□□行殿頒習陣圖法○二月丁酉朔日食○行□□□○八月甲辰帝以天久不雨奏告祈之□

大越史記全書 本紀卷之三  
○太保阮未等禱于五靈、弘佑等祠。○命戶部尚書陳封、同宣政官潘師宗等勘藍山鄉及靈村官土田功臣。自一品至六七品。有差。仍諭百官耆老曰。藍京乃帝鄉根本之地。非京師他處可比。比者勢家多撓禮法。慢視刑章。私占其地。以爲己有。諸王公主。曾無立錫之地。將欲繩之以法。孰若先之以禮。使皇族日蕃庶。有容身之地。今立定界限。敢有違犯。依律治罪。○九日乙巳。命行總兵屈打領兵征哀牢。初哀牢占居弄桐。侵掠邊境。至是。邊臣以其事聞。帝即命屈打領兵千餘人。往征之。以定勦衛同總兵阮洞爲副。并汧仁壽贊理軍務。會嘉興鎮守軍討之。帝謂仁壽曰。汝與屈打聽便宜行事。仁壽至東京。留守太保黎念。援兵于武庫而行。○諭留守官黎念。發官庫錢五十緡。令濟生堂買官藥。差人醫治國威、三帶等府人民之瘟疫者。并諭今後某府有疫癘者。聽本處

官用稅錢買藥治之。○十五日。駕至飛來行殿。時占國使臣沈樸勒沙來。進貢適至。因賜朝見於行殿。○十六日。安邦鎮守官奏明人載糧船。漂至本處。帝謂太師丁列、太保阮未曰。往者朕言監。執明國載糧之人。以彼或設此策。以誤我。欲阻彼之計。權一時之宜。非常行之道也。未等曰。縱彼妄行意外。設爲此策。我執之。彼以爲辭。不如放回。如其不然。恐生邊釁。帝曰。卿等言雖善矣。奈奸人反覆何。都御史阮居道曰。人臣所論。雖有同異。在人主斷之何如耳。竟留明人。不還。○二十日。習中虛陣于魯江。○帝幸天長承宣治所。問承宣官范瑜等民間疾苦。仍賜瑜及知府阮似等錢。各有差。命寧朔衛權總知陶院爲督將。代屈打征哀牢。打等至。哀牢先已遁走。打等飛奏言。哀牢乞伏其地。請班師。帝諭屈打。以陶院代領其衆。及賜錢十貫。○是月二十三日。習三才、七門陣于韋

江。西軍都督黎舌等違令。面縛詣營門。尋放之。○罷鎮殿副將軍黎漢庭等官職。初漢庭爲轉運。在職貪污。恐民告訴。奏乞養病。指揮使陶保薦之于朝。言轉運漢庭與太祝丞阮德素習兵法。漢庭等進陣圖。一日中虛。二曰滿天星。三曰常山蛇。帝嘉納之。乃拜二人爲鎮殿副將軍。令五府軍。以陣圖習之。再三不成。帝命二人教之。又不成。帝怒。拿杖罷回本貫。○二十六日。習魚隊。鴈行陣于安叱江。習常山陣于白鶴三岐江。○二十九日。大駕還京。○三月。吏部奏。考近侍學生。除各縣縣丞。國子監監生。及各衙門吏。除各府教職。從之。○下營繕員外郎黃文辨獄。罰錢五十貫。工部右侍郎鄭公且。罰錢三十貫。以暴露公用材木。故也。○令蠶桑各司。鑿池於講武亭。○命求故翰林承旨學士阮薦詩文遺藁。○命禮部尙書黎弘毓。宴占城使臣於北使館。命內官問占國使臣。以

事大之禮。對曰。占國之於聖朝。如子之恃父母。惟教命是聽。然天子所命。常貢之外。責以錫貢。是乃新例。不敢專對。伏乞遣使。問本國主。以光下國。不從。○奪西軍都督黎舌所管。以舌子伯達白日馳馬街市。縱奴毆人。故也。○以戶部尙書兼官師府太子賓客陳封。爲刑部尙書兼太子賓客。吏部尙書范文顯。爲中軍府都督同知。禮部尙書兼太常寺卿黎弘毓。爲西軍府都督同知。工部尙書裴括。爲東軍府都督僉事。刑部尙書范公毅。爲禮部尙書。御史臺副都御史兼勤政殿奉侍經筵。阮居道。爲御史臺都御史。權戶部尙書。知經筵事。天長承宣使范瑜。爲宣慰大使。權工部尙書。御史臺副都御史陳篤。爲官師府太子賓客兼御史臺都御史。翰林院大學士。權吏部左侍郎兼秘書監學士阮廷美。爲官師府大學士。權戶部左侍郎。翰林院大學士。權兵部左侍郎兼秘書監

學士陳盤。爲官師府賓客。權吏部左侍郎。太僕寺卿。行通政司通政使。黎忠。爲承德司承德大使。權戶部右侍郎。光祿寺卿兼秘書監學士。武永禎。爲翰林院大學士。權禮部右侍郎兼光祿寺卿。秘書監學士。知經筵事。大理寺卿阮寧。爲詹事行大理寺卿。右諭德。權吏部右侍郎潘維禎。爲宣慰使。權天長處承宣使。興化承宣使參議阮德輜。爲御史臺僉都御史。歸化府知府阮叔通。爲興化承宣使參議。○總官屈打。與通政司左丞沂仁壽等。招降哀牢賊道銅等。班師還。先是。官軍至嘉興。兼并土兵三百人。直抵馬江溝弄冊。半月程。□□□分遣嘉興衛總管黎勉領本衛軍。至丘□□□□□土兵聲言擊賊。擾兵。實則截其□□□□□之□□屈打使人諭以禍福利害。道銅等詣營門降。屈打乃令□州經畧車蠻。修完舊隘。與土官道琴蘿。督率土兵守備。打等班

師而還。是役也。往返纔十八日。經行之處。鷄犬不驚。獻俘之日。帝欲將賊衆。回本處誅之。以警其餘。太保丁列等對曰。道銅果於誠服來降。則待之不死。以勸後來。若迫於馳逐。以圖免死。誅之可也。詔監道銅於御前獄。○初。明人李茂實等二十九人。有船二雙。載米二百五斛。送廣東布政司。漂到安邦。巡司獲之。送詣行在。都御史阮居道。奏宜放回本國。帝不從。至是。以其米給本船人各一斛。充屯田司。其餘米令四城兵馬裝載。分行宜光、歸化、陀江等處。給會期軍人飢困者。○以御史臺僉都御史楊宗海。爲都給事中。權尙寶寺卿。○翰林院直學士權二科。給事中梁世榮。劾鎮殿將軍裴馴。奏畧曰。人之大倫有五。朋友、夫婦實居其一。今訓在妻喪。而納輩行子前已娶女爲妻。薄伉儷之恩。蔑綱常之道。事關風化。係是紊亂彝倫。送法司治罪。從之。○初。置五經博士。時監生

治詩書經者多。習禮記周易春秋者少。故置五經博士。專治一經。以授諸生。○羽林衛指揮使黎宗永。冒蔭調遷。宗永本嘉遠人。阮固子。而總管黎元養爲己子。以蔭調遷。爲權給事中。梁世榮所劾。帝奪其職。○蘇問塔刺國商舶貢物。○減省北平、通化二府諸州縣官。各一員。○遣北道監察御史潘宗薦。往北平。勘問鎮守官黎六、阮量等。仍執送回京。時明國鎮安府土人岑祖德。率其衆千餘人。駐于音洞。聲言捉逃賊岑望。因劫掠北平鎮、通農那蠻邊民牛畜而去。後再占居保樂州哩土蠻。祖德有奏云。蠻離、蠻戎等村。原係詐歸附鎮安府。劫掠人民牛畜。伏望聖恩差撥大軍。往征治戎、離等村。仍乞追通治農保樂二州。驅犯人岑望等回業。朝廷皆以爲祖德所言皆詐。帝特命中書修辭。直告布政司。還所掠人畜。及宗薦往勘問之。仍執阮量等回京。以守備不謹。致外人寇

邊也。○校尉黃輦以安西府土兵。與哀牢人戰于丘牢。死傷者三千餘人。獲賊馘。○索取明國人於蘇問塔刺國商舶。送還本國。○夏四月。初令吏部官。凡文武各職。白身初授。及降職。致職並許寫勘合頒給。○嘉興府順每州。送納琴同妻子家屬。及哀牢俘馘于京師。○頒五經官板于國子監。從秘書監學士武永禎之言也。○命權尙寶寺卿楊宗海、通政司左丞汧仁壽。教習驍勇兵馬等軍讀書。○都給事中鄭鐵長等。劾奏刑部杜宗男等。居官受賂。吏部阮如堵。保舉非人。並送法司。如律治罪。從之。○以阮復爲清化承宣參議。帝諭之曰。昔年遣爾北使康疆而歸。今年宜召爲進昌言。深可嘉也。今遣監丞阮耒。齎銀兩賞賜。以旌其忠。以盡其情。至可領也。○五月一日。北平府知州陶復禮奏。明國鎮安府土官。令宗紹侵鑽脫隘。奪本處田。及擅取牛畜。詔下朝臣議。以防之

之策。太師丁列等皆以爲宜固守封疆。無啓邊釁。見彼之來。拒之而已。○禮部尙書范公毅奏云。古者建國。因以爲姓。胙之士。而命之氏。契始封商。賜以子氏。稷始封邵。賜以姬氏。常胙土受封。以賜姓。命氏以立宗。自是而後。各有其姓。如虞舜姚氏。夏禹姒姓。周文姬姓。則九官三公五臣。十亂。皆有勳勞於國。未嘗見有賜姓。至漢高祖。以婁敬上建都之策。則賜姓劉氏。唐高祖。嘉世勳真純臣之節。則賜姓李氏。皆是駕馭豪傑之節。其源一開。流而爲弊。爲之臣者。亦幸以榮。殊不知姓有譜系。固不可混。賜之失所。係最大。以人臣而同國姓。則不敬。以人子而忘本族。則不孝。孰有不敬不孝而能濟事哉。宜革正之。凡人臣得賜國姓。並許改還祖父本姓。使澄天潢之宗派。明姓氏之本原。帝從之。○宣光鎮守副總兵黎饋奏。本鎮蒙當社被叱音人燒毀人家。殺掠人口。詔下朝臣議。

宰臣丁列等曰。邊遠蠻夷。自相攻擊。乃其俗耳。惟固守我疆。無啓邊釁。可也。○九日。雷震監門衛城上店。○十日。令五府軍。造戰器樣。既而又改別樣。軍人有咨嗟者。威雷衛軍人文慮上疏。其畧曰。臣竊見本年正月。陛下旣出新樣。遣諸將造戰器。今又改爲別樣。是政令之不常也。帝令吏部諭慮曰。戰器是同一樣。爾所言乃妄爾。侍郎梁加鵠。私謂慮曰。爾非言職。安敢妄論國事。慮曰。國以民爲本。而兵所以衛民也。今號令不信。軍民愁嘆。公乃近臣。緘默而不言。僕見而言。亦愛君之言也。如鵠等默然。○十三日。丁丑。吏部尙書阮如堵奏言。會試中二三場。充各衙門吏。今考試教職中格。宜除經歷等職。帝允其奏。○十四日。戊寅。以翰林院侍讀學士。行吏科都給事中鄭鐵長。爲翰林侍講學士。權工部右侍郎權國威等處。贊治承宣使司。參政楊執中。爲大理寺卿。權刑部左

侍郎翰林侍讀學士署院事兼兵科都給事中范瑁爲大僕寺卿權諒山等處贊治承宣參政。○二十日。賜大臣及職事官內宴于勤政殿。○勅諭諒山安邦北平等處鎮守副總兵士官等曰。朝廷守土之臣。固宜保境安民折衝禦侮。乃其職也。頃者外人侵入邊境。虜掠人畜。屢見馳奏。戰守之效。寂然無聞。今欲一一繩之以法。恐有不勝。爾等宜竭盡心力。思蓋前愆。仍頒科令十一條。○以汧仁壽爲尙寶寺卿。權吏科都給事中。○許諒山處權參政阮弼致事。○勅旨。今後任邊遠滿九年。始得別調京縣。○六月初一日。以大理寺卿黎伯達爲招討大使。行北平府知府僉知北平衛。○令十二承宣。勘管內山川險易古今事迹。畫圖詳註。送戶部作地理輿圖。○考試汰東宮侍講武原潛。謝彪于鳳儀堂。時原潛彪侍學東宮。帝幸東宮。問曩日義字何如。太子以原潛所授對。帝

乃命作制詔表三題。令原潛彪等試事于鳳儀堂。原潛等皆忘本事。三題並不成文理。帝覽之。批云可唾。仍讓吏部尙書阮如堵。東宮官陳封。都御史臺陳驚。以保舉原潛彪非人。○命都督僉事屈打領五府兵五百人。往安邦可勒堡。追討草賊。不及而還。○命權吏科都給事中汧仁壽。東道監察詔惟精。往安邦鎮可勒堡。按問將帥之逗遛與敗撓者。○罷西軍都督黎舌官職。以舌差隊差將巡邊。恐取脫州人銀子事發。故罷之。○賜兵部尙書阮永錫閑住。以永錫前年受人銀子。今委以兵曹之重。安爲總知奏請俸。故收所懸帶牌。與之閑住。○命六部六寺六科。選本吏識字有行檢各二人。以備體訪軍民疾苦及政事得失。○黎伯壽爲兵部尙書。○流北平鎮守副總兵黎六。同總知阮量於遠州。以守本鎮爲寇賊所燒。關隘事發故也。免居作。○令內外倉粟許該官責令



所司常加檢看。勿致雨水滲沲。音移。陵虧損糧儲。○令各州府縣貳官。公堂視事。不得與正官正席坐。○秋七月。帝以天南皇帝之寶示宰臣。使之商議。權戶部尚書阮居道言。皇帝之寶。乃傳國之寶。但天南二字。若稍新異。不如順天承運之寶。極有含蓄意思。帝又諭群臣曰。向者。傳國之寶。再命秘書官梁如鵠等。考文獻通考。以製號爲皇帝受命之寶。宰臣各官。具本奏來。○帝欲觀國史。命內官就翰林院。密諭史官黎義。曰。昔房玄齡爲史官。唐太宗欲觀實錄。玄齡不與之觀。今爾與玄齡孰賢。義曰。玄武門之事。玄齡却不直書。唐太使之而後書。恐未爲賢。內官曰。帝欲觀光順元年至八年日曆。義曰。人君觀國史。固非美事。唐太玄齡所爲。而後世非之。內官曰。帝謂觀日曆。向者有過。得以倭改耳。義曰。陛下強爲善而已。何必觀史乎。內官諭之再三。義曰。聖主實能改過。社

稷無疆之福。此是不諫而諫。遂進日曆。帝觀畢。遂還史院。○議安邦鎮衛軍。以其地頗瘴癘。及有邊境阻遠。不應援故也。草賊犯安邦鎮。可勒堡。命西軍都督府僉事屈打。領五府軍一千人。并命親軍。殿前二司校尉二司軍人。討之。召太師丁列。太保阮耒。黎念。五府鄭文酒。入嘉祐門。商議討草賊之方。仍命驍衛牒總知黎公儀。領五府軍往救。命南軍府都督同知阮德忠等。往監安邦討草賊。許前殺後奏。發官庫米三萬升。命中都府人。造糧運安鎮。以給軍食。○化州承宣使司參議鄧貼上疏。言興便五條。一曰。立堡守於思客。二曰。塞填海口。三曰。開連渠。四曰。罷源頭稅使。五曰。招流亾。耕墾布政荒田。○八月。欽差權吏科給事中汧仁壽。劾奏安邦鎮總兵黎悔。不能料敵。督將屈打。追討失利。致有敗衄。勅仁壽行勘問。仍執回京。○詔賜減田租人丁稅。有差。以戶部奏田禾

減失故也。○令父安承宣官。用官錢買稻粟。裝載赴京。時京都米價貴。父安稍賤故糴之。○以親衛總知阮勳。爲安邦鎮守副總兵兼承宣使。司承宣使。以翰林院侍讀學士。權御史臺副都御史陶雋。爲太僕寺卿。權安邦等處贊治承宣使司參政知本衛軍事。東軍府權都督鄭公路。自安邦回。上便宜疏四條。一曰。立萬寧新安營堡。以禦外侮。二曰。選置鄉長爲甲首以相統攝。三曰。擇有文武才幹。以爲鎮守官。四曰。塞關隘之路。勿使斬伐材木。開通道路。以致失險。○勅戶部。疏塞田間水道。勿使淹浸乾涸。○命戶部。移文各處承宣。勸某處勸農河堤司。有淹沒禾穀。及留廢田畝者。奏聞。○十五日。立石欄于散天殿陛。及起造小殿於講武庭。○十六日。以刻皇帝受命之寶。奏告太廟。是日。大風雨。○諭都督同知阮德忠。暫鎮安邦。遣總兵阮文談等。往安邦討賊。受阮德忠節。

制。○造軍實。每衛五所。二十隊。每隊二十人。依新例。○勅旨。恩命一品用制。武一品。文三品。用誥。武三四品。文四五品。用勅。餘並給勘合。○禮部侍郎梁如鵠。并阮廷美。以時和歲豐。民康物阜。上表勸進。○九月。小熟。○蝗。○欽差權吏科都給事中。汧仁壽等。解屈打。阮報。黎悔等。送京師。以討賊敗。卹故也。○暹羅國海舶。來雲屯庄。上進金葉表文。及獻方物。帝却不受。○勅諭安邦。諒山。宣光等處。鎮守各衛副總兵等官。爾等職爲西方控制。邊陲當備不虞。以防外禦。要令將校戒飭軍人。不可狃於故態。逃回留廢所守。違者罪加常律。○杖殿前。經歷高伯祥。流外州。以檢點官黎壽域。黎逋。范文獻等。監守軍人。充家役。放回取錢。而伯祥不能舉劾。故也。○命道士。禳蝗蟲。○命吏部。禮部等部。尙書阮如堵等。致祭各神。禳蝗。○二十日。颶風。南策。峽山。太平。建昌。海頻等府。海水大。

漲。堤坊決裂。禾穀浸淹。瀕海之民多饑死。又安、源頭、海瀕等。亦被水害。○勅各鎮守副總兵兼承宣使。但由武途出身。不曉文學。兼司兩職。恐妨軍政。今副總兵宜停兼承宣使。若承宣副。選文學官。其參政參議。當省一員。邊方有事。則總兵承宣。並得商議。從鎮殿將軍黎文之言也。○冬十月。哀牢呼籠乞內附。却之。○習武藝。定賞罰。各有差。徙安邦鎮守軍營。居排稟。○清化承宣使。進野繭成絲一筐。帝却之。勅旨各衙門。選儒吏出身。除各職。並詳所管從公察舉。各縣正官有缺。如無科目。許以中參場調除。○明安平州土官李璘。領兵八千馬三百疋。來侵下琅州。璘戰敗。退還本州。分兵守界。土首鎮守官陶院、黎伯達等。乞致書于璘。問其興兵之由。帝許之。○十六日。大臣百官。上表勸進。帝批云。皇帝之號。朕未敢言。皇上之稱。於群臣。嗣皇之稱。於太廟。亦足以別諸王之號。

若此之言。卿當擬定。數年後。如見天順於上。民安於下。雨若風調。大懷小畏。凡徽號。始可與謀。卿等其熟思之。○十九日。大臣文武百官。復上表勸進。曰。陛下既履至尊。宜稱皇帝。上不從。○瓜哇國使臣那盃等。來見。○十一月初五日。朝退。帝問大臣百官曰。都督屈打。前雖失律。刑部方案。朕欲以總兵呼之。使鎮守北平。可乎。太保阮未曰。生殺予奪。人君之權。非臣下敢論。然屈打奉命。前功不成。六科見劾。刑部方按問。且待獄成。如其無罪。用之可也。刑部尚書黎伯籌獨曰。屈打雖有罪。今從權用之。又何妨乎。帝從未言。其命遂寢。○勅旨宰臣錄囚日。有大理寺官囚人鳴冤。得便折辨。○以吏科給事中寧涓。兼教習功臣子弟及近侍學生。○命諫官陳鶩等。問掌詔獄都指揮使阮復。不能速勘致獄。多淹滯之罪。復進辨曰。如有淹滯者。黎文、文豐二訟而已。餘始送來未

經律限。帝不問。○十三日。召各衙門官中進士科黎廷俊、同秘書監梁世榮。三十員入鳳儀堂。帝命題試之。○召吏部尚書阮如堵復職。先是。如堵銓註不明。錦衣拿問失其職。至是。再許復職。○刑部尚書陳封等。鞠北平總兵黎悔。獄成。欲以軍令當之。以悔有功。遂以入議。請都御史陳鷺曰。悔既付法。司按問。宜從入議。所以不議者。惟惡逆耳。未聞失律而不議。帝諭之曰。軍法一而無二。鷺之所言。是岐而二。決非軍法之論。乃游說之語耳。宜以游說罪之。未幾。帝又諭鷺曰。朕詎爾。爲游說之客。朕失言也。嘉謀嘉猷。入告于內。庶乎甘霖歲旱。舟楫濟川。欽哉。○諭陳封曰。朕聞國之。不有賞罰。雖唐虞。不能以治天下。今吾重寄托于汝。汝惟勤成。敦懿四字而已。汝將不黽勉讀書。以識明哲保身之道乎。○命檢占人歸順戶口。及約束禁職官私奴婢等項人。○命東軍權右都

督鄭公路等。督五府軍。砌皇城。以皇城卑陋故也。○降北道等處承宣使黎公恪等各一等。以本處多蝗蟲。不能先奏。坐視民瘼也。○申明功臣子孫。還祖父姓。○待制楊如珠。以學業不進。出鴻臚寺丞。○十二月甲午日。冬祭。初稱曰孝孫國皇。國皇之號。自此始。○以行北軍都督僉事黎解。爲殿前司都檢點。兵部尚書黎伯壽。爲左檢點。○還西軍左都督黎舌職。初舌以犯賊失律罷。至是。帝以才可用。命頒前所收制命。還之。頒詔收制勅。自舌始。○勅玉籍秘書省奉行。○頒給都檢點黎解等制誥之命。並曰皇上。制誥之命曰皇上。自此始。○命朝臣。舉縣官職有剛直能觸邪者各一員。○吏部尚書阮如堵。以世家親識人阮世美等八人。應選。帝以爲皆新進常才。翌日。又命舉內任各職十員。太保黎念。舉梁世榮。都督鄭文泗。舉戶科給事中鄧淑教。尚書陳封。舉尚寶寺卿

楊宗海。各舉所知。帝覽其奏。多有以職而不稱職者。遂揀去梁世榮等姓名。止留教授阮仁隨。縣官丁逋剛。在選。仍批云。六部、六科、御史臺保非其人。受降罷罪。如得其人。必加重賞。命內官以示。庭臣莫不驚駭。帝之明察。○移刑部大理。出城外。諒山總兵黎練奏言。訪得明國廣西總兵。調大集兵馬一二萬。駐札在浯、潯等州。聲言脩治沿海谿澗林路。進□蠻賊於廉州。及廣西憑祥縣知縣李廣寧。詐謂猶□□□南□關不暇。調兵攻蠻賊。帝命□□□太保阮未等皆曰。宜固守關隘。任彼所□又□□□○試宏詞科點集。入試官。凡三十人。時知□院郎中武有。員外郎阮廷科五人。並辭□□□帝恠問詰其志□於賄賂。因諭在朝諸臣曰。刑嚴法劇。其勞有三。終日區區。垂頭喪氣。一也。□□□□□二也。訟案堆積。詳審難□三也。□□□勞人雖無病。足以致

疾。況有病乎。□議武有□許郎中阮詳、黎廷俊、知縣阮仁浹、陶舜舉。員外郎范如藍。奏使陳季暄。並入秘書監讀書。以中宏詞科故也。○召應試官范柰等二十員。入鳳儀堂。帝自命題試之。○九日。帝命史部尙書阮如堵。選內外各衙門。有仁恕明允者。類取姓名。代除刑部郎中員外范柰、譚文通等。時獄多冤濫。往往於公朝鳴訴。帝益厭之。故有是命。○勅停砌宮城。以屢奏不登。米價騰踊。故緩之。○免瀕海軍人明年大集。以八九月間。颶風大作。海水漲溢。瀕海民屋房漂沒故也。○賞秘書監官錢拾貫。而責梁世榮、杜欣等。以學業不進之罪。○以國子監教授阮仁隨。縣丞丁逋剛。監簿陶仁隨。知縣黎伯脩。明刑司員外郎陶郎種等。爲海西、東北、南等處監察御史。○命監察丁仁甫。詔惟精。分行海東、西、南三道。勘瀕海堤岸。令本處承司培築。○二十日。以陶舜舉。爲翰林

院待制入秘書監讀書。○寶璽成。命太師丁列。奏告太廟。南道監察御史程伯脩。上疏極言時政闕失。忤旨。出為北平府。原州知州。○帝以梁如鵠舉陳季暄非其人。詔繫獄。并收季暄勘合。○開決順化。蓮港并清化。又安各港。○是歲。斷天下死囚。三百二十三人。

戊子。九年。

明成化四年。

春正月。勅旨。官員任邊遠瘴地。某能撫字有方。催科不擾。而稅足。滿六年。許遷善地。若托疾。以避進稅多欠者。再除邊遠。滿六年。方許定奪。○三月。勅旨。各衙門。係公事首奏。許用本衙門印。若官員軍色等。奏本無有印信。並許通政使司。檢夾紙鈐縫。○諭都指揮阮復。爾比先為家臣之時。乃浮言曰。吾當為天子。爾天帝歟。鬼神歟。安先知之。且為輔導之官。便行僥倖之險。是爾不殺吾。而吾所不報也。然吾不負於爾。有六。而爾之負於吾。已十有一矣。爾是奸臣矣。是亂臣矣。是

賊臣矣。○夏四月。旱。勅諭公侯伯官員百姓等。凡九條。以表白良。范溥。為皇太子侍講。○六月。勅旨。禮部。議定民間諸文字格式。頒行天下。○定祈雨祈晴儀註。○秋七月。諭吏部尚書阮如堵。大和年。一刑部大夫二員。斷天下訟。多留滯。前年予置一刑三員。或四員。云何。今置一刑二員哉。爾吏部。速揀閑住在朝在外官員。剛柔相濟。才長鞠獄。置每刑員外三員。○八月。扈從藍京。帝與皇太子及祈郡公黎念。并從臣黎弘毓。杜潤。郭廷寶等。君臣賡歌。作英華孝治詩集。有擲地金聲之句。○十三日。諭吏部尚書阮如堵等。爾固請以教授為縣官。姦計生矣。教授當久厥任。以責人才之效。敢有遷移。其罪不小。○九月。勅旨。今後某申冤訴枉等。該衙門勘而無冤枉者。聽杖八十。罰錢五貫。○諭阮如堵等。觀陳封之為人。色厲內荏。易語輕言。至若諂事貴游。敗胡寔尾。胡額下懸肉。老狼有胡。進

則其胡退。德忠之痔。吮阮烟之癰。此封所以爲好官之長策也。先是。陳封早從。衆論糾阮德忠之非。晚往德忠家。更謝其過。德忠長樂皇后之父。烟乃后之舅也。封請婚於烟。庭拜終日。烟乃與之。○諭戶部尙書阮居道。昔予少時。爲爾所友。登大寶日。爾作經筵。以臣下而觀。則爾爲知己之友。學識之交矣。以君臣而觀。則爾爲魚水之緣。風雲之會矣。爾能盡心協力。勉圖報國。至公無私。杜塞賄賂。若是。則吾得爲知人之君。爾得爲盡忠之臣。顯親揚名。光于方冊。願不快哉。不能如是。則吾爲不知人之君。爾爲尸位之臣矣。二者惟爾擇其所從。○冬十月二十八日。帝諭在朝諸臣。觀陳封之乞贖犯罪。賊黎逋贖。是富者多賄而免殃。貧者無緣而得罪。敢違祖宗之法。立怙終而贖。是朝廷憐才之恩。敢作威福以害國也。大理寺按律治罪。○以范溥爲指揮。溥中突未科。

進士。三上奏章。願充武職。帝嘉志足有爲。故以不次除之。○十一月。遣使如明。楊文旦、范鑑、黃仁等歲貢。○謝種奏永安、萬寧等州被擄掠事。○勅諭御史陳鷲、阮文質等。爾奏謂內臣阮書、朱德大、楊明豐、吳閔、潘宗禎。俱以近習受賂。法司持平。罪當誅死。其何饒阮書罪。而潘宗禎不饒。公耶私耶。是不信於天下。朕聞阮武受賍。死甘心矣。朕今不殺。尙其他日改過。而得驅使。且潘宗禎爲內官賢假子。賢死肉未寒。烝賢之婦。奪爲己妾。前年又與宮女阮梅交狎。二罪俱重。死則宜矣。已丑。十年。明成化春閏二月。禁天下家藏兵器。帝諭文武百官等。朕嗣守洪業。于今有年。海宇謐寧。兵革不試。詔天下不得家藏兵器。申諭禁之。○勅旨。捕海賊。陞賞。○勅旨。官員有罪老還民。從刑部尙書陳封之奏也。○會試天下舉人。取二十名。○二十六日。上御敬天門。親策問。治

國取士。命太保平章軍國重事兼提調國子監黎念原。吏部尙書阮如堵。提調大理寺卿。權刑部右侍郎楊執中。監試翰林院承旨阮直。翰林院大學士署院事兼光祿寺卿。同知經筵事武永寧。翰林院直學士阮德貞。郭廷寶。讀卷。賜范播等進士出身。有差。○勅旨公侯伯。給制命。文武百官。二品給誥命。三品至五品。給勅命。龍箋。六七品。給勅命。黑爛。八品九品。給勘合。○三月。帝幸平灘。往征益蠻。○占城人。乘船航海。寇擾化州。○禁獄官科歛軍錢。先是。獄官常歛軍錢。買猪酒。托爲祭祀獄主。因飲食虧損軍錢。至是禁之。○夏四月。勅旨神武。游弩。神臂。羽林。天威等衛司。每上期番宿直者。並更班專習本藝。若五威衛及外衛銃弩各所。並停雜差量。定守把各處。餘皆專習本藝。班終考閱。如例賞罰。○定天下十二承宣府州縣社庄冊版圖。清華四府。十六縣。四州。又安九府。

二十七縣。二州。順化二府。七縣。四州。海陽四府。十八縣。山南十一府。四十二縣。山西六府。二十四縣。京北四府。十九縣。安邦一府。三縣。三州。宣光一府。二縣。五州。興化三府。四縣。十七州。諒山一縣。七州。寧朔一府。七縣。并奉天府二縣。○初九日。治指揮使潘師京罪。以師京所奏。紛紛雜冗。簧惑欺慢故也。○禁造賣粉白色笠。○五月。罷范溥指揮職。時溥與妻。同就徵人同桃家。適同桃已入官中。溥與妻伏地。羅拜同桃。夫武鄰。使同桃納已女子官中。以思固權位。帝諭在朝諸臣云。范溥國之賊臣爾。故罷之。○十二日。唱進士范播等名。頒恩命。授冠帶衣服。并賜宴于禮部。○秋七月十四日。帝諭吏部尙書阮如堵。爾再三乞管領黎卜爲總知。而卜有風疾。緩弱不堪。誠奸吏也。○九月。禁以僞錢換稅錢。○冬十一月十六日。大赦。改元。以明年爲洪德元年。○十八日。勅諭天下文



武官員及百姓等。朕惟人之所以異於禽獸者。以其有禮之爲防範也。苟或無禮。則肆情縱欲。放僻邪侈。無所不至。今後官吏諸色某。或遷陞除授。卽吏部劄示府縣社。責令社長。備狀端供。本員人年已及格。嫁娶遵行婚禮。方許奏聞陞除如例。若非人濫及名器。本員以墨徒。○十二月。勅旨府縣官。親行該內。相視田疇。禁市肆民間。賣水磨筮。朱漆筮。上諭天下官員百姓等。甲冑之屬。所以壯軍容。如水磨筮。朱漆筮。乃親軍所戴以宿衛。今市肆民間。多有發賣。宜禁止之。○以黎景耀爲戶部尙書。黎國禎爲父安鎮守副總兵。申仁忠爲翰林院侍讀。覃宗禮爲翰林院校理。丁叔通爲翰林院直學士。

庚寅。洪德元年。明成化六年。春正月。禁假造皮笠。選金吾衛武士。捕海賊。○勅旨。子居父母喪。妻居夫喪。當遵三年通制。不得徇情直行。悖禮逆法。

子居父母喪。而妻妾懷孕。以流罪罪之。妻居夫喪。而肆行淫亂。或喪未滿。釋服從吉。并先通嫁信。及娶之者。並以死罪罪之。若居喪服。出見戲場。縱觀不避。以流罪論。如有貪材好色。而娶惡逆之妻妾及蠻人。烝亾兄弟妻妾。并爲官吏而受賂。抵罪。○二月。選補軍伍。○勅旨。漏籍人自十歲以上。壯者充軍。戶內有父子兄弟三丁。不在充數。○定選壯健替補令。從都清華鎮守副總兵兼清華等處承宣使司阮德忠之奏也。○勅諭。數奸臣阮復罪。凡十二條。時復爲錦衣衛都指揮使也。○幸西京。帝曰。前年吾往福光堂洞滂。田水淺。不可種禾。今年多水。夏禾極目。口占一絕云。萬頃青青是夏田。齊民當以食爲天。村頭三兩農夫到。皆謂今年勝昔年。時帝謁洞滂福光堂也。○三月。定厠人勢家給帖。公同買物令。從奉天府權知府阮宗西之奏也。○禁非僧類。不得剃髮。○夏四

月。帝親製道庵千字。其略曰。乾健至剛。坤順無疆。辟兼智勇。邦俾熾昌。配擇妃匹。懿媿任姜。○饒水軍衛指揮使陶保罪。上謂朝臣曰。陶保是前吳人。屠城之後。爲黎察家奴。及收沒黎察。賜平原府爲奴。今又拒違勅旨。故違軍令。罪當死。然陶保曾爲藩邸犬馬。特饒死。徒種田兵。○五月。帝諭在朝諸臣云。小人兩事。阮廷美畧已行之。其固權則奏云。將士樂起土木。其賣直則奏云。朝廷臣懷疾妬心。而請一月三次奏事。日者廷美已曾試於朕。今廷美尙爲三品之貴。朝廷猶崇信之。應以小人廷美。居從四品之職。足以明朝廷堅譏說疾儉壬之意也。庶幾他日有如廷美者。猶思改心易慮。而遷於無過之地。○秋七月初三日。明皇子祐權生。即明孝宗也。○八月。占城國王槃羅茶全。親率水步象馬十餘萬。襲化州。化州守邊將范文顯等戰不敵。驅民入城。飛書告急。○九月。勅黃

丁十二歲。已選取充軍。改爲十五歲以上。開爲男子大項。從阮日升之奏也。○勅官員男孫。歲小。身才大。猶隱避不呈。送本身充本府軍。厥父罷職。○勅諭天長府承宣使曰。制亂莫先用武。強兵固在足糧。勅至。爾等增徵軍色吏員生徒等項。每人米十五筒。黃丁老人米十二筒。責所收。又蒸爲熟米。勿淹時日。遞納使司。該官起造草舍。驗實量入。具本奏聞。敢有逋逃。定爲斬首。○冬十月。遣使如明。○阮廷美奏占城騷擾邊事。郭廷寶奏偷余珍珠。及地方侵掠事。○十一月。校定行兵政令五十二條。○定駕行禁浮言假詐令。○六日。帝下詔親征占城。先是占城尸耐人槃羅茶悅。以乳母子。殺其主賁田。而奪其國。傳弟茶全。爲人凶暴淫政。慢神虐民。占人民叛。茶全不之恤。方且侮慢自賢。不修職貢。凌辱朝使。侵擾邊氓。誣詐明人。求援入寇。帝乃徵精兵二十六萬。下詔親征。

詔曰。昔我太祖高皇帝。蕩平亂畧。肇造家邦。太宗文皇帝。敬天勤民。繼志述事。小懷大畏。內修外攘。裳卉髻椎。梯山航海。萬流仰德。八極傾風。蚩蠶占城。趨起兔窟。蜂蠶養而成毒。禽獸飽而忘恩。躑躅獨夫。徘徊小智。彰聞穢德。好忿無地之軀。包藏禍心。妄畫射天之策。我先皇。爰赫斯怒。惟懷永圖。□載遏音。大勳未集。仁廟踐極。種落實繁。憑古壘之狐丘。恃闡槃之蟻穴。惟狂罔念。稱伯父。而姪我皇。滅德作威。號天佛。而臣我越。惡積不可揜。言辱不可詳。呼侶會儔。敢逞狗偷之態。抵虛投隙。潛驅烏合之徒。攻劫化州。虔劉屯戍。滔天之逆。踰月而平。計已不行。謀之更拙。死期將至。足以滅身。眇視不明。發有逸口。計究辭遁。將叛辭慚。作狐媚於燕京。笙簧行譖人之計。萌蚕食於象郡。腹背陷受敵之危。求銅柱立於橫山。令漢兵下於犍道。薄言往愬。胡譖莫懲。更誣我以籍萬兵。將

併北朝之境宇。繼言我如天二日。自尊南國之帝皇。謂我奪金寶貢珍。謂我爭白花母象。視吾民甚輕於草芥。忍生沙蟲之心。指我國易取如奕棊。妄覓蓬莪之骨。觀其措言口舌。莫非傾人宗祧。若是。其幾無所不至。以致大明之疑慮。齋勅連年。奈茲醜虜之跳梁。蹈兇覆轍。何校滅耳。良限薰心。鴉時危巢。臣僕我朝。使蛙鳴底井。警咳我勅書。日長月增。雄唱雌和。與亂同事。謂暴無傷。流狗父猪母之腥膻。行篡弑。而移逋提之祚胤。動佛塔鬼祠之勞費。扇禍福。而滋荼全之蔓延。禁屠而困天民。止酒而匱神祀。男女盡驅於厮役。鰥寡久毒於剗焚。占氓則重賦慘刑。尸耐則高官好爵。臧獲我男婦。淵藪我逃亾。流民踏地而啣冤。闔境告天而無路。旅焚其次。播奸穴而冒化風。帝用不臧。逞凶殘而行政事。小人在位。大邦爲讐。內竊窺窬。外揚貢獻。借使狐鳴帝里。誠所甘心。豈期蟻

聚神州。竟將肆志。我弛則嘯群入寇。我張則掉尾乞怜。爲宗社讐。爲生民患。謂鞭長不及馬腹。謂風末不舉鴻毛。敢懷好亂之心。正犯必誅之。令豪傑聞之而切齒。忠義見之而傷心。原始反終。智小謀大。有典有則。造逆無□於國章。不威不懲。除暴孰分於夷服。朕仰體上天之道。近繼皇考之心。殄春秋九世之仇。定國家萬全之計。救兆姓倒懸之苦。安積年反道之邦。伐叛救民。聖哲以之而耀武。栽培傾覆。天地以之而爲心。蓋自古夷狄爲患國中。故聖王弧矢以威天下。九黎亂德。黃帝治兵。三苗不恭。大禹誓衆。雖用兵。乃聖人之不得已。而立法。使愚婦之所共知。霧小何蔽日明。榻邊豈容鼾睡。選斗量之飛將。募雲集之健兒。貔虎萬夫。舳艫千里。士百其勇。人一厥心。莫不扼腕爭先。持繩待試。請築鯨鯢之觀。思垂竹帛之功。師出有名。刑茲罔赦。朕指揮武節。號令神兵。肅將

明威。恭行天罰。風飛雲捲。樹蔽野之旌旗。日射星輝。揚摩空之斧鉞。易如解箴。有若摧枯。虜在目中。雷疾寧容於掩耳。師行席上。火炎立見於燎毛。直收一旦之功。思雪百王之耻。且爲民而除螟蟻。不以賊而遺子孫。小武帝之黠兵。大文王之闢土。於戲窮寇。割羊無血。可稽六月之師。南陔見豕負塗。不待七旬之格。布告天下。咸使聞知。○是日。命太師麟郡公征虜將軍丁列。太保祈郡公征虜將軍黎念。領東南北三府衛水軍先行。頒征占令二十四條于諸營。及錦衣、金吾、神武殿前各衛司。○七日辛巳。帝奏告太廟曰。臣小子無良。入承大統。惟懷安民保境。豈敢黷武窮兵。蚩蟲占城。窺窬狂寇。不畏天而苟保。與我國而爲仇。始則攻掠化州。圖爲奪我疆土。終則關聞明國。更謀壞我宗祧。以狗父猪母之污。作賊君盜國之逆。膏腴尸耐。刀機象郡。積惡滔天。包藏廣地。臣繹之

廟算質之民心。咸謂蛇豕之兇。生靈之患。正宜興兵問罪。懸首梟街。臣不得已。祇徇衆情。恭行天罰。甲兵大舉于外。威權不少假人。於本月初六日庚辰。分命征虜將軍麟郡公丁列。副將祈郡公黎念。領水軍十萬先行。十六日庚寅。臣督率水軍十五萬繼進。深入其他。不失其時。上以繼祖宗皇考赫怒之心。下以救千萬流民倒懸之苦。爲子孫計。珍祖宗讐。伏望列聖在天之靈。陰相默佑。俾陳師鞠旅。帖海恬風。兵揚熊虎之威。賊築鯨鯢之觀。妖氛頓掃。清廟告成。迄收平定之功。皆望聖神之助。臣謹具奏聞。○十六日。帝親率大軍繼進。命左都督黎希葛。右都督黎景徽等居守。是日。御駕發行。小雨北風。司天監謝克諧奏曰。雨爲潤軍雨。風從北方。爲和風。故御駕發行。有詩云。百萬師徒遠啓行。鼓蓬雨作潤軍聲。蓋紀其實也。命吏部尙書阮如堵。祀丁先皇祠。凡道經神祠。命

官致祭。祈軍也。○二十五日。是夜。杜濶侍御前。上語及道理二字。謂道者當然之事。明白易知。理者所以然之故。微妙難見。予嘗作此二詩。積日乃成。濶對曰。帝之理學。緝熙光明。於混然之中。有粲然之別。精微蘊奧。形諸聲詩。豈尋常學士經生。窺仰所及。上又語天文之學。詳指二十八宿。五星運行。皆有所犯。犯于某星。則某事應。帝之學博。槩見其端。○上覽占國地圖。改定山川名號。○十二月初三日。大駕發鐵山。賞按察使丁叔通、阮才等錢。有差。帝勅獎諭之曰。六師勝敗之事。任在將軍。一營利害之機。責歸按察。太師丁列輩。兵無紀律。事若兒戲。爾等能露章奏之。予惟嘉爾。賞賜官錢。可至而領也。○初七日。玉麻府土官琴麗來朝。進貢方物。蓋倣古者方岳之禮。○按察使丁叔通、范永裕、裴叔史、阮才等。奏議誣妄。召詣行在。詰以腐儒敗事之罪。免帽溺以辱之。○上諭

征虜將軍丁列、黎念等曰：「一舉兵機百端，兒戲失火，而傷死三十餘人，予心揆之，實爲少矣。」齋勅告諭，爾其思之。○十八日，水軍入占城。○定考課該內令：「一內外各衙門長官考課該內，詳勘歷任事跡，果能有心撫恤，人民愛慕，并管內逃亾數少，方稱職。若攬擾誅求，徇私生弊，并管內逃亾數多者，爲不稱職。」

辛卯二年明成化七年春正月初二日，上以大軍將臨敵境，時士卒尤宜閑習，於是詔順化軍出海以試舟師。上慮占國山川有未易知，乃命順化土酋阮武圖其險易以進。○初六日，旨揮罽遠生致占國俱低關吏蓬莪、沙沙孟藩酋琴績、順平藩酋道貳來朝，進獻方物。哀牢國使臣官平鎮守頭目郎儼等，各齎方物來獻。○帝親制平占策，頒諸營，策中有必勝之理者十，有可懼之事者三。上慮將士未曉令，旨揮阮世美譯爲國

語，以申諭之。○命監察御史黎伯夷發順化倉粟作帶殼米，轉漕行在。○二月初五日，茶全令弟尸耐及大臣六人將兵象五千人潛來近帝營。六日，帝密令左游擊將軍黎希葛、黃仁添及前鋒將軍黎勢、鄭文泗等將舟五百餘艘，精兵三萬，夜出厭坐海口，急渡海，潛入沙奇海門，立壘築城，截賊歸路，占人不之知。七日，帝親率舟師一千餘艘，精兵七十餘萬，出新厭，舊坐二海口，樹天子旌旗，鼓噪而進前，密令步兵將軍阮德忠率步兵潛行山脚，賊將望見御營，遂大潰，率相躡藉走入關，槃行至幕奴山，忽見希葛軍等已截歸路，倉惶失據，橫踰高山脚，人馬軍資，僵尸滿野。黎念、吳洪等縱兵擊之，斬大將一人，餘皆驚散。時帝至米芹，縱兵進擊，斬首三百餘級，生擒六十餘人。茶全聞弟敗走，乃大驚懼，遣其親信奉表乞降，帝亦遣使往來無間。二十七日，帝親率大軍，攻破尸

耐城。斬首百餘級。二十八日。帝進兵。圍關槃城。二十九日。直抵城下。圍之數重。三月初一日。關槃城陷。俘獲三萬餘人。斬首四萬餘級。生擒茶全。還班師。先是。諸營飛橋既成。茶全日送降款。上召黎厥中等謂曰。賊之鬪志已解。我之攻期既成。茶全今日乘城。一鼓可拔。予將發砲。恐彼知之。不如密約諸營。同時進討。乃徧諭將士。可急梯城。有頃。上遙見前驅營軍。已登城堞。乃連發砲。各三響以應之。又命內臣領神武軍。斫東門關以入。命同太監阮耽諭諸營將士曰。府庫財物。各宜封守。不得燒燔。占國茶全。生致轅門。不得戕殺。帝命指揮吳鴈。引降賊逋產訶摩至。且令陳列求降貨財器用。非我國所有。命尉杜環。歷指其名。有銀匣形如劍。上問是何物也。環對曰。占物。自古爲國主。必有此器。傳之子孫。訶摩乃茶全之伯父。順化軍生擒茶全。引至上前。俯伏而跪。譯問曰。爾占

主歟。對曰。是也。上曰。君乎。對曰。臣望見風采。已知其爲聖上矣。上曰。爾子幾人乎。對曰。臣之殘息。有十餘人。杜環曰。彼乞憐爲臣。願陛下待以不死。上曰。鋒鏑之下。恐爾遇害。幸能生致。實慰我心。乃命茶全出鎮殿司外小葺居之。左右扶去稍急。上曰。徐引去。彼乃一國主。豈可如是窘迫乎。初二日。上以關槃已破。卽詔班師。○上以茶全所乘船窄。不容妻妾。命擇二人與偕。餘至京師。盡還之。茶全妻乃責該之女。與女姪。皆其兄槃羅茶悅之妻。而茶全悉之。茶全既被擒。其將逋持持走至藩籠。據其地。稱占城主。持持得國五分之一。使使稱臣入貢。乃封爲王。帝又封華英。南蟠王。凡三國以霸縻之。○初七日。以占降人巴太。爲太占同知州。多水爲僉知州。上諭之曰。太占。古壘二國。舊爲我□□□於占國。今盡復之。特命汝等□□□有不從。私□後奏。十一日。命杜子□爲同

知州和□占國民□黎倚□爲古壘州知州知軍民。占□敢不悖亂□  
然後奏。○哀牢遣使來朝。□□□遣使朝乎京。適大駕啓行。乃自京  
行□□各行殿□駕□□不得進見。○鎮寧府土官□公等。□□來朝  
貢。順平州土官道貳等來朝。時駕回□□□道貳及其弟道童。與  
部黨百餘人。□□□□□樸峒知州道慮。亦將象牙土物來貢。  
蓋上旣平占城。威振絕域。故西方藩國。皆奔走先後爭來朝貢。○上令  
杜瓊。指黎壽域。謂茶全曰。殿前都督。擊關槃時。先登破城。乃此人也。茶  
全目之久焉。○付順化營軍貯糧。時阮文質。所漕糧皆熟米。上問曰。熟  
米可十年貯乎。文質對曰。大和年間。征占。熟米迨征益蠻時。經二十六  
年。尙可食也。上曰。好者乃爾。豈無紅腐耶。槃其近久。則十年全好矣。○  
十五日。上旣平占城。生致茶全。乃親制捷詔。命官齋致京師。布告天下。

○夏四月。駕駐乂安。初八日。上至飛來江上。見皇太后乘船。有太子隨  
侍。上馳輕舟而至。更服登舟。還天派行殿。占主茶全。以憂悸成疾。至是  
死。斬其首。焚其尸。投于江。載其首以行。又於船頭樹白旗。題曰占城元  
惡茶全之首。使天下知之。十一日。駕至土瓦行殿。上御于千秋船。旣而  
先于珥河之津。皇太子隨侍。扈從諸船纜數艘。上艤舟良久。發砲六響  
俟千秋船至。上乃還宮。○二十二日。獻俘于太廟。以所得占主茶全首。  
及俘獲賊馘訊醜。告藍京。○五月初一日。行賀捷禮。群臣黎念等。進賀  
捷表。○六月。以占城地。置爲廣南承宣及升華衛。置十二承宣按察。及  
置廣南三司。○秋七月。定頒降版圖書契體式。期以本年正月初十  
日爲始。此後或未奉行。准爲失格。從戶部尙書兼太子太保黎景徽之  
奏也。○宣准詞體式。○十日。遣太保戶部尙書兼太子太保黎景徽。齋



金冊。立皇第五子鑽。爲建王。○八月。定提刑職掌。提刑御史朝參立班。必如該道御史。若提察刑部、大理寺、檢諸五刑獄。如順天大寶事例。非是新設刑部尙書以下。及大理寺。并獄官不法。出入人罪。量宜糾劾。罪人冤枉。亦宜伸雪。錦衣衛詔獄。及殿前司獄。儻有枉屈慘害。宜奏聞。日親至檢問。○九月。勅旨。係原有官奴婢等人。僞官僞吏土官。拒敵出城。投拜吳父京母姦穴逆黨。及哀牢、狗獾、占城等項。一切係官奴婢。已補各色役而中罪。襤褸變易姓名。爲民人及嫁娶。別縣社。其生男女、孫姪、姓名、正身。就珠林院閱選。○二十六日。校定皇朝官制。上諭文武官員百姓等。今之士字版章。視之昔時。大相逕庭。不得不躬制作之權。盡變通之道。內而軍衛之衆。則五府分掌之。機務之繁。則六部參綜之。禁兵守禦三司。以備爪牙心膂。六科審駁百司。六寺承行庶務。通政使司

以宣上德。達下情。御史憲察。以糾官邪。灼民隱。外而十三承司。與總兵方面都司。守禦控制。要衝府州縣。以親民堡所關。以備禦。聯常事體。互相維持。故徵發督府事也。體統必關兵部。出納戶部職也。幫支必與戶科。吏部銓叙非才。吏科得以駁正。禮部儀制失序。禮科得以封彈。刑科論刑部審讞之乖宜。工科檢工部課程之勤怠。至如各五府軍需簿額。填委之多。將帥偏裨選擢官。二音。也。之別。經歷首領得以稽考糾察之。前制建官。多以品崇爵侈。今制建官。總是祿省秩卑。官設與前頗增。祿費與前相准。食既無冗。責實有歸。使大小相維。輕重相制。威權不假。國是難搖。有道揆法守之風。無悖義犯刑之過。以成我聖祖、神宗之志。而保治安於無究。非作聰明亂舊章。而箝天下之議也。繼今爲我子孫。當知此制之行。出於不得已。法式一定。恪宜持循。勿恃一己之聰明。妄擬



前左右後。謂之効力四衛。前後左右衛。謂之神武四衛。羽林、宣忠、天威、水軍、神策、應天。謂之殿前六衛。在外各鎮。亦置府衛都司。江海各處。亦置巡檢江官諸承司。府縣州外任各衙門。莫不各置官以治之焉。○二十一日。遣使如明。裴日良、阮覽、黎仁等。歲貢。阮德貞、范穆等。奏占城襲邊事。○定人丁稅例。每人納錢八陌。○定桑洲稅錢。量畝一二三等。出錢。○勅旨。凡內文武職官。中官初任、試職。吏部具奏。頒給勘合。着冠帶。給俸三分之一。子孫止如百姓。至三年稱職無犯者。加陞授實職。不稱者。黜還前軍色等項。如有才能卓異之人。出自特恩者。不拘此例。未入流者。官雖正授。止給勘合。不給勅命。今後凡有勅旨。及大小諸例。該部使司府縣州諸衙門。並出榜掛張。使百姓欽遵奉行。○閏九月。定衣服補子制度。上諭之曰。朝廷乃禮樂之地。衣服爲章彩之文。名分截然。詎

宜爽越。故舜觀古人。以章施其五采。禹惡衣服。而致美乎黼冕。舜禹聖人。不以衣服爲末節。必於此乎存心。後世爲人君。爲人臣者。可不於此致謹乎。我國家撫安區夏。稽古禮文。上下章服。文禽武獸。古有制矣。貴賤等儀。不可踰僭。舊有禁矣。夫何有僚莫辨。視國家制度。爲虛文。庶民犯法。以紵絲織金。爲常服。爾官員百姓等。其聽朕言。文武職官章服。背一循定制。百日之內。不依制者。降級治罪。○置輿人女丁。○冬十月。頒花樣補子畫圖。凡禽獸色物。公侯伯駙馬。並畫一。文武正品畫一。從品畫二。風憲堂上官畫一。分司畫二。雲河山水花木等件。繁殺多少。隨意。制作不拘泥。青黃赤白金碧綠等。彩色官樣。從宜繡造。亦不必一槩。○線如雲河。如山水禽獸。用金線亦許。○改府縣。○禁奏本。不得糊塗。○十一月。勅諭山南承宣府縣等官曰。爾輩任隆方面。責重親民。不

能體朝廷惠養之仁。乃徒爲鞭撻簿書之末。今爾使司府縣等。宜速行管內。山澤海岸等地。可爲田。堤堰溝渠。勢可築決。及有虎狼爲害。豪橫教唆。風俗澆漓。生民疾苦。凡便之當興。害之當去。百日之內。謹續奏舉。怠慢過期。差錦衣衛士體訪。得便猶可興。害猶可除。而爾奏不及。府縣罷職。充廣南軍。承司官降職。○勅旨。祖父失職。子孫充本府軍。○勅旨。朔望大禮日。文武不著公服。止著常服。躲避門外。欠點充軍。○禁滯考課。帝諭云。考課之法。所以甄別賢否。振起治功。唐虞三載考績。行其黜陟。成周三歲計治。行其誅賞。今爾內外各衙門。在任職滿三年。急告該官無得留滯。若經百日內。不類送者。計所滯。每員罰錢拾貫。徇私容情。一體治罪。○是月。上命合總兵。宣召符勅。仍諭各衛總兵官。爾輩帥閫重任。藩維所寄。朝廷有宜。召拿問發兵。諸重事務。必降勅書內符。詳勘

合符。果無差忒。方可從命。如有勅無符。有符無勅。及公侯以下各衙門。移勾徵調等文書。並是奸詐。爾速留起本驛奏。擅自離任者。重死。輕流。○初八日。再征占城。擒其主茶遂及部黨。回京。○是年。以杜濶。郭廷寶。爲東閣校書。吳士連爲史官修撰。○以太保健陽伯黎景徽。掌六科。壬辰。三年。明成化八年。春正月。勅旨。係有實封奏本。許他簽白於奏本紙。○三月。令各衙門吏鄉試。中式。除正官。○火燒西門閣。○會試天下舉人。取黎俊彥等二十六人。其試法。第一場。四書八題。舉子自擇四題。以作文。論四題。孟四題。五經每經三題。舉子自擇一題。作文。惟春秋二題。併爲一題。作一文。第二場。則制。詔。表。各三題。第三場。詩賦各二題。賦用李白體。第四場。策問一道。其策題。以經書旨意之異同。歷代政事之得失。爲問。○夏四月初七日。上臨軒。親策問。以帝王理天下。帝命太保兵部

尚書兼太子太保、建陽伯黎景微。通章大夫左春坊左庶子兼吏部尚書陳騫二員。提調名缺二員。監試丁叔通、郭廷寶等五員。讀卷賜第一甲武傑、阮全安、王克述三人進士及第。第二甲武德康等七人進士出身。第三甲褚豐等十六人同進士出身。○定進士資格例。第一甲第一名。正六品八資。第二名。從六品七資。第三名。正七品六資。並賜進士及第。第二甲從七位五資。賜進士出身。第三甲正八品四資。賜同進士出身。入翰林院。加一級。除監察御史、知縣。以本品除。○五月。勅典吏有廉勤者。除貳官。○六月。以阮茂爲御史臺都御史。知詞訟。○秋八月。定丁祭。每年各府春秋二仲。上下行禮。○勅旨各處承宣承司使司府縣等官。培築堤路。○九月。勅旨申戒五府都督六部尚書等官。朝退各就本衙門。視理一切公務。該屬下僚。齊來承稟長官。不得自回。若下僚緩欠。長

官打點舉奏。○勅旨太僕寺卿。拷占蠻人等姓名。如占人姓新原依制。蠻人姓歸保依。一如重復。名止著三字。如蘇門、蘇沙門、如沙瓜、沙哇瓜之類。○冬十月。定護衛朝儀。凡將門每日進朝。先於端門外東西序立。朔望。卽於文明崇武門外。俟鼓三嚴發。進入丹墀。以序陳鎧仗。班次整肅如儀仗。敢有故違。至於失序。三嚴發之後。猶未整齊。錦衣、金吾。拿捉請罪。○置高尺令。田土每畝十高。每高十六尺五寸。○禁官員及百姓等。不得私藏占城人。○十一月。頒征蠻令十九條。○以陶學爲翰林知制誥。○十二月。勅諭太保建陽伯黎景微等。得安邦奏。謂明人奪兵。從廣西會勘官何多。爾史急差人體探事情。如見事勢頗異。卽移文各處。集兵防守。○勅旨文武百官。繼今進朝。如遇雨之日。補子、靴鞋穿着。綿麻布服。亦許從宜。至於天晴路乾。服飾一如舊例。○以陶雋爲兵部尚

書。范仁謙爲工科給事中。王師霸爲國子監教授。

大越史記本紀實錄卷之三終

大越史記本紀實錄卷之四

黎紀四

聖宗淳皇帝下

癸巳。洪德四年。明成化九年。春正月。帝親耕籍田。率群臣耕。○行郊禮。○禁酒色。勅旨官員及百姓等。繼今家非賓筵。不酬飲。妻非犯罪。不應出。敢有縱酒亂性。家道不齊。無媒妁之言。爲踰牆之態。抵罪。○二月。幸西京拜陵廟。帝乘輕舟。泝瀛江。拜謁西都城原廟。後至江表淳茂祠堂。其堂乃聖慈母皇太后吳氏鄉邑也。○二十日。寢陵有事。命工部尚書范瑜。往祭弘祐廟。日入。風雨大作。○三月。旱。祈于太廟。并命官遍禱于各神。二日雨。○夏四月三日。大雨。○勅旨。各衙門奏本用竹紙。○定內外任官祿制。簡。太簡。閑散。太閑散。錢例。各有差。別給錦金二衛俸例。○上諭太保建陽伯

黎景徽等曰。我尺山寸河。豈宜拋棄。爾宜堅辨。勿許漸侵。如他不從。尙可差官北使。詳其曲直。汝敢以太祖尺地寸土。跋賊罪顯。誅夷。疾趨也。○五月。禁衛兵擅行差撥。屯直空疎。○勅禮部。備榜百官及軍色人等。繼今係非。宿望鴻儒。年高德盛。不得妄呼先生。○六月。神璽裁成。下詔百官及百姓。各賜覃恩一資。○試教職。其試法。第壹場。四書各一題。五經各一題。第貳場。賦一題。李白體。第參場。制。詔。表各一題。○定御史臺。該道監察御史。該知。如清華。又安道。監察御史。該知。錦衣衛各司力士。更班舍人。五城兵馬司。儀衛司。錦衣衛副中軍府。清華。又安等處三司軍民。海陽。安邦道。監察御史。該知。神臂司。壯士。金吾衛副軍。神策四衛。東軍府。海陽。安邦等處三司軍民。山南。順化。廣南道。監察御史。該知。殿前司。六衛。南軍府。山南。順化。廣南等處三司軍民。三江。興化道。監察

御史。該知。効力四衛。馴象四衛。馬閑四衛。西軍府。三江。興化等處三司軍民。京北。諒山道。監察御史。該知。尙衣御用監。工部各匠。宣達局。應事局。屯田。蠶桑。精米。種菜。典牧各所司。北軍府。京北。諒山等處三司軍民。太原。宣光道。監察御史。該知。宣達局。侍衛局。奉直軍。太原。宣光等處三司軍民。○校定憲司職掌。憲察使。憲察副。職專陳言廉訪。糾劾勘理。審讞會同。檢驗詔刷。考課巡行等事務。凡三十二條。○秋七月。試醫。題凡四門。○九月。大雨。先是。春季三旬無雨。夏少雨。至是。雨下如注。達曉未晴。○勅旨。內外各衙門。一應公務奏章。該官詳審事例。情由。親自起草。付該吏寫畢。覆檢施行。○勅旨。刑部冊子。簽黃長依冊子。○定奏章失格事例。如字行高下。及點污之類。從翰林院侍讀兼東閣大學士申仁忠之奏也。○冬十一月。校定征蠻別令。凡十條。○勅旨。繼今百官進

朝。不得唾放美菑殘汁於丹墀門庭。○十二月。征山蠻。

甲午。五年。明成化十年。春三月。勅諭天下各處承宣府州縣等官曰。設律以

止奸詐。寧容玩律之流。置官以息訟端。反起賣官之弊。弗嚴禁戢。曷弭紛爭。繼今以後。承認田土。猶已經期。詐立狀詞。預著期內年月。不曾候勘。及前已容奸。雖按有供言。一付批。停不得勘理。該官敢受而爲理。感司糾劾。以流罪罪之。○加陳封少保御史臺都御史。上諭之曰。爾昔爲經筵甲。顏腹諾於阮陋。誠爲己羞。今爾爲御史。折磬足累於仁正。亦可爲耻。爾其可不洗滌不善之德。以收桑榆之功乎。○夏四月二十二日。勅旨。流罪囚人。近州充升華衛軍。外州充思義衛軍。遠州充懷仁衛軍。及饒死。又充懷仁衛軍。○五月十五日。定造籍買紙令。勅旨。攢造戶籍田土。該籍官隨分大小准當差人夫。每人參陌。買紙筆。呈承司照刷。○

六月十六日。勅旨。三舍生散居。該官懲治。犯過累犯者。舉奏充軍。○定激勸忠義令。一忠臣義士。如前朝黎輔陳。陳渴真。今朝陶表。該官府縣官。訪求他孫姪各一人。覈實備奏。授以散職。如無孫姪。方與親屬一人。饒其軍賦。俾奉香火。若副都御史阮維貞。如陣亡例。以示激勸。○閏六月十六日。殺何儼。帝諭太保祈郡公黎念等曰。何儼之死。三不幸焉。法未宜誅。遽遭枉死。何儼之不幸也。無心濫殺。自致污聲。朕之不幸也。時吏部尙書黃仁添。侍郎何儼。陳詢多以遠任官。轉補近便。以厲瘴。轉補膏腴。是故令武仁和。將黃仁添。何儼。陳詢等來問。朕感疾隨念。仁添未得問。而何儼卒死。是不幸也。○秋八月。詔願征山蠻者。十月發去。○九月十一日。勅旨。各衙門吏。擅回家。徒梏丁充軍。本衙門該官擅與罰錢拾貫。○再征山蠻。○冬十月。遣使如明。黎弘毓。阮敦復。吳雷等。歲貢。汧



仁壽、阮廷美等。奏占城潰亂擾邊事。○修治京城西邊牆。○哀牢貢方物。○是年。以鄭公且爲兵部尙書。王克述爲吏科給事中。武德康爲戶科給事中。陳槩爲刑科給事中。

乙未。六年。明成化十一年。春正月。明遣金吾衛指揮使郭景。來追捕逃亡。景至自洮江路。及景還。上命太傅祈郡公黎念。吏部尙書黃仁添。兵部尙書陶雋。翰林院侍讀兼東閣大學士申仁忠。東閣校書杜潤。郭廷寶。翰林院侍書武傑。及史官修撰吳士連。作詩。帝作序。以餞之。其序題曰天南洞主道庵序。○三日。會試天下舉人。時應舉三千二百人。取高燭等四十三人。是科試法。第一場。四書論三題。孟四題。中庸一題。總八題。士人自擇四題。作文不可缺。五經每經各三題。獨春秋二題。第二場。詩賦各一。詩用唐律。賦用李白。第三場。詔制表各一。第肆場。策問。其策題。則以

經史同異之旨。將帥韜鈴之蘊。爲問。○夏五月十一日。上御敬天殿。親策問。以古先君臣。命光進鎮國上將軍。駙馬都尉東軍都督府左都督。端武伯鄭公路。吏部尙書黃仁添。提調。太子少保。御史臺都御史陳封。兵科都給事中費伯康。監試。翰林院侍讀兼東閣大學士申仁忠。東閣校書杜潤。郭廷寶。讀卷。賜武滂昭。翁義達。高燭三人進士及第。范燦等十三人進士出身。杜榮等二十七人同進士出身。○二十八日。勅旨。各處群聚。盜劫所在。承宣府州縣官社村長。並如律治罪。○秋七月。洪水決蘇瀝江金鼓坊。○八月二十八日。試官員男孫。其試法。表一題。算一題。○冬十月。勅旨。各社造籍。一社男婦。同姓不得同名。如舊有著者。卽改別字。新舊不得重複。○十一月。選補軍伍。○定腹削規財令。係營造修理。托以營內。而腹削規財。以規財罪。罪之。○定試官罪。一千公事。以

有官議之。若干私事。以無官議之。○勅旨。天下修治堤防及道路等處。置勸農河堤等官。○明立皇子祐。愷爲皇太子。○勅旨。總兵官赴京。必降勅書內符。果無差感。方可從命。若有符無勅。有勅無符。而擅自離任者。重死輕流。○以黎景微爲太保。建陽侯黎希葛爲延河伯。褚豐爲提刑監察御史。

丙申。七年。明成化十二年。春二月。帝親幸學。命文臣分祭東西廡。○十六日。月食。既。○上幸藍京。二十二日。帝發自西京。乘輕舟。出靈長海口。作靈長海口詩。并叙其序云。看山玩水。所以寓仁智之樂也。海水之傍。皆有青山岌業。海口之時。山形尤異。山脚之洞。深入山中。寂不可測也。傳以爲龍口焉。龍口之外。別有一石。體形特奇。世傳以爲龍鼻焉。龍鼻之下。別有一石。圓美絕倫。世傳以爲領下之珠焉。石巨嶙峋。殊色多姿。或密或

疎。紛不可數。世傳爲龍鬚焉。帝捨舟登岸。進步山頭。逸興忽生。乃寫五十六字。以記之。○二十九日。勅諭東京留守太保建陽侯黎景微。延河伯黎希葛。及吏部尙書黃仁添等。三月初三日。大駕來自藍京。是日分軍。禁遏行人。在京護衛壯士。屯店謹嚴。根從上京。特諭卿等知之。○三月十六日。大赦。凡四十九條。○夏四月。旱。二十三日。祈于昊天上帝。以自冬迄夏。膏雨恒暘。民事艱難。工商無聊。農桑失望。無以臣之否德。遽令百姓以受殃。蚩蠢嗷嗷。殆無生理。此臣敢不叩閭。以伸哀念。以籲祗情。伏願赦過宥罪。轉災爲祥。大雨甘露。遠覃率土。臣謹願奏祈以聞。○六月初七日。勅諭二十條。○十日。勅旨。與人女丁。所生男女。每六歲。一遭閱選。

充入。率以為常。以翰林院侍書陶學為東閣校書。○十六日。詔捕恭王克昌。以克昌潛謀大逆。故也。至八月初六日。克昌病死。○秋七月二十七日。明遣正使禮部郎中樂章。副使行人張廷綱。齎勅書。來告立皇太子。并賜綵幣。○沂仁壽卒。○八月十六日。夜五更初刻。月食全分。○冬十月十五日。遣使如明。裴山王克述。褚豐。賀立皇太子。黎進。翁義達。謝賜綵幣。阮濟。奏占城地方事。

丁酉。八年。明成化十三年。春二月初三日。勅旨。禮部出榜。繼今護衛等官。除撰衛宿直如常例。外如祇受恩命。勅遣及拜見拜辭拜謝等日。並具常服及公服。如朝參官。官員例不得如前。用漆帽。襲服者。文武拜謝。並用公服。不得如前。用常朝服。○閏二月。勅旨。各衛衙門官。用花押字。欽遵奉行。○砌大羅城。○定常朝服。○勅旨。天下內外文武等官。繼今常參辭

見日。服圓領衣。一如頒降官樣。○三月十六日。翰林院承旨兼東閣大學士申仁忠等題奉查皇朝官制。崇文館有司訓典義。教習儒生。其公侯伯子男長孫。文武二三品長子。除授三四五六七八品。散官長子。間有年方少俊好學者。與入崇文館學生讀書。吏部銓除司訓典義。并文臣年高有學問者。兼行教習。每二年。教習官備奏。送禮部考試。暗寫本一場。經義一道。四書二道。中者除文官各職。若年長魯鈍。願習武藝。與之肄習錦衣衛。每日就西城較藝場。習弓矢手箭楯等藝。季冬本衛差官考校。每三年。該官備奏。送兵部如例考中者。除武尉各職。若病劣不堪。願回鄉貫者。備呈吏部。吏科等官。閱驗具奏。與帶職。回鄉閑住。○勅旨。從官應得入流子孫考試中。詩表及書算。許充秀林局儒生。及各衙門吏。如文武子孫試中例。○夏四月十八日。勅諭各處承應府縣官。尋

常民事。如早而不禱。潦不卽疏。利不卽興。害不卽禳。災異而不祈禱。以流罪。罪之。○秋九月初十日。上以鎮寧府金山縣。與外夷接境。鎮服宜求有力。詔吏部作急選。官員有才畧者。除知府知縣。○冬十月初六日。定考試隊長例。一應事。精米、典牧、種菜、屯田、蠶桑各局司所隊吏見缺。戶部考試。各局司所人。諳曉書算。中者充之。○定小江桑洲稅。○定分新市例。勅旨天下各處縣州社。生民日繁。欲分新市。得便貿易。卽府縣州官勘實。果便於民。起本備奏。從便會市。不拘有無舊額。○十一月二十日。帝遣兵部左侍郎陳中立。翰林院校討黎彥俊、潘貴等。如明歲貢。并飛報憑祥縣官李廣寧。龍州知州趙原等。卽應付接迎貢物。使臣以免阻留貢事。○定內外任祿制。按大典云。祿以詔功。任其輕重。皇宗功臣。雖無品限。猶有等威。內外任文武職官。事任不同。宜明勞逸。其或平

品兼官。許從繁給。卑職兼者。從所兼職。遞退至本品。隨繁簡定給。高職行者。從所行職。遞退至本品。隨繁簡定給。大率內任繁進一。次繁進二。簡退一。太簡退二。至五級。外任繁退一。次繁退二。簡退二。太簡退三。至五級。試官隨其繁簡。於旣進退之後。復退三級而給之。○十二月十五日。月食。旣。○二十一日。勅諭文武官。係非錦金二衛、神武殿前、効力、壯士等衛司親屬。托故饋遺。交通餽啜。求交好。及與之交好者。並拿下廷尉。其外臣與內臣交。斬罪。該官不能檢舉。以流罪罪之。○勅旨。護衛各司旗軍。未有帶牌。該衛官照。如護衛懸帶木牌。○定各衛門吏資格出身例。凡在內者。有出身各衛門吏。初充爲書吏。幹事三年。充達吏。又幹事三年。陞充典吏。又幹事二年。無過犯。陞充都吏。如在內無出身各衛門吏。初充爲通吏。幹事六年。陞充提吏。若在外。同在內無出身各衛門吏。

大清會典事例  
禮部  
卷之四  
聖宗下  
八

○定各府衙令史資格例。初充爲亞令史。幹事三年。陞充本府衙承令吏。又幹事三年。陞充有出身衙門都吏。○定封贈例。皇太后封三代。皇后三妃封二代。九嬪六職及女官一品。止封一代。其追封者。但加官爵號。止得一身。並無職俸及蔭例。文官員平日幹事遇事。亦許封贈。凡文武得旨賜封。命婦吏部具奏得旨。備將爵號職品奏聞。送司禮監。照例奉行。○定官員給田例。

戊戌九年。明成化十四年春二月二十三日。勅旨各處都承憲三司。許察部內官吏。或有廉污勤怠。及儒學官。教訓人才。遞年充貢。有無多少。俱以名聞。定行黜陟。○勅旨各處承宣府縣官等。相視田疇。勸民引水。及時播秧。○三月。會試天下舉人。取其合格黎寧等凡六十二人。黎寧。安樂。受。益。人。憲。之。祖。○夏五月十四日。上臨軒策試。問以帝王之理天下。閱其所對。止賜黎

廣志第一甲進士及第。第二名陳壁宏。黎寧。並第一甲進士及第。第三名廣志。奇華。神授人。仕至東閣。天本雲。葛人。阮迪心等九人。第二甲進士出身。阮猷等五十人。第三甲同進士出身。○秋八月。大水。○定藩酋朝賀例。每年之內。二次朝京。每年。正月。七月。各一次來朝。若有適已任情。廢棄朝禮。一次。罷職奪官。二次。拿來治罪。○九月初五日。定首領官署字例。一各衙門首領官。繼今奏本。及一切公務文書。並紙尾署字。不得與堂上官並列。○二十二日。帝下詔。征老嫗。○冬十一月二十日。定選除刑部各司官令。○勅旨刑部堂上官。從公詳審。各司官間。有由吏員出身。識官才卑。明白備奏。送吏部覆實。改除別任。更選進士及中場士人。曾經府縣州及首領等職。而有才識者。代除之。○定揀汰令三條。一。內外文職衙門堂上長官。各宜從公審詳。所該官員。間有庸劣。如諒山參議陳

大清會典事例  
禮部  
卷之四  
聖宗下  
八

惟馨。長慶府知府寧闢茸。富平府知府范操之類。及魯鈍鄙猥。不堪任者。閑住備奏。送吏部覈實。並勒致職。更選曾經任事。有器識練達者。代之。一。內外管軍各衙門堂上長官。宜從公詳審。所該衛所等官。間有疲劣。如阮致堯。杜有直。杜公爽之類。及闢茸鄙猥。無才幹不堪任者。閑住備奏。送吏部覈實。或改簡任。并勒致職者。更選曾經征戰。有器識幹事者。代之。一。各衙門長官。應揀汰者。宜公明無可好惡。使舉措之際。愜服衆心。若臧否失實。六科御史臺。憲司檢察。糾奏治罪。○十二月十六日夜。月有食之。○令諸軍習象陣于講武殿庭。○二十三日。始定婚姻嫁娶儀禮。其儀禮。凡娶妻。先使媒氏往來定議。然後定親禮。親禮既畢。然後議納聘。納聘既畢。然後擇日行親迎禮。明白見舅姑。三日見于祠堂。其儀序節文。遵如頒降奉行。不得如前。男家既行定聘禮。經三四

年。方許親迎。○定都試賞罰例。一。公侯伯及內外武官。有任管軍職者。並宜都試如法。每一試弓箭五枚。手箭四枚。鬪楯一道。自八中至十中。爲上級。六中至七中。爲中級。四中至五中。爲下級。賞各有差。若二中至三中者。無賞無罪。一中至不中者。罰錢亦無差。○鄭公吳爲戶部尙書。己亥。十年。明成化十五年春正月初九日。遷眞武各相出外。○二十六日。上御駕閱武。凡十六日。○令史官修撰吳士連撰大越史記全書十五卷。○二月二十日。上御駕觀西湖捕魚。○三月十日。勅旨。官員怠慢鄙猥。闕茸疲劣。功臣子孫。罷職還民。百姓子孫。罷職充軍。○夏五月。令收熟糧貯各處。承司倉內外各衙門吏。身糧每人。二十升。○六月初七日。帝下詔征益蠻。詔曰。天地陽舒陰慘。元氣膠輻乎兩間。帝王仁育義征。德威籠絡乎八表。易曰。弧矢以威天下。書曰。推亾固存。邦乃其昌。詩曰。共武

之服。以定王國。周禮曰。賊賢害民則伐之。負固不服則侵之。聖賢經世之言。古今一律。我國家混一區宇。統御華夷。虎落蛇鄉。景昭飲禮。文身雖耳。輿贊鞏琛。益賊琴公。介居裔服。聖祖海齊。存賀。之中。文皇。山納川藏。置季孟。革野性難馴。躡鬪豕虜。億。爲鬼爲賊。敢懷逆命之。如雷如電。薄致義師之伐。始則抱頭遠遁。喘息竄身。終焉掉尾乞憐。倉皇納土。朕憫一方之生聚。寬萬死之罪。僭置郡縣。而旬彼疆。易衣裳而縻我爵。頑冥木石。孤負乾坤。縱溪壑之貪饕。倒冠履之名分。恣殺戮則盜弄威柄。擅財利則販鬻民田。瀾剝門則毀其髮膚。逞禽行則淫於女媧。僚吏郊迎勅命。則高枕不行。關吏驛報公文。則閉門弗納。甚則養無聊之刺客。稔不逞之邪謀。行間諜而寄

觀國中。構虛辭而扇惑化外。麗開惡黨。則掩護而相容。韓召土酋。則拘留而不遣。悅德麟賣國。而結爲父子。忌耶竦委積。而戮及妻孥。烏合嘯。屢抗王官之泣邑。象恭方命。敢稽質子之來朝。內迷妖納之邪言。外倚老撾之聲援。制俠阮子儀數十餘輩。百端拮据而不恭。宗臣王文且二十餘人。一旦殺伐而靡憚。方且浚湟繕甲。伏莽屯兵。謂叢篁可以遁踪。狃作偷生之計。謂瘦狗可以逞毒。敢懷反噬之謀。彼葛伯殺一餉童。而商湯奮始征之旅。樓蘭劫一行介。而漢帝興問罪之師。况元惡琴公。伎心滋甚。齷粉我邑宰。魚肉我戍臣。怒人奚啻於填。數罪何多於擢髮。子陽背漢。妄懷蛙井之尊。元濟叛唐。難道鵝池之戮。前車歷歷。往法昭昭。特命太尉崇郡公黎壽域。端武侯鄭公路。延河伯黎希葛。掛將軍印授。以精銳二十萬。期以今年八月。分道進兵。聲罪致討。雲集熊羆之

士。鼓行蛇豕之區。衽席遐氓。鯨鯢凶黨。聲赫赫。靈濯濯。從天揚破竹之威。訊連連。馘安安。指日奏出車之捷。布告中外。咸使聞知。○定吏抄勅旨。令。繼今各衙門吏奉差勅旨。大事用大方紙。小事用小方紙。並用一張。不得釘冊。○秋七月二十二日。帝下詔親征哀牢。詔曰。古先帝王。制御夷狄。服則懷之以德。叛則震之以威。其於禁暴誅兇。殄邊鄙侵陵之患。革心欽化。全天地覆載之仁。故軒皇有涿鹿之師。周宣有淮夷之伐。是皆體乾坤闢闢之機。法陰陽舒慘之化。豈爲好大喜功。窮兵黷武之舉哉。我祖宗體天凝命。保境安民。仁育義征。資前裕後。比朕丕繩祖武。光御洪圖。洎中夏。撫外夷。廣大舜敷文之治。闡帝猷。開王志。迪周文關國之規。惟此老撾。界居西徼。當聖祖。扑狂吳之烈。既伺隙而襲我師。逮神武滅賊儼之軀。助惡而徂戎旅。惟君父之讐未殄。而戎狄之虐孔殷。

驕蹇萬端。侵陵百態。弟高皇。姪裕廟。自尊。胡異於井蛙。鈔良政。掠安西。扇毒愈滋於蜂蠆。蠶食岑上下之居園。鼠偷我邊疆之民隸。順平。沙盃。爲之驛驢。臨安。歸合。被其蹂躪。湯上湯下。我之邊邑。彼則攘奪而跳梁。道論道車。我之叛酋。彼則嘯呼而淵藪。彼之信使。我則厚遺而遣還。我之介臣。彼則拘囚而禁錮。以至琴公竄身之日。既翼卵而蔽姦。及琴公反噬之時。又籍兵而助暴。肉魚我宇宙。瓜豆我提封。侮慢自賢。講竹尤切張爲幻。音患豈疆場一時之患。實宗社萬世之讐。朕紹文武丕休。慨皇王遠畧。雪趙宋和戎之耻。弘天地生物以爲心。復齊襄死國之讐。法春秋行師而仗義。矧此蠻方之生聚。久汚撾狗之腥膻。欲還夷俗之綱常。合振威聲之孤矢。扛鼎揭旗之士。咸雲集於轂中。翹關超氣之才。舉星趨於麾下。廊廟議論。資其謀畫。山林遺隱。助其技能。人皆踴躍而揮戈。



孰不縹緲而指掌。試徵衆志。可卜人心。既於本月二十八日。特命將臣。分道進擊。征西將士黎壽域。出前鋒正道。節制游擊諸營。殄益賊之孝姪。先剪彼羽翼。據鎮寧之險地。再搗彼腹心。征夷將軍鄭公路。節制土兵諸營。從安西道入。以據其上流。鎮虜將軍黎廷彥。節制橫野諸營。由玉麻道行。以截其奔路。游騎副將軍黎弄。從順每州。所以討扼吭拊背。討賊副將軍黎仁孝等。由清都府。所以投隙攻瑕。要一鼓而破齊。必多謀而誤楚。彼如蜂屯蟻聚。守則左實右虛。彼若鷹散鵲驚。攻則勢分力弱。揆我謀之先定。知彼賊之成擒。今朕躬秉白旄。手持黃鉞。遏彼蠻。方羈前代不羈之寇。繼于祖考。集先王未集之勳。用恢萬世之永圖。盡雪百王之太耻。上際天。下蟠地。光昭武烈。皇皇西漸。海。南被河。丕闡輿圖。蕩蕩。布告天下。咸使聞知。○八月二十三日。命將臣。將兵十八萬。分五

道。伐哀益及老撾。大破之。駙馬都尉東軍都督府掌府事端武侯鄭公路。爲征夷將軍。掛將軍印。都督同知黎永。爲征夷副將軍。及總兵同知阮弄等。提領東軍明毅、廣武、玉鈴、英德、奮威等衛驍勇兵該二千。從安西道發去。進擊哀牢。游騎副將軍黎弄。及土兵參將丁世嶢。咸受節制。仍勅公路等云。今命爾輩。提熊虎之兵。勦犬羊之醜。驅馳諸將。震疊以威。掛將軍印。如或失機。驛聞行在。參副違令。檻送御營。衛總以下。斬首無疑。又勅記錄官阮如淵同矜等。上自將帥。下至丞徒。勤幹惰愚。敢有恇怯。一一詳記。以備奏聞。仍賜征夷將軍營。賞功小銀牌。付後行賞賜。有差。命征西將軍崇郡公黎壽域。將兵出征茶麟正道。節制游擊諸營。擊哀益。賜鎮虜將軍黎廷彥。節制橫野諸營。由玉麻道而行。以邀截其奔路。遊騎副將軍黎弄等。從順每州道。以扼其吭。討賊副將軍黎仁孝

等。由清都府路。以投其隙。公同五道。伐哀牢。大破之。入老撾城。獲寶物。其國王遁走。虜其民畧地。至長沙河界。夾徧國南邊。得徧文書捷還。○九月初一日。勅旨。五府都督。六部尙書官。朝退。長官及下僚。擅自回家。以降罪。罪之。○十三日。勅旨。凡造囑書及文契。以本村邑。自年三十歲以上。立爲文字證。見准用施行。敢有故違明令。誘求幼小之人。圖遂奸計者。以虛論。○冬十月十八日。大駕發行。征哀牢。是日駐營於扶烈。酉時失火。延燒天威火器庫於端門外。燒盡西邊神臂壯士殿前直廬。○十一月初六日。勅遣錦衣衛副斷事陳寶。都指揮僉事范仁敬。前往鎮寧府。便宜經畫。調度糧儲。陳寶與左右巡哨副將軍阮景清。選取左右巡哨二營。旗軍匠人。強壯志願者。每營定六百名。該一千二百。量取列營器械糧儲。前往征西將軍黎壽域營。詔問攻破老撾信息。及上流征

夷將軍鄭公路。下流鎮虜將軍黎廷彥等諸營聲息。遠近進止如何。得詳具奏。期以今月二十一日。至鄭榮行殿復命。并諭征西軍營。攻破老撾捷書。以爲益賊邀截脫失。將軍黎壽域等。從實具本。及開陣前得賊姓名。付陳寶順遞行在。初八日。車駕行至輪蒲。駐營四日。至二十二日。大駕發還。二十九日。欽差官錦衣衛副斷事陳寶。右巡哨副將軍阮景清等齎勅到於老撾土。上流三岐江。念總中州沙官處。○十二月二十八日。上還京。○再伐益蠻。遣將軍祈郡公黎念。掛將軍印。領兵三十萬。伐益蠻。以征西營。攻破老撾捷書。爲益賊邀截脫失故也。師入隘。琴公走死。焚其城。攻哨各城。焚其積聚。初益蠻有戶九萬。飢死殆盡。止存二千餘人。乃使人稱臣乞降。遂封其種琴冬。爲宜慰大使。乃置鎮守各縣官吏。以治之。後琴冬繼叛。○校定征占別令二十五條。并定行兵政

令賞功例。

庚子十一年。明成化十六年。春正月。大駕至自益蠻。○初十日。明憑祥知縣李廣寧。監執差人黃世恭。○汰免選。三月十五日。旨揮官員任瘴地。滿二考以上。稱職無過犯。吏部查實。調回善地。○勅旨。一考課之法。已有成例。所以別淑慝。示勸懲。今吏部及內外衙門官。宜如例奉行。使知攸勸。敢有如前因仍廢格。該科檢舉。如律治罪。○二十二日。酉時雨雹二刻。○汰軍色。○夏五月初六日。酉時有星隕自中天。歸東。○戶部尙書黎端之奉議。一各府縣官。賦稅雖定。而押作堤路不勤。趁農隙時未完。有妨收穫。臨考課時。不得實職。并陞級。以警尋常民務者。○六月。旱。○二十日。勅旨。刑官及各處承憲府縣。勘理獄訟。徇貨者多。從公者寡。或淹滯文案。經三四年。或上下衙門。互相推轉。變白爲黑。從僞爲真。奸詐百

端。莫能伸理。冤濫愁嘆。馴致旱乾。刑官及各處承憲府縣官朝臣。從公選汰。使皆得人。勘理。要歸至當。具本施行。○二十五日。北平總兵同知陳鏗。差列校陶夫渙。將旗軍六百名。往敢果地方。開通稅關。直抵班動處田。橫截樹棚。化外頭目羅傳等。將士兵來攻射。夫渙退軍還關。羅傳再率兵斷樹棚處。斥去燒毀。陳鏗以其事聞。上令司禮官以示朝臣。黎念曰。今再立棚。彼必再毀。無益於事。宜差官往勘。果是我田地。間在彼地。爲彼侵占。畫圖詳悉。回奏得實。預作咨文待令。今年遣使。付陪臣。將去呈廣西都司。辨其曲直。然後修棚。從之。○勅旨。官員進朝。至端門外。如遇雨日。暫於東西兩廊避雨。○勅旨。凡中場吏。除州縣正官。及經歷首領副使等職。若無中場吏。止除首領或州縣官。○秋八月。勅諭云。刑官重任。宜擇所長。刑部各司官。不問儒吏。如才識淺陋。不諳刑名者。本

部堂上官。揀汰備奏。送吏部。改除別職。仍選內外官。滿任二考以上。中  
科場有才識。及由吏員出身。曾歷刑名者。代除之。○二十七日。明有勅  
來云。近得雲南鎮守總兵等官奏。安南國王無故。動調兵馬。攻殺老撾  
地方。及今尙未退。又要征八百媳婦。合咨王如有前失。宜速退兵。如無。  
王須馳來奏聞。朝廷追究。妄報之人。寘之于法。是日。上令司禮監將出  
示朝臣。黎壽域等議奏。今東關十三人。投竄老撾邊地。因差頭目阮報  
等。就境上索取。止得公道車載還。不干攻殺老撾。并要征八百媳婦事。  
其本裏著空。仍委阮文質齎行。○兵部左侍郎陳中立。翰林院檢討黎  
俊彥。潘貴等。奉命往使。自明國還朝。順齎明帝勅回。上令吳文通。將出  
朝臣看勅。云。茲者陪臣陳中立等。奏官物。至廣西憑祥。龍州知縣李廣  
寧。知州趙原。不卽應付接遞。分與上下石兩州搬運。以致月久。被其阻

留。乞要今凡使臣來京國。先期移文總鎮等官。刻期到憑祥。遞送至龍  
州。及廣西宣府。如例打發啓行。使臣回付。委官送出。况村關外。庶無稽  
遲。○諒山都承憲三司。劉允直。阮悌等。一作劉允奏言。化外思陵州。透  
入祿平州。掠取祿平。黃蘆。馬入等家財物。及牛畜擅去。守備官黎廷漢  
不能關防。付錦衣拿問。朝臣黎壽域等曰。彼狂前習。常侵入俘掠我民。  
合令東閣。擬作諒山衛牒文。送思陵州。責以不能禁戢管內人民。妄啓  
邊釁。越境劫掠牛畜財物。要得追還。并擬撰勅。遣監察并閑住官各一  
員。同本處三司。詳勘黃蘆等。與彼前日有別。故曲直緣由。明白備呈。今  
年遣使東閣。再備前後劫掠事由。擬朝廷咨文。付使臣。順齎總鎮總督  
兩廣等官。勘管內思陵州。緣何率眾越境。劫掠啓釁生事。黎廷漢等。不  
能關防。致化外透入劫掠。如劉允直等所奏。拿問吏部。急選別官。代除。

○冬十一月十八日。遣陪臣阮文質、尹宏濬、武維敬、歲貢于明。并奏占城事。○十二月丁酉。上出翰林院侍書梁世榮所擬歲貢表文。示朝臣說來。黎壽域等曰。三文並以平順。如申仁忠等僉奏。上於郊邦辭命。先令翰林院官撰。次下東閣看。次朝臣看。如有異論。爲之改定。故明人每嘉之曰。國有人矣。三文者。一文呈化州頭目羅傳。排稅關之柵。一文呈憑祥縣知縣李廣寧。監執差人黃世恭。○發內府錢。頒與大臣百官。買絲織絹上納。以是年冬。當遣使聘北之期也。

辛丑。十二年。明成化十七年。春正月十九日。都給事中武夢康。上書言事。其畧有四。一。侵占人田土。及伐標拔碣。擅立界限者。應杖貶。若剗削田畔。止論罰錢。一。斬伐園墓竹木者。應杖貶。若耕破古人墳墓。並以流論。一。娶妻。合娶外人。不得相娶富貴親戚非類。違者以徒論。一。勘內外雜犯諸

訟。所在官司。依律限斷其曲直。不得推諉稽延。違者罰錢依令。○夏四月。會試天下舉人。取范敦禮等四十人。○二十七日。上御敬天殿。親策問以理數。賜范敦禮、劉興孝、阮允迪三人進士及第。吳文景等八人進士出身。阮明道等二十九人同進士出身。范敦禮字虞卿。新興御天縣人。屋金華清閣。登第時年二十七。鄉會廷試皆第一。世稱敦禮三元。○五月二十一日。召進士范敦禮等入丹墀內。上御敬天殿。鴻臚等官傳制唱。各吏部頒恩命。禮部官捧黃榜。鼓樂導引。出東華門外。掛張畢。馬廐司用良馬。送狀元歸第。○旨揮。一。在內。壯士、神武、効力、殿前五府、馬閑、馴象等衛司所。及在外各衛所。府州縣官。間有脫削士卒。漁蠶軍民。惟務肥家。不恤國法者。在內指揮提督。檢點都督堂上。及斷事經歷等官。在外承憲二司。各宜斷以公心。參諸劾論。前項冗濫。雖無實跡。祇所共知者。及有廉潔之人。不爲貪污之態。一體類

奏。送該道監察御史。審覈勘實。備奏區處。以示勸懲。○立屯田所。詔曰。屯田之置。所以盡農力。廣邦儲。其令各處屯田。定爲上中下三等。○六月二十日。揀汰官祿。凡官員繁多。廩祿浮費。六科宜查取。光順二年以來。官員曾犯受賂等贓。已議貶降等罪。及列校管押。施欠船板木條柴磚等物。隱歛軍錢。以致多欠。所納之物價。錢拾貫以上。而其人猶在官。勒致職者。以革冗官。以省廩祿。○二十一日。詔曰。內外臣僚。效尤黷貨。諒由言責未得其人。或姑息以爲能。或擊搏以招謗。官方污冗。民有嗟咨。召沴干和。弊所當革。自今科臺憲察等職。朝臣宜從公議選。孰堪汰出。孰堪代除。具本施行。以革前弊。○秋七月初四日。副都御史兼左春坊左中允郭廷寶。奏爲斥却便宜事。臣竊慮京師四方之本。財貨貿易販賣。必使之流通用足。豈宜匱乏。前奉天府民居。除本府籍人。間有雖

非本籍。而有庸舍稅額。並入本坊納稅差役。茲奉天府官。斥却不問。雜居無有庸舍稅額。一切斥回原籍。切恐京師之地。販賣稀少。無復繁麗之盛。非惟行商居賈之人。多於失業。而市肆恐至空虛。稅額或至欠缺。似爲不便。爲此陳奏。除雜居無類。應斥却外。其原有市肆庸舍。前續入稅額。且許居住販賣營生。許入本坊納稅。如例。○九月二十七日。勅旨。自今妃嬪官員。造別籍。○冬十月。勅旨。各衛所官。敢有如前于求要素。賧削財貨者。准錢五陌以上。法司如律治罪。外自四陌以下。一體罷職充軍。如貪冗官員例。○旨諭。凡六十五條。○選補軍伍。○考試官員男孫。屬文書算。○鑿海池。其池屈曲百里。池中有翠玉殿。池邊作講武殿。肄習揀練兵象。○以阮伯驥。爲吏部尙書。阮伯驥至靈人。壬寅十三年。明成化十八年。春正月。幸西京。○秋七月六日。勅旨。秀林局儒生

人數增多。教習少。吏部官撰擇翰林院官三員。堪兼秀林局司訓。具本銓除。以便教習。○定保舉承司官令。勅旨。各處承司官職任尤重。除選之際。宜得僉諧。繼今各處承司官見缺。吏部具奏。送下朝臣。如都憲二司例。保舉內外員。孰堪是職。送吏部施行。○十六日。以陶舉爲翰林院侍讀東閣校書。以舉奉扈從西征。勤幹無犯令。故陞之。○八月。赦天下六十三條。○造戶籍。嚴琳奏言。造戶籍時。社長詳註官員各職品高下。資爵多寡。如不詳註明白。戶科檢奏。府縣官及社長。一體治罪。○九月十五日。戊時。月蝕。○冬十月。考覈軍民書算。勅旨。檢考戶籍。及土田簿。自六科及吏部。秀林局儒生。同戶部吏。及承司吏。於報天寺會同館等處。同府縣檢考。○以黎寧爲戶部左侍郎。范興孝爲戶科給事中。

癸卯。十四年。明成化九年。春正月十三日。禁公讎卓面僭禮。十五日。禁飯板

放旗軍取錢。并通同商人。○作文廟大成殿。并東西廡。及更服殿。書板庫。祭器庫。明倫東西堂。○二月十五日。勅旨。民人軍色。鄉試中三場充生徒。四場充增廣生。如前例。若生徒曾經鄉試。遭不中場者充軍。中一場者還民差賦如例。增廣生會試。不中場者充軍。該承憲國子監官。類奏施行。如例。○夏四月十四日。勅旨。凡私鬪者。法司分首從議罪。○二十一日。勅旨。繼今六部有奏。題本一應公文事務。並於紙尾書名。如五府經歷。各處承司首領官。○五月十八日。勅旨。許馴象馬閑各所。正官帶牌。常進朝參。如五府正官例。○定鄉試入場日期。并貢士例。禮部尙書臨江伯黎弘毓等奏。勅旨。照各處承宣使司。士人多少。量日入場奉查。洪德五年。八月初五日。翰林侍讀兼東閣大學士申仁忠奏議。各處承司貢士例。海陽、山南、三江、京北等處。每處一百三十名。清華、父安等

處。每處六十名。順化、安邦、宣光、興化等處。每處三十名。若鄉試入場日期。未知攸當。臣等伏候聖訓。天下各處承司。及奉天府鄉試。以本年八月初八日。並入第一場。海陽、山南、三江、京北等處承司。以本月十八日。入第二場。二十五日。入第三場。九月初一日。入第四場。初七日。掛士人中式榜。清華、又安等處。以本月十五日。入第二場。二十二日。入第三場。二十六日。入第四場。九月初一日。掛士人中式榜。順化、安廣、興化、宣光、諒山、太原等處及奉天府。並以本月十三日。入第二場。十八日。入第三場。二十六日。入第四場。九月初一日。掛士人中式榜。○六月九日。大風雨洪水。○二十四日。定減省社長餘例令。○秋九月初二日。御史臺副都御史兼左春坊在中允郭廷寶奏。係犯罪。如惡逆背叛。盜劫受賂。教唆豪橫。淫奔貪墨。闖官陷人。故意殺人。係常赦所不原。外若雜犯。雖發

在赦後。而犯在赦前。一體在赦法。以廣聖恩。從之。○冬十一月十一日。遣黎德慶、阮忠、杜覲。歲貢于明。○十二日。勅旨。各衛司所作器械。就本衛司所武庫如例。不得擅在城外。麻宇軍店等處修作。違者流罪。○勅諭。翰林院承旨東閣大學士申仁忠。御史臺副都御史兼左春坊在中允郭廷寶奏。東閣校書杜潤。翰林院侍讀東閣校書陶學。翰林侍書覃文禮。纂脩天南餘暇集。親征記事。帝題大學士申仁忠天南餘暇集序。冀云。火鼠千端布。水蠶五色絲。更求無敵手。裁作袞龍衣。按東方朔神南荒之外。有火。其中皆生不盡之木。晝夜火燒。暴風雨不滅。火有鼠重百斤。毛長三寸。細如絲。可以作布。壬子年拾遺記有云。東海圓嶼山。有水蠶。長七寸。有鱗角。以蠶覆之。○以阮冲懋為翰林侍讀掌院事。有繭五色。絲織為衣。入水中不濡濕。○甲辰十五年。明成化。春正月十六日。太尉富國公黎壽域卒。○二月。赦諭。○會試天下舉人。取范智謙等四十四人。○三月初一日。勅旨。繼今



大越史記卷之四  
本紀實錄卷之四  
陶造銀穴。徵稅如例。○廷試策問。以趙宋用儒。賜阮光弼、阮珪、枚惟精等三名進士及第。吳文房等十六名進士出身。朱廷寶等二十五人同進士出身。○十日。申明抑買禁。勅旨云。抑買之禁。明令甚嚴。權豪之家。流習未革。厲民蠹政。莫此爲甚。繼今奉天府及各處承憲二司。再申明舊令。禁戢戒飭。凡供辨婚姻禮物諸家。如有賣買。市上民間。大小物貨。宜隨時價。不得如前。徂爲頑態。怙勢憑威。抑買攘奪。違者如前令治罪。○十二月。申明婦人落胎。及爲人落胎。前已有禁。係殘忍婦人。或欲其子息少。以專厚產。或憚於生育。圖免劬勞。覺見妊娠。用計墮落。傷殘性命。斃害彝倫。及爲人而落之者。並行檢察。如律治罪。然視爲文具。莫革前非。重習舊風。愈滋宿弊。玩法敗俗。莫此爲尤。今宜申明前令。嚴加戒飭。係有前項婦人。衆所共知。及其夫不能戒止者。並如律治罪。○夏四

月。初禁奸人倚法。擾金銀場。○禁天下。係非忌臘婚姻。恩命慶弔等禮。而無故相會宴飲者。如律治罪。○初九日。禁把門受奇錢。○二十一日。定投納諸額。承司度支官庫。不得如刁證令。○二十九日。定後葬不得遮障前葬令。先是。安邦等處。清刑憲察使司副使嚴光奏曰。官員與百姓。未有分別。是以愚冥細民。見有官者。以爲地道所致。乘有死亾。競葬前後左右。逼犯墳塋。見侵子孫。每以事由。投告有司。則例未分別。難於辨正。合無照職品之尊卑。定墓地之廣狹。至是。禮部尙書郭廷寶議云。天下官員百姓墓地間。有公私田土不同。以致私田作彼墓地。廣狹分數。當隨地勢向背之宜。後葬者不得挾以私田土之故。而逼犯遮障前葬者。敢有故違許。前葬子孫親屬。告所在官司。斥後葬移避。并追謝錢如律。上從之。○頒降賞功令。○禁府衛司等衙門。恃權挾貴。凌罵首領。

及圖思挾讐。妄行保汰者。○是月。定祈雨供應社人例。凡奉禱雨官。往神佛在某處許。湊附近社人。本處社人。用焚香糲。供應差官養僧士。每自十人。輪流更代。得便耕種。○十三日。定官書領降憲司檢刷令。時禮部尙書兼左春坊左中允郭廷寶奏。前遞年官書領降。在外各府。如四書、五經、登科錄、會試錄、玉堂文範、文獻通考、文選綱目。及諸醫書之類。間有貪冒府官。擅自固執。以爲己私。不曾交付學官。醫官殊甚非理。爲此陳奏。各處憲司檢刷。該內各府。前項諸書。而本府官。擅自固執。學書不與交付學官。醫書不與交付醫官者。其實糾奏。送刑部治罪。上從之。故有是令。○五月二十六日。勅旨。內外管軍民等中間。有廉潔者。亦有貪冗者。倘無旌別。何以勸懲。內則五府都督。外則都承憲三司堂上官。各官從公保舉。該內外衛府縣州官。廉潔者及貪冗者。各宜詳開實跡。

期送。勅旨。三箇月以裡。具本題文。送御史臺。覆審施行。區處。以示勸懲之方。以舒軍民之力。○二十七日。吏部尙書阮伯驥奏。官員緣事。刑部勘問。有干犯罪治。卽如欽奉進前勅命。勘合交還。吏部奏納。○六月十六日。定三舍生除用令。御史臺副都御史郭有嚴等奏。臣等竊見國子監三舍生。例准逐年會試中場者。中三場充上舍生。中二場充中舍生。中一場充下舍生。每舍一百名。并給季錢。三舍生每人九陌。及除用時。吏部及國子監官。保舉選除。如三舍生數。一體並同。殊無差別。合無三舍生季錢。下舍生宜減。上舍生宜增。一陌爲一貫。中舍生如前九陌。下舍生減一陌爲八陌。至除用時。吏部及國子監官。照缺保舉。上舍生三分。中舍生二分。下舍生一分。如此則三舍生。中場多少。優劣前後。等級適宜。而天下人才。咸知激勸。上從之。○秋八月初四日。定築田界。蓄水

令。勅旨。各處承應二司。府縣州等官。繼今某處該內。有破決防隄。秋田淹浸。勢可蓄水以作夏田。承應二司。責令府縣州河隄勸農等官。合於潦水稍退之時。預爲小民救飢之計。相視地勢。隨其便宜。督責鄉民。培築田界。要令蓄水以作夏田。不可遐棄職司。視常民瘼。坐視無策。以致阻飢者。○十五日。立我朝自太宗大寶三年壬戌科以來。進士題名等牌并記。上以太宗大寶三年以來。進士諸科。立石題名。猶爲闕典。命禮部尙書郭廷寶。詳具自太宗大寶三年壬戌科。仁宗大和六年戊辰科。光順四年癸未科。七年丙戌科。十年己丑科。洪德三年壬辰科。六年乙未科。九年戊戌科。十二年辛丑科。至本年甲辰科進士名次。勸于堅珉。郭廷寶。因請改狀元。榜眼。探花爲進士及第。正榜爲進士出身。附榜爲同進士出身。以合今制。上可其奏。命冬官。起工鑿石。詞臣翰林院承旨

東閣大學士申仁忠。翰林院侍讀兼東閣學士杜潤。翰林院侍讀東閣校書陶學。覃文禮。吳綸。翰林院侍書秀林局司訓阮敦厚。翰林院侍書兼崇文館秀林局司訓梁世榮。東閣校書黎俊彥。翰林院侍讀兼秀林局司訓阮冲慤等。分撰記文。中書監正字阮竦。蔡叔廉。典書潘裏等。奉勅書。金光門待詔蘇禔。奉勅篆。按杜潤記云。帝王政治之大。莫急於人材。國家制度之詳。必待夫後聖。蓋爲治而不本於人材。制作而不資於後聖。皆苟焉耳。烏足致治效風化之隆。文物典章之備哉。粵自太祖順天紀年。首飭學政。太宗大寶三祀。肇闢科。仁宗選賢任能。恪遵成憲。至於樹附一作大學碑。闕典未修。備物盡文。時若有待。今聖天啓中興。躬任斯道。隆儒一事。尤所惓惓。况乎列聖涵養之深。加以十年振作之力。向也六年一大比。今則酌從周制。定以三年矣。向也取士。率不過二三十

名。今廣覈寶才。不患數倍矣。以至崇獎作興。德意之厚。恩榮次第節目之詳。渾然粲然。度越古今。所以堅珉有刻。記實有文。置在賢關。用勸多士。皇王制作。猗歟休哉。然則黎朝文明之詳。科目之政。肇於順天。始於大寶。行於太和。而特盛於洪德也。向非聖上盡君師之責。親制作之權。安能成先志之未成。備前聖之未備耶。○九月初五日。勅旨。訓導間有同治一經。而生徒之習別經。不便講訓者。勅吏部勘實。卽行改調。選治別經者。相換銓除。○勅旨。軍色究無所出差輕務令。○二十九日。勅旨。凡寫造囑書文契。一體用陸路中紙。若一切文字。用官樣中紙。從細江縣知縣鄧見素之奏也。○冬十月十一日。勅旨。開國功臣子孫。係順天年間功臣。已受官職。或無賜字。一作姓。而曾預開創功臣。亦預順天年間有功。已受官一二品。其子孫猶在軍伍者。許本人投告。本處承憲二司。

備奏送兵部覈實。身材堪用者。充錦衣衛俊士。若劣弱不堪。許復其身。從太傅靖國公黎念之請也。○定投納檢收金銀錫鉛等稅例。○定構作親王公主府例。○定構作行殿。其殿五間二厦。廚房一連三間。觀耕臺一區在中。高五尺。闊四十尺。作先農壇一區。高七尺。濶三十六尺。座處四圍。土牆并行馬門。皆在清潭縣紅梅社。○作文廟大成殿。并東西廡。更服殿。書板祭器庫。明倫堂。東西講堂。東西碑室。三舍生學房。及諸門。四圍繚牆。○十二月。勅旨。繼今內外各衙門官見缺。奉令保選。某人常知某人。果有才識廉能。除授其職科臺等官。公同編紀。置簿詳明。後或鄙猥貪冗不堪。居官無狀。查照某官員。妄保非人。糾舉送問。○以黎廷彥爲西軍都督府左都督。清湘伯兼宗人府左宗人正。○以黎鑿爲駙馬都尉。雲陽伯。黎權爲中軍都督府左都督。涇陽伯。

乙巳十六年。明成化十一年。春正月十一日。定天下各府縣州等官。進入丁田租。及原頭議稅。敢有怠慢。不動徵收。以致拖欠。追錢償如令。十分。追官於本人七分。若飢寒困苦。村長端供共保。如前令施行。○二月十二日。勅旨。內外各衙門奏題等本。本官書名。不得使書寫吏代書。○三月。太傅靖國公黎念卒。○夏四月初十日。定廣南納稅令。先是。廣南無船。遞年軍民。扛稅物常被損失。繼今每至納稅期。許廣南承司。移開順化都承應三司。交付稅物。差人轉遞上納。○閏四月二十九日。定進朝從小僮令。其令大臣文武百官。繼今進朝。至大興門外。下轎馬。若公侯伯駙馬。隨從小僮二人。一品一人。入至琉璃橋外。即止。違者。守門官取過。糾舉送問。○秋七月十三日。勅旨。禮部備榜。一。五府各衛所官。朝退之時。各回本衙門。商議公務。不得如前。於鑾駕庫內廉外。會坐商議。一。

百官進朝。及猶在朝堂時。各衙門吏。隨行本官。至東長安。及南薰等門外。不得如前混入朱雀等門。若吏部六科。尚寶寺。度支。通政使司。并護衛等衙門吏。並不之禁。一朝退時。五府六部。東閣御史臺。六寺史官等衙門吏。將簿本檢看。八六科查問籍牒。並不之禁。○二十六日。定以赦前應赦事。相告發者罪。從提刑監察御史阮資輔之奏也。○二十七日。嚴考試免選令。勅旨。各處承應二司官。前年考試免選。多有懷挾代試中者。殆萬餘人。甚於冗濫。繼今各處考試前項。要得識字能文者。至覆覈試時。尙有曳白不成文者。許提調監試巡綽等官。封卷舉奏。自一人至四五人以上。承憲官以貶罷論。本人以徒軍丁罪。罪之。○八月初三日。定百官朝儀。其儀繼今當朝日。鼓初發。護衛以次進入丹墀。二發。百官以次進入丹墀。不得搪揆爭先。混淆撓越。若鼓已三發之後。而百官

猶在朱雀門外。并鐘已過五十之後。而猶在端門左右者。該守門官。一體遏截。錦衣舍人司。糾舉送治。○九月。定識字借寫狀非教唆令。○冬十月十四日。正嫡次子令。上諭大小官員百姓等。凡預子孫奉承祀事。不問年甲之長幼。不拘官秩之崇卑。宜守經常。委之嫡子。嫡子先死。即以長孫。或無長孫。方用次子。嫡妻又無祔子。方擇次子之賢。若長子長孫。方有嬰疾。及不肖之行。不宜奉承。即當經告所司。擇別子孫承祀。以示爲人父者。不可溺愛。而陷敗家之禍。爲人子者。不可昧義。而長傷化之風。○十一月。除稅使鋪正等職令。勅旨。繼今各稅務使見缺。吏部取有出身各衙門吏。經選不取者。銓除以便修寫稽考。諸稅簿牒。若驛承鋪正等稅使。取得馘旗軍。選不取者。銓除如前例。從吏科都給事中黃邵之言也。○十四日。申明豪橫令。中軍都督府左都督涇陽伯黎權奏

言。係豪右有所挾持。犯毆傷人。奪人田土財物。耕破墳墓。損侵於人。自三遭以上。顯是豪橫。赦所不原。定以豪橫罪。罪之。若前項犯事。止一二遭。及相爭訟田土毆鬪之類。如律議罪。○二十一日。銓選方面官。及監守客使。勅旨。四承司憲察方面官。責任既尊。事權亦重。銓選之際。宜得其人。如有缺員。參議用六品以上。有器識資望。任滿四考以上。憲察用科臺。國子監六寺等衙門官。有廉明歷練。應滿四考。衆所推獎者。如例選除。敢有徇情妄選。品卑任淺之人。以致衆論弗諧。民務生弊者。吏科送問治罪。○定諸藩使臣朝貢京國令。如占城、老撾、暹羅、瓜哇、刺加等國使臣及鎮憲頭目。至會同館。錦衣衛差壯士五城兵馬郎將司旗軍等。各宜如法。監守嚴謹關防。以至道塗往來。入朝進見之際。亦宜先後引行。驅斥諸小內人。并公私奴婢。並不得接近訪問。交通言語。以至透

漏事情。引誘生弊。該監官不能如法嚴防。徇私容縱。錦衣衛舍人。司旗牌壯士。其實奏聞。拿來治罪。○二十六日。定敦禮義課農桑令。上諭天下各處承應府縣州官等。禮義所以淑民心。農桑所以足衣食。二者政之急務。牧守之攸司也。朕自御極以來。凡化民成俗之方。興便除害之政。莫不形諸訓諭。責之專行。然民財未至羨餘。民俗未臻丕變。豈非爾輩以簿書爲急。而視教令爲虛文。以期會爲先。而置民風於度外。以致然歟。繼今爾輩。盡革前弊。凡朝廷之勅令。一意奉行。百姓之飢寒。多方經理。而府縣州官者。每年以時。相視原隰。勸課農桑。地有遺利。則隨方而興作之。人有遺力。則隨事而勸相之。使民有餘財。而無凍餒逃亾之弊。或歲時巡行之際。所致村巷民居。必歷舉前代勅諭之文。古文禮樂之訓。丁寧曉告。俾彼從善改過。或有傷化敗俗之事。必致意戒懲。忠信

孝悌之人。必用心嘉獎。民皆歸厚。而革澆薄奸詭之風。孰能遵承見效。二司類以名聞定賞。倘或尋常職事。罷職充軍。○十二月。令各處江官。如遇進表日。許在衙門行禮。停就都司。○以黎端之爲兵部尙書。黎公讓爲禮部尙書。郭廷寶爲刑部尙書。鄧見素爲監察御史。黎志爲南軍都督府左都督。平淳伯黎廣志爲禮部左侍郎兼翰林院掌院事。○是年殺陳封。帝諭尙書阮如堵等曰。陳封少時。爲厲德侯舊臣。至陳封爲仁宗經筵時。愛戴厲德。甚輕蔑我。今封爲我臣。常蓄不臣之心。謂我建立明國官號。而匿國朝通制。不臣之心顯矣。封已反。誰束我手。不可殺封。封國叛臣。孰爲封螳螂。攘臂稱首。使吾知之。又諭如堵等曰。吾見陳封頑薄。前後誥諭可也。如二賜封詩。吾過之大也。噬臍將可及乎。我觀漢之孝景。唐之太宗。史稱七制三宗。亦有晁錯祖尙之悔。吾不及二君

之英。安得不多有悔吝乎。

丙午。十七年。明成化十二年。春正月十二日。勅旨。繼今監察御史。差幹瘴地

如安邦、興化、諒山、太原、廣南等處。卽差該道監察御史。若該道差已盡員。許通該併同差期。若該道御史。通該御史。差已盡員。始相輪差別道御史。○十五日。勅旨。各衛司儒指揮各員吏部同本衛官。公同閱選。內外各衙門見任。文職有會試中場。身材頗有壯健。銓除各衙門司。宿直應務。○十六日。差官。檢驗軍需物件。○二十五日。定築立公私田土界碣。其法。農隙時。府縣官卽照如田土簿。及奉給田土。四至界近。拘集老大社村長。公同指引官田。及世業田土。築界碣。以爲一定永遠之法。○二月初三日。定題奉本例。署字體式。○二十九日。勅旨。繼今通政使司。接受內外各衙門官員奏本。間有寫字遺漏差謬。卽檢奏送刑部。罰錢

如令。若軍色民。停罰錢。○三月。選強壯充軍。○十四日。頒洪德軍務凡二十七條。按洪德六年三月日頒降。一文武官一品二品祿子。及三品長子。公侯伯祿孫。不能識字。充錦衣衛俊士。若能讀書考中。充崇文館儒生。三品祿子。及文武從官四六七八品子。不能讀書。充羽林衛軍。能讀書考中。充秀林局儒生。有吏才考中。充內外各衙門吏。九品二子。如八品子。餘如百姓子。七品以下孫。選充軍。如百姓例。一親父子兄弟。三丁以上。同居社籍。饒一丁選充。若在別縣社不饒。一傭賃人。有文字。已有本處承宣司准照。便卽並饒免充軍。○夏四月初六日。清華等處憲察使司憲察使阮祚奏言。係各府縣官不勤。押作堤路木桿。不得陞級。○十三日。勅旨。各衛勢家奴婢。開姓名送奉天府檢刷。從奉天府少尹阮必勃之言也。○二十一日。定農隙時興作。建昌府舒池縣知縣陳汝



爲奏言。天下各處。田野高下不同。農隙秋夏有異。秋田則二三月播種。夏田則十一月耕種。是夏田之急於冬尾也。今有司。倘遇役作。不審民田便宜。一槩以冬尾爲農隙。是獨便於秋務之民。而夏田之民有妨。伏乞繼今培築等務。二司查勘。某處秋田冬尾興功。夏田春月起作。以爲民事便宜。從之。○二十四日。勅旨。公田每六年。從新檢度。均給如前。○申明檢察逃亡令。○五月初一日。禁揀錢。勅旨。泉貨之用。貴於上下流通。府庫之儲。貴於長久無弊。繼今內外各衙門。追徵公私賍罰。及度支檢收各項錢。應入官庫儲積者。並宜選取真銅錢。雖輪郭少缺。係是真銅積久無弊者。亦宜選取。若官吏代俸。及百姓買賣使用錢。凡真銅穿緝猶著者。一體收用。不得拒斥苛揀。○二十二日。禁外任官吏娶部內婦女。○二十六日。開廣獄房。添補守獄應差。○定朝冠。繼今文武

百官進朝。戴烏紗帽。兩翅宜一體稍仄向前。不得任意或平或仄。○六月十一日。申明越奏告令。繼今凡公私等事。未經州縣府承憲臺等衙門。及已經告。而勘理未完者。並不得越奏越告。○十二日。禁過回藩鎮籍令。如清華、父安、順化、安邦、大原、宣光、諒山等處承宣。或清華不得改入父安。諒山不得著入太原。○十八日。令各府縣社。有海岸荒閑田而少田。人情願培築開墾。納稅府縣。勘實給撥。○秋七月初一日。海陽道監察御史陶如理奏言。應試士人。遇上番宜納錢。從之。○初洪德十二年秋以前。官員雖未中鄉試。亦許入會試。至是勅旨。官員有能習科舉業。願入應試者。在京就奉天府。在外就所在承宣司。入試。先經府縣覆覈。實如百姓鄉試例。然後許入會試場。從翰林院侍書兼崇文館秀林局司訓梁世榮之奏也。○九月初四日。置諒山、承宣、炎山、嶧山、峯山、弄

山巡檢使。○初六日。勅旨。係考試免選。及官員男孫。軍色書算等項。本社社長。就禮部。端保認面。至日太早開單。入寶慶門內指引。方許入場。從禮部左侍郎兼金光門待詔武有之奏也。○冬十月初三日。申明奏章體式。○初五日。禁勢家子孫奴僕等人。無故走馬街衢。○二十六日。遣禮部尙書黎能讓、范福、昭郭璋等。往歲貢于明。○二十九日。禁盜余珠。○試官員男孫。屬文書算。○十一月。定出入班行。文武百官。係朝班插定之後。或奏事詳見而退。或有故。事畢而出。各宜循班。不得橫去徑行。○是年。以黎端之爲戶部尙書。佐國侯阮如堵爲吏部尙書兼國子監祭酒。黎永爲北軍都督府左都督。棠溪侯阮館爲中軍都督府右都督。茂敬子黎旋爲駙馬都尉。紫巖伯阮滋至爲海陽等處清刑憲察使司憲察使。

丁未。十八年。明成化二十三年。春二月。禁僭越稱呼。○三月。會試天下士人。取范珍等六十人。○夏四月初七日。上親臨策問。以治道。覽卷畢。又宜召優等進士。入日光門。親賜鑒別。以陳崇頴爲第一。阮德訓、申景雲次之。並賜進士及第。武耿等三十名進士出身。范珍等二十七名同進士出身。○二十八日。申明名呼令。如親王卑下者稱呼曰殿下。嗣親王曰府下。公侯伯駙馬一品稱呼曰閣下。二品三品曰門下。四五六品曰大人。七八九品曰官長之類。敢有如前僭越。呼者受者。答五十。罰錢十貫。○定保選總兵官。上曰。總兵之官。一方重寄。不可委任非人。科臺等官。宜保選各衙門衛官。瞻畧學識。資望材幹廉勤者銓除。敢有徇私。妄保猥劣貪懦者。治罪。○五月四日。上御敬天殿。臚傳唱進士陳崇頴等名。百官朝服稱賀。禮部捧黃榜。揭于東華門外。○六月二十六日。勅南軍都

督府左都督涇陽侯黎權。同五府、六部、御史臺、六寺等衙門、南軍都督府、平淳伯黎志等。撰用明令一百四十五條。○一內外衙門各員。繼今如有相賀相送。障子宜用中紙。不得裱褶。○秋七月初九日。勅旨。官員非犯罪左遷者。許滿考遷陞。一如各處官員例。若考課稱職。止陞本處承司。不得轉調。近地有貪冗者。如前令罷職。充廣南軍。○八月十五日。立洪德十八年丁未科進士題名碑。○十八日。禁內外官員。無故不得到錦衣、効力、神武、殿前等衛司直廬。○二十二日。明憲宗崩。○九月初六日。明皇太子祐楹即位。改明年為弘治元年。是為孝宗。○冬十一月。大赦。凡五十四條。○定朝臣議事次序。詔。朝堂議事。有中官傳奉聖旨。問。則先六科御史臺為一次。六部六寺為一次。公侯伯五府都督為一次。隨項議論。務要詳明。不得模稜雷同。緘默躲避。違者糾儀。監察御史

糾舉送問。若當日糾儀。不預議論。

戊申。十九年。明孝宗祐楹弘治元年。春正月。扈從藍京賞一資。○閏正月初三日。陶舉陞翰林院侍讀東閣學士。脩慎少尹。以陶舉任內繁衙門滿三考。稱職無犯法故也。○夏五月初九日。詔自今各衙門官員。有得病奏乞療治。則日治病。或療治。不得如前暫用養字。從東閣大學士申仁忠之奏也。○十五日戊寅。壬子時。第二皇孫濬生。後為威穆帝也。○十九日。定陪拜禮節。詔文武百官。凡有事陪拜禮畢。侍班如儀。得令則趨出。不可徐行。翔揚亦不可疾走。攙趨。○大旱。○秋七月二十五日。詔內外各衙門。勘理諸訟。係有把名證借勾來查問。即勘官詳問明白。小訟期五箇日。大訟期十箇日。以紙取供言完畢。不得淹滯逾期。○八月壬辰朔。第三皇孫濬生。後為肅宗。濬音純。○十六日。定接明國使衣服。公侯伯駙馬文

武百官。預制青色紵絲紗羅領衣。長去地一寸。袖寬一尺二寸。若議官用製衣。長去地九寸。袖小依舊樣。並用補子。穿靴務要鮮明。不得用舊醜。候接明國使。○汰內外各衙門吏。老劣不動。致職還民差賦。○九月。詔。自今府縣州官。審置社長。係兄弟叔伯之子。并親伯姪舅甥。止許一人爲社長。不得並置。以革黨比雷同之弊。○冬十月初三日。命禮部。諭廣南參政范播宗曰。廣南承政司。軍民生男十五歲以上。俊秀好學。至鄉試日。其本處承憲二司。公同選取。具本充本府生徒。使之教誨。以知禮義。○九日。定進朝儀新樣衣服。其製衣。長去地二寸。袖寬一尺三寸。○二十日。詔。自今凡士人。已曾讀書能屬文。有學檢試中免選者。饒賦差半分。以廣朝廷養育人才之意。○十一月二十日。明遣正使翰林院侍講劉戡。副使刑科給事中呂獻來告即位。并賜綵幣。○二十三日。行

開讀明國詔書於敬天殿。○置雷關緜關閭關巡檢使。○十二月十一日。遣使如明。覃文禮。王克述。范勉麟。賀卽位。黃伯陽奏占城地方。并綏阜地方事。宋福林進香。黃德良謝賜綵幣。○十三日。命禮部出敬君榜。公侯伯駙馬文武百官。繼今凡有捧制誥勅命。并御寶勅旨。係本重器者。並兩手橫捧。高與頭上平。捧奏本奏帖等紙者。並捧高與面平。○頒降考課例。一。考課之法。三年初考。六年再考。九年通考。方行黜陟。一。皇內外親。并開國功臣子孫。及武臣前已得官。後有軍功。在任滿考稱職。例陞一二品者。吏部具本請旨。得旨許陞如例。若百姓子。白身任官。或以白身。以戰功得官。在任滿考稱職。例得陞級。止許三品。不得一二品。既以別功陞級。通考又稱職。應陞至二品以上。吏部具奏取旨。一。九年之內。三品以下。如例施行。一。各衙門。任滿三考。備將任內行過事蹟。無

有過犯等由。備呈該長官。從公考覆。以見任爲始試官。滿三年受實職。准爲初考。任內有過犯。不應考課。及非軍功特陞者。自過犯并特陞之後。再定爲初考。備將稱職。平常不稱職。逐項定爲考課。又詳開行過事蹟。無有過犯等由。備呈該知衙門覈考。送吏部收照。俟滿九年通考。該官付將前後任內。每考行過事蹟。考定詞語。隨其官職輕重。或奏送。或留送。吏部參照前後繁簡。各考如例。具奏施行。某衙門詐妄擅著公能。隱匿罪犯。該官不能檢覈。欺蔽相容。吏部詳查檢送問。若有奇材異能。特旨陞除。不拘此例。○定官吏遷陞代交令。

己酉。二十年。明弘治春正月。定保舉刑部司官例。勅旨。刑獄之事。所係匪輕。鞠勘之官。當慎其選。自今刑部郎中員外。有缺幾員。吏部具本。內則六部御史臺。堂上官六寺卿。外則承憲二司等官。公同保舉所知。及

該各衙門官。曾歷二考以上。廉潔練達。諳曉刑名者。六部一本。本處承憲二司。每處一本。開註保舉者姓名。明白具本。得旨送吏部。銓除。敢有容徇貨。保舉非人。六科監察御史。體察得實。糾彈如律治罪。○定十三道監察御史分司視事。該知衙門。上諭御史臺十三道監察御史曰。各恭爾事。盤庚所以教在位。慎乃攸司。成王所以迪厥官。蓋人臣事君。各司其職。決獄問廷尉。錢穀問內史。責有攸歸。矧風憲之司。糾察是職。必分屬該知之素定。則綱維整而有條。繼今爾等。凡在內官各衙門。告贓不法員人。及一切公務利害。從該知所按問施行。若在外三司。居理百姓。或發官吏奸污。或訴獄訟冤抑。一應私事。係在府縣州者。從分司該道。准理施行。○十三日。改著會期上班下班。并期班序。爲大集期上番下番。○夏五月。大旱。○大赦。詔書凡四十九條。○禁官員聚徒耽酒色。

○六月二十五日。定進朝歛手格。詔公侯伯駙馬文武百官。繼今凡進朝。著衣冠歛手。在圓領下。若護衛。著衣歛手。在胛下。○秋七月。差指揮校尉。公同承宣司。疏決潦水。○定發軍需九十二條。○九月初九日。禁戢頑民。怨相告訴興訟事。○冬十月十九日。遣陪臣阮克恭、裴昌澤、阮漢廷等。往歲貢于明。○以劉興孝為翰林院侍講參掌翰林院事。

庚戌二十一年。明弘治三年春正月。大集軍點目。足放回代番留守。○定土官欠朝賀禮例。近者一年二朝賀。遠者一年一朝賀。如正旦不及許。聖節欠一遭罷職。二遭拿來治罪。○二月。遣翰林院科臺錦衣衛校尉往各府縣。發官粟。與貧民貸食。以荆門各府縣耕種不得。民多飢死故也。

○定遷官交代廨宇令。自今各衙門。遷陞守制病故之類。所居廨宇等物。交付官吏。差人守看。待到任官應用。○定降服令。詔公侯伯駙馬。文

武百官。自今朝廷。如有祈祭國忌禮。宜降服。不得擅去花樣。或有所謝者。檢問。○勅旨。各衛司儒指揮宿直。應務滿考以上。果能奉公幹事。無過犯。該衛長官。勘實具本。吏部照缺改除文。職未有滿考。老劣護衛不堪。卽揀汰。猶可用者。改除。敢有奔競。如律治罪。以杜士風僥倖。○三月。會試天下舉人。取阮敲等五十四人。敲東岸扶軫人。廷試同進士出身。○夏四月初五日。定天下版圖。承宣十三處。府五十二。縣一百七十八。州五十。鄉二十。坊三十六。社六千八百五十一。村三百二十二。庄六百三十七。冊四十。筒四十。原三十。場三十。其清華、永安、順化、安邦、廣平、興化。各置都司并守禦。○十九日。大赦四十五條。以今歲米貴。錢一陌米得二升故也。○殿試。上親策命。兵部尚書定功伯鄭公且。刑部尚書黎能讓。提調。御史臺副都御史郭有嚴。監試。東閣大學士申仁忠。吏部尚書阮伯驥等。讀

卷。上覽次其高下。賜武睿、吳煥、劉舒彥三名進士及第。黎俊懋等十九名進士出身。黎廷适等三十二名同進士出身。○五月十四日。兵部尙書定功伯鄭公旦。議錦衣衛侍衛司着見籍。在壯士更番舍人之下。○十八日。上御敬天殿。臚傳唱進士武睿等名。百官朝服稱賀。禮部捧黃榜。揭于東華門外。十九日。賜冠帶衣服。二十日。賜宴。○定折社令。某社備五百戶。而其餘戶又得一百戶以上。將成一小社。應投告類奏。折爲別社。以增廣版圖。○秋七月。定百官進朝例。○八月十五日。立洪德二十一年庚戌科進士題名碑。○二十六日。定百官入朝進止例。○九月。新置諒山承宣十三關。如炭山、峯山、樓山三山是也。○冬十月。置神武右衛。考試軍色民人書算。補各衛門吏。其試法。暗寫一場。書算一場。○十一月。廣築鳳城。因李、陳之制也。帝懲仁宗遇害。發卒築之。而九較交

場之外。延廣八里。凡八月而後成。乃造名寶殿。又立上林苑。中有鹿獸。○置錦衣、金吾二衛。錦衣衛勇士。自力士司。至旗牌司。凡二十司。副軍並無隊伍。止有一班至八班。金吾衛武士。自力士司。至神臂司。與中前左右後。共爲一百司。又置神武殿前等司。置中東西南北五府軍。又作軍政、軍戒。

辛亥。二十二年。明弘治四年。春二月。扈從西京。賞一資。選強壯充軍。汰老。○夏五月。定過回別籍令。應得過回別籍。而貫猶在舊社。至寫籍時。府縣官社長。及首領官吏比考。要使相同。○秋八月。二十八二十九日。夜兼日。並大雨不止。頽墻。敬天殿水溢二尺二寸。若青威等縣。平田水溢四尺。○二十九日。差錦衣、金吾二衛。指揮校尉百戶。往近處承宣。疏決壅塞。水害禾穀。上諭宰臣五府六部六寺六科御史臺等官曰。政治闕失。

天示災變。朕之過舉。所以召之。百姓何辜哉。今朕信不洽于民。誠未格乎天。以致然歟。朕不知卿等於家居之日。以國事惓惓在念。未嘗少懈。以匡不逮歟。將逍遙養性。謀利徇私。旅進旅退。以固權位歟。文臣寡於忠義。多於狡猾。賣直釣名。似忠似信。若陳封、陶雋之徒。何以移哉。昔我太宗皇帝。君臣一心。明良喜起。和氣致祥。義何乏哉。大和、延寧。政治周旋帷幄之中。變理操持威福之柄。殪伐國勢者。克復、夢荀之徒。雕墻殘民者。杜秘、杜丈之黨。以致變起蕭牆。禍生枕席。秘丈子孫。盡歸一網。唐太宗曰。君既失國。臣豈獨全。豈其然乎。自今而後。或尙狃舊汚。旅進旅退。圖欲固權位。朕爲卿顯戮之。或向化革非。忠信自篤。而竭力盡智。朕亦爲卿上賞之。卿其勗之哉。○冬十月。禾穀大熟。○十八日。置神武後衛。○帝於大興門之外。命工建名亭。以爲懸治法之所。既成。賜名曰廣

文亭。是亭也在龍城之中。鳳樓之前。銀溝回旋其左右。○十一月。令提刑監察御史。檢察刑部官吏。有怠惰奸貪。縱緩罪囚。具本奏聞。如律治罪。○以阮冲慤爲翰林院侍讀。掌翰林院事兼禮部左侍郎。

壬子二十三年。明弘治五年。春三月。申明各例一百三十條。○夏四月。命翰

林科臺等官。往十二承宣。審讞獄。以楊直源爲海陽承宣。憲察使司憲察使。直源事忤旨。尋下遷。還翰林院校理。出家先是。上好文詞。御舟至

藍山。追想聖祖基業詩。直源奉廢。結句詩云。藍山咫尺天南望。萬古纔觀創業功。御批云。此句有長遠氣象。○六月。勅旨。功臣子孫受散官。開國時預從義旅。已受正督同督等號。緣擊吳賊陣亡。未得職品者。并有姓名。隴崖功臣簿。如黎棹之類。生時官未一二品者。今猶有子孫。許投告。吏部查實類奏。授一品散官。○冬十月。鄉試天下士人。命翰林官作



海陽、山南、山江、京北四承宣司考官。每司四員。翰林作鄉試考官。自此始。○十一月六日。遣陪臣黎俞、裴崇道、阮彥克、鄭葵等。往歲貢于明。并孔愚往奏。探民人逾越地方。交通販賣等事。○十二月二十四日。明差正使刑部郎中沈奉。副使行人司行人董振來。告立皇太子。并賜綵幣。○大飢。民有食禹餘糧。○置各武庫火器庫。廣田於其中。種石竹。於其邊。置錢庫於海池中。中有上林寺。置太原都司。太原馴象衛。并置守禦總知司。平狄衛。○以黎景徽爲戶部尙書。

癸丑。二十四年。明弘治六年。春正月八日。遣使如明。陪臣阮弘碩、黎嵩、賀立皇太子。行人范贊。謝賜綵帛。○三月。會試天下舉人。取武賜等四十八人。○十六日。定文武朝班。一。朝班文武品同者。舊官及年長者在右。新官及年少者次之。一。文武官相該知者。品卑而職高者。如三品都督。立

在二品班。七八品郎中。立在大品班。若品高而職卑者。如二品衛官。立。在三品班。四五品員外郎。立在大品班。餘以類推。一。御史臺東閣官。翰林院監察御史等官。朝班並如前例。品卑而職重者。如七八品六科官。立在大品班之右。一。文武朝謁。官品雖高。而職異者。照本職班。立本班之右。若戶所該者。立在本品班。朝謁之末。一。文武官拜見拜辭拜謝等禮。照如常朝班次。若護衛三品四品。照依如本品。司所官品雖高。序立。在衙門官班下。○夏四月二十一日。上臨軒親策。命兵部尙書定功伯鄭公旦。御史臺都御史郭有嚴。提調御史臺副都御史覃文禮。監試。翰林院承旨東閣大學士兼國子監祭酒申仁忠。吏部尙書阮伯驥。翰林院侍讀東閣大學士杜濶。東閣學士黎廣志。翰林院侍書掌翰林院事兼崇文館秀林局司訓梁世榮。東閣校書吳綸。讀卷。上覽第其高下。賜

武賜、吳忱、黎熊三名進士及第。賴德輜等二十三名進士出身。阮□懋等二十二名同進士出身。○三月初一日。上親御正殿。鴻臚傳唱進士武賜等名。禮部引捧黃榜揭於東華門外。二十七日。賜冠帶衣服。二十八日。賜饌。○秋八月十日。立癸丑科進士題名碑。○冬十一月初四日。以杜潤爲翰林院校理。

甲寅。二十五年。明弘治七年。夏四月。詔□文學□間有年□武幹或從征有功者。□衛門出身吏例□。○秋八月初七日。□翰林科臺等官凡十二條宜讞獄□。

乙卯。二十六年。明弘治八年。秋八月十八日。詔係官員得病三箇月。不得考課。○冬十一月。遣使如明。工部右侍郎黎漢廷。翰林院侍書武賜等。歲貢。東閣校書黎俊彥。監察御史阮敲。奏驛路。○作御製瓊苑九歌。上以

丑寅二載。百穀豐登。協于歌詠。以紀其瑞。併君道臣節。君明臣良。遙想英賢奇器。并書草戲成文。因號瓊苑九歌詩集。命東閣大學士申仁忠、杜潤、東閣校書吳綸、吳煥、翰林院侍讀掌院事阮冲懋、翰林院侍讀參掌院事劉興孝、翰林院侍書阮光弼、阮德訓、武賜、吳忱、翰林院侍制吳文景、范智謙、劉舒彥、翰林院校理阮仁被、阮孫茂、吳權、阮寶珪、裴溥、楊直源、周院、翰林檢討范謹直、阮益遜、杜純恕、范柔惠、劉暉、譚慎徽、范道富等。奉和賡其韻。按九歌詩集。始作於此年。○帝又作古今百詠詩。翰林院侍讀掌院事阮冲懋。并參掌劉興孝步韻。東閣大學士申仁忠。學士陶學奉評。

丙辰。二十七年。明弘治九年。春二月初四日。御舟發自東京。祇謁陵寢。十一日奏告。十二日。建濟渡津梁于光德門外。○帝作春雲詩集。○十四日。

天不雨。帝禱。手寫所撰詩集四張。命阮敦張于神祠之壁。是日初更。天降細雨。五更大雨滂沱。帝題弘佑廟詩云。極靈英氣震遙天。威力嚴提造化權。扣問山靈能潤物。通爲甘雨作豐年。○帝至藍京。追思黎志父念祖林。黎永父壽域。祖恢勳業。寫詩賜之。并賜黎志白金三十兩。黎永白金二十五兩。以爲歡燕親眷之資。二十四日發還。○閏二月五日。賜文武臣僚宴於翠靄洲。時御舟發自梁江。駐翠靄。文武臣僚拜賀。故宴之。○先是二月。皇太后上陵而歸。偶嬰苦痢。至閏月二十六日亥時。崩于承華殿正寢。壽七十六。初皇太后未崩。冬時。帝與皇太子。日夜視疾。弗離左右。賜藥飲食。必先自嘗。內告祖先。外篤祈懇。靡神不舉。屬續之際。亦自呼號。太后猶爲一頃開口欲言而辨也。衣衾含飯。一一親臨。自製以恤之。○帝作古今宮詞詩并自叙。命東閣大學士申仁忠、校書吳

綸奉評。○會試天下舉人。取阮文訓等四十三人。○三月十九日丁酉。上親試于敬天殿丹墀。詢以治道。命兵部尙書定功伯鄭公旦。御史臺都御史郭有嚴。提調戶部左侍郎阮弘碩。御史臺副都御史覃文禮。監試。翰林院承旨東閣大學士。兼國子監祭酒申仁忠。翰林院侍讀東閣學士陶學。翰林院侍講掌翰林院事劉興孝。東閣校書吳綸、吳煥。翰林院侍書兼秀林局司訓陳克念。翰林院侍書吳忱。讀卷。○二十六日。進諸士人。入金鑾殿庭。上親嘗其容貌。定取三十人。二十七日。帝御正殿。唱名。賜嚴璦、玩助、丁鑿三名進士及第。丁勳等八名進士出身。阮道演等十九名同進士出身。○夏五月八日。詔曰。憲司係言責。如有缺員。選內進士科。并各衙門文武各衛司儒指揮。有會試中場。果能奉公幹事。剛直不畏避權貴。無過犯者。銓除憲察副使。又以府縣州官。必統諸牧

民首領等職。如監生、儒生、學生、按吏、各衙門吏。會試累中場。年深知務勤幹。及有軍功等項。初授知縣、知州、縣丞、同知州、首領序班等職。滿三年無過犯。方許得實授。六年無過犯。知縣、知州除員外郎。縣丞、同知州知簿典簿序班。除司務主事。推官、都官等職。滿六考無過犯。員外郎、同知府。始得陞爲知府。○二十二日。吏部尙書兼國子監祭酒黎澗、阮如堵等奏題本看一本。山南道監察御史阮陽祺奏。各處邊遠州縣吏。常與蠻人往追各稅。能服水土。諳曉夷情。可以幹濟事務。堪除爲本處州縣吏。從之。○秋七月。禁呼朝堂爲朝房。○銓考訓導。自今各處儒學訓導缺員。吏部遵如前例。具奏。送國子監。及各衙門官。保選儒生并中場吏。及儒生年三十五歲以上。有學問。行檢無過犯。送禮部。考課四場。合格者如例銓除。○八月初二日。令州縣擇置社長。係姑舅兩姨之子。男

女同嫁爲婚姻者。並不得置爲一社社長。若已爲社長。宜擇某人能幹事者留。餘卽奏却還前項。○初四日。太宗皇帝忌辰。是夜。大風雨。洪水暴漲。散盡民產。○九月。以陶學爲翰林院侍講東閣學士。上賜以天南餘暇一部。并賜和梁江夜興詩一首。及賜錢二十五貫。○二十三日。修作牧馬場馬廐例。○冬十一月十七日。帝弗豫。諭行在東閣大學士申仁忠。學士陶學。云。雲去天中。月懸空際。雲來則月暗。雲去則月明。人孰不見之。其能道得者鮮。吾仰觀天上。情動于中。言形于外。有句云。素蟾皎皎玉盤清。雲弄寒光暗復明。凡人豈能道之乎。歐王脩云。廬山高名節之篇。杜子美亦不能爲。唯吾能之。豈云妄想。申仁忠、陶學詠詩句云。瓊島夢殘春萬頃。寒江詩落夜三更。雖李、杜、歐、蘇復生。未必能之。唯吾能之。昔錦瑟詩云。莊生曉夢迷蝴蝶。望帝春心託杜鵑。滄海月明珠有

淚。藍田日暖玉生煙。真奇麗精美。可與吾侔。而清瑩澄澈。未及吾詩句也。豈吾闢一字之奇以爲工。誇一字之巧以爲美。真直說如歐王脩耳。爾說如何。○勅旨。內外管甲府。錦衣金吾。殿前神武効力。五府都督。都聰兵使等。衙門長官。公同揀擇該內將校。或征戰功勞。忠信可任。或韜畧講貫。武藝精通。及才識廉能。勤幹明敏者。方許在職。倘或貪墨闖葺罔功。及諂事求容。僥倖無耻者。舉奏爲黜陟。期以十二月上旬舉奏。并訓練士卒。務在精專。撫恤軍民。要均勞佚。敢有揀擇不實。訓練不勤。以致將校猶多猥冗。士卒猶多逃亾。六科監察錦衣衛舍人。體訪糾奏治罪。○十二月初六日。立洪德二十七年丙辰科進士題名碑。丁巳。二十八年。明弘治春正月初五日。令諸稅某年徵納。至末年納足。不得如前。今年納明年徵。○二十二日。禁衙門吏更番。并外直舍人。非

當番。不得托別故。擅居本衙門作弊。○二十九日辛未。帝疾大漸。乃憑王几。命皇太子嗣位。帝將崩。時有自述詩云。五十年華七尺軀。剛腸如鐵却成柔。風吹隕外黃花謝。露浥庭前綠柳癯。碧漢望窮雲杳杳。黃梁夢醒夜悠悠。蓬萊山上音容斷。冰玉幽魂入夢無。三十日壬子。帝崩于寶光殿。是日。神劍神璽皆失。帝生皇子。十有四。長皇太子鐸。次梁王銓。宋王鏐。唐王鎬。建王鑽。福王錚。演王鏞。廣王鏞。應王鏞。義王鉞。鎮王鏞。肇王鏞。荆王鏞。皇女二十。在時作紫霞殿。寶文殿。金鸞殿。寶光殿。藍山寢殿。初帝卽位。上仁宗之尊號。稱宣德之徽號。陶表死節。則特加旌表。得寧從逆。則嚴加顯刑。凡政事紛擾者。悉釋之。治法暴虐者。悉除之。此所以肇修人紀。而正皇嗣也。帝嘗諭在朝諸臣云。朕有二失。一日政□弛爲□□干譽。二日。素尸在位。擾亂□□□內外庶職。難以枚

舉。且以其尤者而言。則□黎練不偶□人安可加以圓冠方屨哉。太師  
丁列、太傅黎念。職居三公。不聞燮理陰陽。經邦論道。亦未嘗進一君子。  
退一小人。不幾於羊裘逍遙之誚乎。

史臣武瓊曰。帝天資高邁。英明果斷。有雄才大畧。緯武經文。而聖學  
尤勤。手不釋卷。經史篇集。曆數算章。聖神之事。莫不貫精。詩文發  
詞臣之表。與阮直、武永謨、申仁忠、郭廷寶、杜潤、陶舉、覃文禮。爲天南  
餘暇。自號天南洞主道庵主人。又崇尚儒術。振拔英才。取士之科不  
一。而定三年大比之舉。自帝始之。其得人之盛。振古有光。文武並用。  
各隨所長。故能修政立事。制禮作樂。號令文章。煥然可述。初帝在藩  
邸時。雖自養晦。及國遭大變。群臣倉卒迎立。入繼大統。帝知屯般之  
輩。已就誅夷。諒山親王。又被其害。慘然不樂。有戚傷心。咎其骨肉相

殘。致使外人乘釁。一門兄弟。俱被其禍。初帝不以得位爲樂。亦不以  
時當變故爲憂。故一時豪傑。莫不推服。諸侯驕恣。相繼誅夷。遂鑒前  
失。內外謹嚴。置錦衣、金吾二衛。□□□□□□□□□□□□□□□□  
氏□□點。又擇□□□□□□□□□□□□□□□□□□□□□□□□  
徒□□□左右垂衣拱手。天下□□□□□□□□□□□□□□□□□□  
剪□□何□□□南征茶全。而復其封疆。西拔雅□□□□□□□□□□  
有征。而威揚乎北。益蠻有征。而地關乎西矣。規模之畧。中興之功。可  
以比肩夏少康。蹈□周宣王。□漢光□□於下風矣。惜夫。帝以女謁  
盛。身嬰重疾。長樂皇后久幽□□。帝疾大漸。始得侍□□□□□□□□  
□□□潛捫□處。帝疾始增劇矣。  
贊日申仁忠 烝哉聖宗丕承□□□□□□□□集臣民□□握□陶□□

□□□□□□□□祖憲□□□□□□俊孝篤奉先□□□□壘壁□□淵源  
□□□□禮遠懷親□□國九□□馭臣□□柄允□□□□寵綏百姓文教  
誕敷武功耆定山嶽遁跡益蠻歸命惟彼占寇累世爲仇撥我南部  
侵彼四州親提虎旅高御龍舟闕槃毛燎尸耐血流茶全授首清廟  
獻俘萬里闢地千古復讐蠢蠢老撾捩吾聲教帝怒爰赫師興致討  
白旄一麾前戈盡倒竹破灰飛庭犁穴掃三陸息侵九夷通道盛登  
軒世俗媿虞周深仁厚澤垂四十秋。

○二月初一日皇太子令諭公侯伯文武官等聖父皇帝光啓中興克  
篤前烈在位三十八年夙夜祗勤廼於往年冬十一月二十七日得風  
腫疾至今年春正月三十日辰時崩于寶光宮予懷慕痛切已權勾當  
宮中各事內外臣民守職如故每日太早就東長安待令候有司擇日

行禮特諭卿等知之乃備榜文武朝參並著烏紗帽黑圓領衣進詣景  
門外朝時一次候行禮如儀○初三日臨哭皇太子諭朝臣曰子生三  
年然後免父母之懷故古者居父母喪以三年爲制上自天子下至庶  
人漢文不師古訓遺命短喪以日易月自是而後踵而行之是棄典禮  
薄彝倫殊不足取我國家列聖雖遵而行然其間禮節未盡復古今聖  
上皇帝奄棄百姓上賓于天愴鉅痛深報德罔極卿等宜議行三年之  
喪制以副予愛慕之情大臣百官皆稽首對曰孝者治天下之大本今  
殿下克遵孝道惇叙彝倫雖帝舜之大孝武王之達孝蔑以尙茲臣等  
敢不遵行於是定爲三年之喪凡歛殯奠饗一循古禮令百姓民間留  
長髮如喪服百日內若百官護衛留長髮如三年喪服並著素縞衣居  
家作勞之時暫著青衣亦不拘百日之外用青黑衣等不得用紅綠等

色。奉天府及天下軍民男女。着縞素衣。停婚嫁三箇月。朝臣定公伯鄭公且等。勸皇太子卽位。不允。初六日戊寅。太保平涼侯黎志。兵部尙書定功伯鄭公且。西軍都督府左都督崇溪伯黎永。就弘文殿。奉迎皇太子卽位。以明年改爲景統元年。○初八日。禁抑買并揀錢。詔內府女史。天和宮人。及諸王公主府大臣家奴婢。於市上鄉里民人所賣貨財。不得犍舊習。假公營私。抑買錢價。及濫取不還錢。自今百姓買賣貨物。及檢收納官庫諸錢。擲地有聲。穿緡猶得。輪郭少缺。自今一體收用。不得苛揀拒斥。○初十日。諭六科御史臺監察曰。進賢退不肖。爲政之大務也。是故任賢勿貳。去邪勿疑。唐虞之所以臻於變之風。旌淑別慝。彰善辨惡。成周之所以致太平之治。朕卽位之初。任人爲政。得賢俊以佐治功。然慮各衙門官。善惡混淆。忠邪靡定。儻不區處。曷示勸懲。爾輩司朝

廷之綱紀。作天子之耳目。揚清激濁。職所當爲。宜體朕心。各遵公道。繼今凡內外各衙門。如廉能忠直。應獎擢者。貪墨猥冗。不堪任者。各宜究其事實。具以名聞。敢有阿徇私讐。貿易貨賄。舉措失當。重憲弗原。○十三日。寬貸軍民賦役等事。勅旨。內外各縣係大市。已有例額者。卽如前。若未有稅額者。不得着續稅額。若又安地方。軍民諸色。鰥寡飢寒廢疾諸人。間有欠食者。承憲二司。行下府縣官。作急類取姓名具本。發給見貯官粟。每人一百升。至豐熟時。照數徵納。○十六日。頒御諱。并皇太后諱。恒。○令官員吏。典有科目。及會試中場。鄉試中式。及監生。儒生。生徒。遭父母喪。方得守制。○二十六日。授陶舉翰林院侍讀。東閣學士。楊直源爲東閣校書。時天有大旱。直源陳言。乞修德以回天變。○令戶部議。增銅稅戶。以足軍用。○三月初六日。定與人女納金。并納蠶子稅例。



○定鹹鹽稅例。○十二日。上諭諸王公主。及公侯伯駙馬文武等。耽隸微賤之輩。常依托而爲奸。窩藏容受之人。當戒懲而嚴禁。繼今府衙或權貴諸家。有奴婢築屋在奉天府。及有舊產在各處府縣者。並宜標題某府某衙官奴婢某姓之家男女人。本府衙門。及主管監自檢察。及本官奴婢。方許居住。若混淆雜居。一切斥去。并關報奴婢姓名數目。送該府縣官。得憑檢察。○十六日。詔自今沿邊巡司官。如有缺員。吏部擇取附近地方京人。有戰功得馘。例應除用。而服水土者。銓除。○二十日。勅旨。繼今六科給事中。監察御史缺員。吏部擇內外由進士出身。廉勤剛直。有政績者。擬銓。職任一年之後。六科給事中。公同考覈所行事。具奏取旨。堪用者留任。不堪用者。改除別職。六科給事中不公。許都御史考覈所行事。具奏取旨。堪用者留任。不堪用者。改除別職。都御史臺考覈

不公。六科官其實糾彈。若吏部銓選非人。科臺互相容隱者。一體送問治罪。○定陞調令。繼今在外各衙門。府縣州各衙首領官。有陞調者。吏部移文該知衙門詳勘。果有廉勤能幹事。任內公務無廢缺者。方許陞調。○夏四月十三日。准期番給俸錢令。○十七日。申明越告令。○二十六日。定陞充都提典吏令。○定差幹闕字令。○定銓選除劇任令。如紹天府、雷陽、梁江等。係是劇任。繼今如有缺員。吏部擇取廉能剛直勤幹者。銓除。○二十八日。定改調令。如父安管軍管民。有貫在本府縣。家居接近。本衙門。吏部宜改調別任。選別員人代除。并詔自今各處管軍管民。吏部不得以貫在本處。及家居接近所管地方者。銓除。○五月初三日。構作待漏院。初太祖作待漏院于西門之外。太宗、仁宗仍之。聖宗於大興門外。增築貳連。至是特命五府。差搬旗軍於大興門外。構作待漏

院二連。每連三間二厦。○十四日。禁官員百姓。不得用水晶等玉。作帽唾等器。○定追徵女丁。夏綿布稅例。○六月初八日。禁借用非法器物。如刻金珠。漆龍鳳等禁物。○秋八月初三日。定除擇推官令。自今各處承司推官。如有缺員。吏部擇取各衙門官。曾經二考以上。廉能練達。諳曉刑名者。銓除。○二十八日。定發軍需扈從令。○九月。定文武階封蔭例。武階追封退一級。如正一品。父從一品。文階退二級。如正一品。父正二品之類。○冬十月。二十六日。戶部尙書鄂侑等。奉從新議。定給俸錢例。○十一月。遣使如明。戶科都給事中范興文。翰林院校理阮德順。告哀。翰林院校理潘鏞。范克真。阮廷俊。求封。○置諒山都司。平陸樂墟守禦。○定邊兵例。係各處沿邊旗軍。父子兄弟。同本社村人。散充各衛所軍。至定作軍貫時。照其分編。還一衛隊伍。以便糾率。○以黎能讓爲殿

前都檢點。慈川伯黎潤爲四衛提督。裕湖伯朱鎮爲右提點。○十二月二十四日。辛卯。上大行皇帝尊號。曰崇天廣運高明光正至德大功聖文神武達孝淳皇帝。廟號聖宗。

152  
10  
34

大越史記本紀實錄卷之四終

Blank page area for the main text of the document.

大越史記本紀實錄卷之四終

大越史記本紀實錄卷之五

黎紀五

憲宗睿皇帝

諱鏞。又諱暉。聖宗之長子也。在位七年。壽四十四歲。而崩。葬裕陵。○帝天資英睿。運撫隆平。繼七年間。而

天下晏然。不足為守成之主。享國不永。惜哉。

其母長樂聖慈皇太后阮氏。諱暉。宋山嘉苗外庄鄉贈太尉貞

國公德忠之第二女也。先是。聖宗未有繼嗣。光淑皇太后嘗為

祈禱。命德忠禱于佛跡山徐公庵。夢至上帝前。祈皇嗣。上帝曰。

許天祿為阮氏子。乃抱坐前。時長樂皇太后居永寧宮。即有娠。

及彌月。夢黃龍自天而下。飛入所居。少頃遂生帝。光順二年辛

日。生。按阮伯朋天福寺碑記云。長樂皇太后有黃龍入左脇之祥。帝之生也。天姿日表。隆準龍

顏。神采端秀異常。聖宗深奇愛之。光順三年三月。冊立為皇太

子。洪德二十八年正月。聖宗崩。於是卽皇帝位。改元。大赦。以誕日爲天壽聖節。稱上陽洞主。後追上尊諡。廟號憲宗。

戊午。景統元年。明弘治十一年。春正月十六日。勅諭內外護衛等司曰。行宮之門不嚴。則宮城之禁不固。如遇大駕拜謁山陵。護衛三司。尤且號令謹密。勿恃昇平之時。而忽關防之備。書曰。有備無患。易曰。重門擊柝。以待暴客。此之謂也。見特旨宣召某人。日則用宣召牙牌。亦有令旗銅牌。不得開闔營壁。夜則用兩虎金牌。亦有令旗銅牌。若無金符牙牌。並不得施行。倘有不審真偽。不遵勅旨。則以軍憲從事。○三月初五日。定徵納諸稅例。係天下諸稅。某年徵。並至末年納足。不許今年徵而明年納。○勅旨諒山衛六所。旗軍稀少。官吏數多。本處三司官。公同量留。每所各二員。每衛教習博士六人。餘皆省減。備將省減姓名。具題送吏部、兵部。

調除及差擬。教習別衛所。○初八日甲戌。聖宗淳皇帝梓官至藍京。越二十八日甲午。安葬于藍山永陵之左。日昭陵。先是禮官奏請。立碑刻銘。以昭先帝之業於來世。帝可其奏。命東閣大學士兼國子監祭酒申仁忠。禮部尙書兼東閣大學士覃文禮。東閣大學士劉興孝。撰文。是日。帝命女官女史十人。送金柩安厝而出。○放宮女數百人。○遣使往四方。追勸貧乏老弱在軍者。饒汰之。賦役工程偏重者。輕減之。放眚災。伸冤屈。錄失職。褒有功。蠲逋負。寬刑罰。旌節義。賑孤貧。擢廉潔。進賢才。中外大悅。帝在東宮。三十六年。德業日進。仁孝聞於天下。故初政藹有可觀。○又安順化部中。群盜並起。鄰郡攻討不能定。帝勅所司。悉去設捕兵撫諭。許出首復業。○帝覽戶曹所上錢穀簿。及詢左右。知公私儲蓄狀。於是尤加意農事。手勅承憲府縣官。巡行勸課。築堤防。濬畎澮。立田

界。以備水旱。又命朝臣檢察之。每社置社村長一人。專於農桑。又率社軍農長。以糾督之。外任官以事赴京。及朝使自外至者。必召問農穀豐歉。百姓樂苦如何。其軍匠之上番者。如前例。六月十月。分半歸農。○十六日。詔內官及外官。無子而假養子。並照職品。許蔭充如所生子。○定保舉總兵例。詔曰。總兵之官。一方重寄。不可委非其人。繼今。總兵有闕。許科臺等官。保選各衙門官。有膽畧學識資望才幹廉勤者。爲之。敢有徇私。妄保昏猥懦劣者。罪加常律。○定納生絲稅例。從鄭值之議也。○以楊直源爲吏科都給事中。優加廉潔季俸錢。○夏四月初五日。勅諭典吏緣事。充軍得赦。應充在外衙門吏。情輕者充善地稍寬。情重者充邊遠瘴癘。○十九日。海陽等處贊治承宣使司參政武睿等上奏。爲陳言鄉試日期事。臣等奉查上年鄉試事例。八月初八日。入第一場。十九

日。入第二場。二十五日。入第三場。九月初一日。入第四場。奉此。臣等竊照。今年八月當鄉試期。本月初十日。恭遇天壽聖節。如本月初八日。武睿及憲司等員。並已入鄉試場。到初十日。再出本衙門行禮。則試事不謹於試場中。設立香案行禮。則禮文不備。伏乞今年鄉試。展出本月十二日。入第一場。二十日。入第二場。二十九日。入第三場。九月初六日。入第四場。如此。一以伸臣子慶祝君上之情。一以嚴朝廷設科取士之意。上從之。○五月二十四日。定追徵女丁夏綿布稅例。○秋七月十五日。御史臺都御史郭有嚴奏。力勇武士典吏軍色諸人。捉得劫人。并惡逆賊黨。例有出身者。吏部照如出身例除用。若例無出身者。並授散職如令。○逆人黃翕件伏誅。○八月二十二日。勅諭刑部廷尉司及內外勘理獄訟等官曰。刑獄之用。民命所懸。得其道則民協于中。失其道則民

受其害。故易象深懲於滯獄。書經務要於蔽囚。訊鞠理決之間。豈可容於遲緩哉。繼今以後。刑部廷尉司及內外勘理獄訟等官。凡諸訟情疑難者。並依期勘完。敢有淹滯逾期。每歲季許該及刑部提刑監察御史。清刑憲察使司。檢察糾奏。如律罪之。如徇情容縱。不能檢舉者。許本人具告御史臺堂上官及體察舍人。得實具奏治罪。前項官員不能爲理。許被害人具實奏聞。如律罪之。新置廣南都司。升華、思義、懷仁三衛諸所號。○冬十月二十一日。禮部尙書武有等言。太官署厨人。應務猶有逃亾。太官署厨人。視工部馴象。事務畧同。而工部馴象。每至六月十月。已得奉命回農務。而厨人未得。以爲未均爲此。伏乞海陽、山南、三江、京北四處承宣使司。類取該內富農人。添補厨人。如前番例人數。以便應務。每至六月十月。一體分回農務。如工部馴象。以均勞逸。庶可革厨人

逃亾之弊。上從之。○十一月初八日。帝遣陪臣阮觀賢、范盛、黎俊茂等。如明歲貢。○二十日。勅旨海陽、山南、三江、京北四處承司。農隙時。責令府縣官督押社民丁夫。搬運本縣官粟。每承司一萬二千五百石。赴京投納天會庫。檢收貯在前留空庫四連。若清華、义安、順化、太原、諒山、興化、宣光等處承司官粟。並宜如前。收貯本處。以實邊防。○十二月初十日。勅旨。繼今。內外各衙門長官。考課該內衛所府縣等職。宜詳勘實歷。任事蹟。盡心撫恤。軍民愛慕。納稅例無欠少者。方考稱職。如例陞賞。若攬擾誅求。徇私生弊。雖告發無有實跡。而奸貪叢所共知。并管內逃亾數多。並考不稱職。○擇首領令。詔曰。首領之職。與長官得以相抗衡。得以爭可否。不特查寫府衛之簿牒。所以糾舉將校之奸非。宜公以守法。正以率物。間有廉潔稱職。如武伏龍、范如裕、武世好輩。旣行旌賞。以勸

後來。今居是職者。不能見善思齊。反事效尤。互相容隱。習以成風。甚則同流合污。奴顏婢膝。長奸作弊。不可勝言。旌別賢否。勸懲無由。自今在內六科。在外憲司。凡首領從公甄別。孰爲廉潔守法者。孰爲貪冗徇貨者。悉以名聞送。該道監察御史審覈。備奏施行。政有徇於親讐。溺於財貨。舉錯失當。及容縱無言。許六科官一體糾奏。

己未。二年。明弘治十二年春正月二十日。定納大集差餘錢日期令。在內衙門十五箇日。海陽、山南、三江、京北二十五箇日。清華、安邦、諒山、太原、宣光、興化一箇月。又安、高平、順化一箇月十五箇日。廣南二箇月。並依日期。投納戶部。檢收足數如例。○勅旨。諭天下內外官員軍色等。立武之名。在於有常。修政之方。貴乎革弊。故三畧重以將統衆之柄。六韜垂信賞公罰之文。夷攷徵言。足爲明鑑。我國家利民之力。定國之規。內外府衛

之兵。要弘立制。大小匠工之輩。尤重課功。懲貪墨者。訓勅孔昭。獎廉勤者。典章悉備。諄諄乎箠楚鞭笞之戒。汲汲乎苞苴關節之防。夫何當職之具僚。不顧朝廷之成憲。體國忘家者少。廢官曠職者多。捨富移貧。罔悛舊惡。貪財黷貨。尙踵前非。或瘠人肥己之是崇。或徇色酣酒之弗戢。或假上進。而思行朘削。或因下嫁。而肆作侵漁。或以請托蔽影爲良圖。遐遺邦禁。或以要素鞭笞爲得計。違恤人窮。軍政蠹隳。莫斯爲甚。朕光臨寶位。思革弊風。欲實嚴刑以清初政。慮夫以刑罰。而懲奸惡者。輔治之具。以口舌而代斧鉞者。御下之仁。特布新條。求祛舊習。倘能體此朕意。無從匪彛。則懋賞以旌之。狃乎故態。弗聽訓言。則重罪以束之。禍福無門。各宜慎擇。○耕籍田。○二月十七日。勅旨。諭太保崇溪侯黎永。都檢點贛川侯黎能讓等。昨得卿等上奏。深爲宗社大計。懇請建立皇儲。



朕甚嘉焉。第一皇子洵。好服女衣。毒藥母氏。第二皇子濬。幼而不德。恐弗克堪。第三皇子濬。音淳雅嗜詩書。夙敦孝敬。朕親撫育。今已長成。斷自公心。隆以震聒。殊非棄長立少。蓋爲天下擇君。然東宮正殿。朕猶居之。宜於殿側。繕作新宮。并建儲冊。宣義禮節文。其令有司。擇日行之。○申明禁戢。盤饌奢侈事。○三月初二日。行禪祭禮于聖宗。是日除服。○夏四月。勅諭禮部尙書武有等。人才國家之元氣。元氣壯則治道隆。科目仕官之正途。正途開則真儒出。故古者以大比。求俊髦。必嚴設棘之規。謹糊名之典。傳義有禁。易書有制。蓋所以梃繫姦萌。彙征善類。以資天下無究之用。我祖宗取士之法。倣古而行於今。宏摸至詳且備。然法立寢久。弊隨以生。常才濫入於選中。實學或遺於度外。翻騰物議。未愜士心。朕光御洪圖。丕昭公道。敦崇茂實。欲回淳樸之風。屏黜浮華。思革澆

漓之習。濟濟茲登於賢哲。明明盍致於關防。申行各條。具列于后。凡二十條。其一試場務要廣闊。中分四區。各以踈籬限之。及作場內四隅各一棧。至入場。日用內臣校尉各一員。在棧上瞭望。○會試天下舉人。時應舉者五千餘人。上曰。法禁不嚴。則無以杜僥習。沙汰不精。則無以得實才。仍許儀曹定其試法。通臣申其試題。刊降房次區分巡綽。亦以日更考官。許以親避合格者。得五十五名。○五月十九日。詔。繼今豐年大熟。禾穀倍收。各處承宣使司。行下該內府縣州官。責令農長村長。宜用心訓飭本社人。各宜蓄積。以致豐富。不得奢侈妄用以糜費。○大旱。禱雨于太廟。暑盛。二十九日。勅旨傳刑部。今日太廟猶禱雨。且緩決杖罪囚。并錄今月杖罪囚情來。急急奉行。○是月。以楊直源爲奉天府尹。○六月十九日。汰各吏。勅吏部尙書陳瑾等。倚法侵漁。吏之弊習也。以時

沙汰國之常經也。曩者吏選不公。吏途太冗。或僥倖一藝。卽得填充。或屬托多端。希求津要。通納賄賂。躐等出身。間有不能草藁奏章。唯出錢以雇人者。亦不能騰錄簿籍。唯羅網以執爨者。膏肓之病。歲月旣滋。欲治教回淳。而群小路塞。不可得也。爾當移文天下各處內外各衙門。三月以裏。該官具奏。某人廉正公清。某人姦冗迷訥。及老疾劣弱。一體徵還。如令汰出。又選良家子弟社長。端供死罪。方許入試者。填充。○二十六日。勅旨。繼今。廣南地方。軍民捕得公象。許投告三司。公同勘實。象一隻卽三十五人以上。許二十爲首捕。二十爲從捕。各具本論賞有差。○秋七月初五日。勅諭官員百姓等。世道隆污。係乎風俗。風俗微惡。係乎氣數。易曰。君子以居賢德善俗。書曰。弘敷五教。式和民則。詩曰。其儀不忒。正是四國。禮曰。齊入政以防滯。一道德以同俗。聖經垂訓。炳炳足徵。

古昔帝王。御曆膺圖。撫己酬物。莫不廸茲先務也。我太祖高皇帝。輯寧家邦。肇修人紀。太宗文皇帝。懋昭天憲。篤叙民彝。聖宗淳皇帝。敷賁前功。和淪大化。神傳聖繼。矩矱規重。仁心仁聞。洋溢乎華夏。善政善教。漸被于際蟠。兆民孚嘉靖之休。億載衍登宏之盛。朕尊臨寶位。祇紹先猷。躬孝敬。以端建極之原。首綱常。而闡敷言之訓。上行下效。旣式底於咸寧。長治久安。欲永躋於丕績。特申條約。用列左方。故諭。○初九日。殿試策問。以人才王政。命北軍都督府左都督華林侯鄭遜。吏部尙書陳瑾。提調。刑部尙書丁漣剛。監試。東閣學士阮保。翰林院侍講參掌翰林院事黎彥俊。讀卷。賜第一甲杜履謙。梁得朋。阮克儉。三名進士。及第二甲黃徵。阮恒等二十四名進士出身。第三甲陳伯良。黎緒等三十八名同進士出身。凡五十五名。十六日。上御敬天殿。鴻臚傳唱名。禮部引黃

榜。揭于東華門外。○十二日。天壽聖節。停差列校。收獵。○二十五日。御史臺都御史郭有嚴奏。賞罰予奪。帝王屬世之權。賞當其功。則人人皆勸。罰當其罪。則人人皆懲。是故賞罰之間。當盡至公之道。今陛下清明初政。總攬化權。進賢退奸。天下之人。莫不景仰休風。欣觀盛治。然臣竊見。前年征山夷。占城。琉球。老撾之時。精選効力。各衛軍旗有贊力者。先登得敵。除用未盡。及被選汰退。充五府軍。與無得敵同。無有分別。伏乞効力四衛得敵。軍旗被汰退。充府軍者。兵部類奏。置爲効力四另隊。如神武另隊例。以爲戰士有功之勸。又力勇武士。吏典軍色之人。捕得劫人。并惡逆賊黨諸人。有例應得出身者。有例不得出身者。若一槩議賞。則重輕之間。無有甄別。伏乞今捕得劫并逆惡人。例有出身者。吏部照如出身例。除用。例無出身。並授散職如令。如此則爵賞輕重。處置適宜。

而人人知勸矣。臣等又竊見。與人犯盜劫奸凶等事。刑部案律流罪。不再發去。狂習玩法。無所忌憚。或恣行奸惡。報復舊讐。良善之人。多受其害。繼今與人初犯流罪。或墨徒兵南軍者。再還與人如令。若不能懲創。故意再犯。則應送流州所者。一切發去。庶使奸惡之人。知所畏懼。而不敢肆其凶暴矣。上從之。○八月初九日。詔。繼今。上自親王。下及百姓。並不得娶占婦人爲妻。以厚風俗。從戶科都給事中武祿之奏也。○十二日。勅旨。良民進粟受官。許范泰奉勅勘是良善人。一如前例。若惡逆。盜劫。教唆。豪橫。倡優。及彼子孫。並不許受官。○十四日。工部尚書陳保。上奏。聖旨各衙門及百姓。遞本。並於南薰門外。跪進。接授如前。○二十日。工部尚書陳保。奏再議。革軍所吏作弊事。○二十二日。兵部尚書阮逢時等奏。議宣光別所罪囚事。○重修佛跡山天福寺。并立碑。聽皇太后

父貞國公阮德忠之囑也。○九月初六日。置父安順化守禦所。○初九日。詔。繼今。捉得逃囚之人。罪未至死。做如前捕盜例。議賞。罪至死。做如前捕劫例。議賞。○錦衣衛都指揮使司都指揮使掌衛事。兼知豐祐堂。丁觀等。再奉議定力勇武士考較武藝。中不中賞罰例。○十九日。勅旨。禮部出榜接明使。聽百官并着鞋襪。冬十月以後。係隆冬。百官着羅紵絲衣。以順時候。停着紗衣。○二十九日。禮部奏。爲常朝服事。嘗謂乾坤衣裳之制。取象甚明。夏冬葛裘之宜。對時爲順。公侯伯駙馬文武護衛等。繼今常朝衣服。自十月以後。着紵絲羅衣。二月以後。方着紗衣。如遇風雨日。着紗綿布衣。以順時候。○三十日。兵部尙書阮逢時奏。繼今力勇武士重疾。回本貫療治十箇日。疾愈。投告兵部。看具本送中官科臺等官。再公同驗實。身才壯健。奏還本衛司力勇武士。不然充殿前軍。上

從之。○冬十月初七日。召進士杜履謙等。入應制命。作五王帳記。梁得朋優等。阮貴雅落韻。出爲附翼縣知縣。○申明常朝衣服。詔公侯伯駙馬等貴官高品及護衛官。十月十五日各官職品。期每月初一日常朝衣。並着紵絲羅衣。如遇風雨日。并直日在本衛。並許着紗布麻布紗衣。不拘。又詔。繼今。係國忌日。許着紗布。不得着羅綺綵衣。補子用暗織成。不得用五綵。○詔。自今。公侯伯駙馬文武三品以上。公服幞頭用黑紗。翅稍長大於文武官。不得用楊棠樣飾合翅。若百官仍舊樣。○二十一日。定考課。勅諭吏部尙書陳瑾。吏科都給事中黎嵩等。爵賞乃厲世之柄。考課實計吏之方。黜陟幽明。虞舜所以凝庶績。綜核名實。漢宣所以致中興。蓋在上旣神鼓舞之機。則爲下必厲進修之志。不公好惡。曷以勸懲。我國家稽古建官。任人共政。選舉之權公而明。考課之條詳又備。